



末法津糧

---

聞佛法門

---



金鼎大學研究院宗教研究所

## 總 序

聞佛法門乃彌陀淨土法門末法行法。

本編分三。上卷《聞佛法本》綜述教法，屬教門；中卷《聞佛要典》論證法源，屬解門；下卷《聞佛儀軌》簡示行法，屬行門。

聞佛大法，豈易言哉！當來之世，必有佛菩薩應運示現，如智者大師、惠能大師、覺明妙行菩薩者，逗機闡教、授法，嘉惠行人。本編草創，略呈規模，啟示而已。

課題組

# 總目

上編：

《聞佛法本》 ..... 3

中編：

《聞佛要典》 ..... 39

下編：

《聞佛儀軌》 ..... 135

# 聞佛法本

## 目 錄

卷首 法門總示 .....	4
第一章 法門示教 .....	5
第一節 諸佛通法 .....	5
第二節 淨土法門 .....	9
第三節 應機法門 .....	9
第二章 解門教理 .....	11
第一節 法門教理 .....	11
第二節 法門當機 .....	13
第三節 法門典籍 .....	15
第三章 行門資糧 .....	17
第一節 契機擇法 .....	17
第二節 聞佛通法 .....	19
第三節 眾生聞佛 .....	20
第四節 菩薩修定 .....	25
第五節 菩薩修慧 .....	26
第六節 不違通法 .....	28
第四章 證門果德 .....	29
第一節 忍力成就 .....	29
第二節 成就境界 .....	31
第三節 成就德能 .....	34
第四節 成就因果 .....	35

# 卷首

## 法門總示

### ▲ 解題

「聞佛」者，耳根起用，聞佛聖號，聞修思修，成無上道。

「聞佛法門」乃諸佛通法，廣攝顯密諸宗。釋迦牟尼佛開演聞「阿彌陀佛」聖號，往生西方極樂淨土教法，度化末法眾生。

「法本」者，法之所本也。聞佛法門本於佛說，見諸典籍。明本溯源，纂述教法，故名「聞佛法本」。

### ▲ 法門功德 聞佛成佛

《阿彌陀經》云：「若有善男子、善女人聞是經受持者及聞諸佛名者，是諸善男子、善女人皆為一切諸佛之所護念，皆得不退轉於阿耨多羅三藐三菩提。」

### ▲ 法門指歸 淨土成就

聞阿彌陀佛聖號，不假佛接，往生極樂世界，成就法忍，不退成佛。

### ▲ 法門總綱 三門五要

聞佛教法，其要者五。一者、應機一法；二者、實行兩修；三者、三忍境界；四者、四妙德能；五者、五周因果。

其一法者：末法彌陀淨土聞佛法門。兩修者：聞修與思修。三忍者：音響忍、柔順忍、無生法忍。四德能者：神通自在救護眾生、無礙妙能無畏佈施、遍遊沙界普濟十方、普供生佛有求必應。五因果者：眾生往生極樂淨土、積德助道，菩薩福德殊勝、道業成就、往生極樂為果；佛願、佛號、淨土聖力，行者願力、業力為因。

本編開列三門：法門、行門、證門。三門攝五要：「法門」述應運一法；「行門」述實行兩修；「證門」述三忍境界、四妙德能、五周因果。

# 第一章 法門示教

## 第一節 諸佛通法

### ▲ 聞佛法源 金口親宣

聞佛法門乃佛陀金口宣說。《無量壽經》中，佛說：「聞我名號」。《楞嚴經》云：「將聞持佛佛」。《阿彌陀經》授記：「聞諸佛名者」，必當成佛。

「聞」義有二：聞知與聞修。一者、「聞知」，屬解門，由聞而知。《阿彌陀經》云：「聞說『阿彌陀佛』。」《無量壽經》中，佛說：「由聞佛名，起信心故。」《彌陀疏鈔》曰：「一歷耳根，永為道種。」二者、「聞修」，屬行門，由耳根聞聲觀音。《無量壽經》中，佛說：「聞我名號。」《楞嚴經》云：「從聞（修）、思修，入三摩地。」今此「聞佛」者，解行並重，聞知與聞修兼攝。

「佛」義有二：佛語與佛號。《楞嚴經》云：「將聞持佛佛」。一者、聞佛聖號；二者、聞佛法語。

### ▲ 諸多典籍 佛說聞佛

佛法講求以經解經，典籍互為印證。聞佛法門廣見於諸多典籍。

聞佛聖號者：《悲華經》、《藥師經》、《大乘悲分陀利經》、《大般若波羅蜜多經》、《摩訶般若波羅蜜經》、《佛說阿惟越致遮經》、《菩薩念佛三昧經》、《佛說稱揚諸佛功德經》、《佛說觀佛三昧海經》、《不退轉法輪經》、《十住毘婆沙論》等。

聞佛法語者：《佛說大乘莊嚴寶王經》等。

### ▲ 聞佛法門 諸佛通法

聞佛法門乃諸佛通法，諸多典籍備載。

《佛說阿惟越致遮經》中，阿難問佛：「唯佛說之是聖本願，諸佛世尊道法然耶？」佛言：「本發意願：其聞我名，悉不退轉，成正覺。諸佛之法皆亦應然。所以者何？諸佛法等。」

《佛說阿彌陀經》中，佛說：「舍利子！若有善男子、善女人聞

是經受持者及聞諸佛名者，是諸善男子、善女人皆為一切諸佛之所護念，皆得不退轉於阿耨多羅三藐三菩提。是故，舍利弗！汝等皆當信受我語，及諸佛所說。」

### ▲ 聞佛法門 功德無量

聞佛法門功德無量，可消業、得定、不退成佛。

《佛說觀佛三昧海經》中，佛說：「若有眾生聞我名者，禮拜我者，除却五百億劫生死之罪。」

《十住毘婆沙論》中，佛言本願：「若聞我名者，即入必定。」

《寶雲經》中，蓮華眼佛答言：「聞彼佛名者，皆得阿鞞拔致。」

《不退轉法輪經》中，佛說：「以本願力故，若有眾生聞我名者，皆得不退於阿耨多羅三藐三菩提。一切諸佛，法亦如是。何以故？一切佛法，皆平等故。」

### ▲ 重要教法 反覆宣說

聞阿彌陀佛聖號乃西方淨土法門行門正行重要教法。是故，佛於西方淨土法門根本典籍《無量壽經》中反覆宣說。

《無量壽經》現存五譯本中，〈發大誓願品〉語涉聞佛聖號之處，計：

- 1.後漢·支婁迦讖譯本，列二十四大願，兩處曰「聞我名字」。
- 2.吳·支謙譯本，列二十四大願，兩處曰「聞我名字」。
- 3.曹魏·僧鎧譯本，列四十八大願，十處曰「聞我名字」。
- 4.唐·菩提流志譯本，列四十八大願，十三處曰「聞我名已」。
- 5.宋·法賢譯本，列三十六大願，九處曰「聞我（吾）名號」。

後勝前。後出譯本，說聞佛聖號篇幅呈遞增趨勢。可知，聞佛聖號屬《無量壽經》重要教法。

《無量壽經》現存五種譯本，對比推知出自至少三種不同梵本。是知，釋迦牟尼佛曾多次宣說《無量壽經》，多次開演聞佛法門。

## ▲ 聞佛概說 大願九條

《無量壽經》〈發大誓願品〉中，佛概說聞佛法門要義。諸本文字頗多歧異，故採夏蓮居會集本。其中七段經文，茲分列九條。

第一條：「我作佛時，十方眾生聞我名號，至心信樂；所有善根心心迴向，願生我國，乃至十念。若不生者，不取正覺。唯除五逆、誹謗正法。」

第二條：「我作佛時，十方眾生聞我名號，發菩提心，修諸功德，奉行六波羅蜜，堅固不退。復以善根迴向，願生我國。」

第三條：「我作佛時，十方眾生聞我名號，繫念我國；發菩提心，堅固不退；植眾德本，至心迴向，欲生極樂，無不遂者。」

第四條：「若有宿惡，聞我名字，即自悔過，為道作善，便持經戒，願生我剎。命終不復更三惡道，即生我國。若不爾者，不取正覺。」

第五條：「我作佛時，國無婦女。若有女人，聞我名字，得清淨信，發菩提心，厭患女身，願生我國。命終即化男子，來我剎土。」

第六條：「我作佛時，十方眾生聞我名字，歡喜信樂，禮拜歸命；以清淨心，修菩薩行。諸天世人莫不致敬。」

第七條：「若聞我名，壽終之後，生尊貴家，諸根無缺，常修殊勝梵行。若不爾者，不取正覺。」

第八條：「我作佛時，十方佛剎諸菩薩眾聞我名已，皆悉逮得清淨解脫、普等三昧、諸深總持；住三摩地，至於成佛；定中常供無量無邊一切諸佛，不失定意。若不爾者，不取正覺。」

第九條：「我作佛時，他方世界諸菩薩眾，聞我名者，證離生法，獲陀羅尼；清淨歡喜，得平等住；修菩薩行，具足德本；應時不獲一、二、三忍，於諸佛法不能現證不退轉者，不取正覺。」

## ▲ 正行大法 經典主說

佛說彌陀淨土法門，開演多種正行法，聞佛聖號乃其要者。

前列《無量壽經》經文第七、八、九條所述種種殊勝福德、道業成就，皆殊勝法門實修所證果德。而於因地行法，經中唯說聞佛聖號。可見聞佛聖號乃特定行門。

《楞嚴經》云：「歸元性無二，方便有多門。」佛說大經，常傳多法。一為主說，餘為兼說。

《般舟三昧經》主說繞佛，兼說念佛。

《阿彌陀經》主說念佛，兼說聞佛。

《觀無量壽佛經》主說觀佛，兼說念佛。

《楞嚴經》主說聞佛（〈耳根圓通章〉），兼說念佛（〈念佛圓通章〉）等二十四類圓通行法與密法。

《無量壽經》主說聞佛，兼說念佛。

### ▲ 聞佛正行 首要宣說

佛說淨土行門，向來分為正行與助行。《無量壽經》中，聞佛聖號乃正行行法。前列《無量壽經》前六條，皆以聞佛聖號居首，續說餘諸行法諸法：

第一條、「至心信樂，所有善根心心迴向，願生我國，乃至十念」；

第二條、「發菩提心，修諸功德，奉行六波羅密，堅固不退」；

第三條、「發菩提心，堅固不退，植眾德本」；

第四條、「悔過，為道作善，便持經戒」；

第五條、「發菩提心」；

第六條、「禮拜歸命，以清淨心，修菩薩行」。

第七、八、九條，佛唯宣聞佛聖號正行，即詳說果德。是知，佛說助行或彼或此或多或少或有或無，而於聞佛聖號正行，佛語從無或缺，且首先宣說。

## 第二節 淨土法門

### ▲ 聞佛功德 往生淨土

聞佛法門功德，隨願往生淨土。

一者、聞佛聖號，得生淨土。見前列《無量壽經》經文第一至五條。

二者、聞佛法語，得生淨土。《佛說大乘莊嚴寶王經》云：「是時，此《佛說大乘莊嚴寶王經》中，自然出微妙聲。是諸惡鬼得聞其聲，所執身見雖如山峰及諸煩惱，金剛智杵破壞無餘，便得往生極樂世界。」

## 第三節 應機法門

### ▲ 末法眾機 耳根修淨

諸佛設教，首重應機。《楞嚴經》云：「隨眾生心，應所知量。」

眾生根機具時、處之徵。時之大者，莫過於法運。處之大者，莫過於世界。

一者、法運。《佛本行集經》中，釋迦牟尼佛廣說諸佛教法，皆依「法運」分類，曰「正法」、曰「像法」、曰「末法」。當今適值釋迦末法法運。

二者、世界。分為此方世界與他方世界。佛稱此方世界為「娑婆世界」。

當今設教擇法，若求契合眾生根機，一須適時，契合釋迦末法眾生之根機特徵；二須適處，契合此方世界眾生之根機特徵。二者配合，方稱逗機。

其一、適時者。釋迦末法眾生根機特徵：修學淨土法門最易成就。佛說法運三時：正法眾生戒成就；像法眾生禪成就；末法眾生淨成就。《無量壽經》開示聞佛法門，藉淨土之法化聖力，契合末法眾生根機。

其二、適處者。此方世界眾生根機特徵：耳根最利。《楞嚴經》中，文殊菩薩校量圓通諸法，曰：「此方真教體，清淨在音聞。欲取三摩地，實以聞中入」。

故知，耳根修淨之聞佛法門，乃此方世界末法眾生得度之應機法門。

### ▲ 法運三時 真實不虛

釋迦牟尼佛教法法運：正法眾生戒成就，法運千年；像法眾生禪成就，法運千年；末法眾生淨成就，法運萬年。徵諸典籍，驗諸漢地史實，可證佛說法運三時真實不虛。

一、正法時。秦漢時期，佛法初入漢地適值正法，佛遺教三經主說戒法；迨至盛唐千年間，傳譯釋迦教誡典籍，開壇授戒，建立僧團，宗派迭興。是謂戒成就者。延續千年至唐，法運方轉。

二、像法時。達摩祖師東來，《壇經》問世，禪法大行，漢地幾乎無寺不禪，是謂禪成就者。歷千餘年，至明清之際，禪法漸衰。

三、末法。進入二十一世紀，末劫相現，災難頻仍。《阿彌陀經》所說「五濁惡世」，一一現前。《無量壽經》所說「飲苦食毒」，一一應驗。無量末法眾生修證無緣，成就無望，正待淨土法門救度。是乃釋迦如來萬年末法法運之開端。

漢地彌陀淨土法門正行行法，亦具三時特徵。正法修淨，觀佛者利；像法修淨，念佛者眾；末法修淨，聞佛者宜。

其一、正法觀佛，始於初祖慧遠大師「靜心澄觀」；迨至天台智者大師，依《觀無量壽佛經》自修，修淨行者多依觀法成就。

其二、像法念（唸、唱、誦、諷、稱）佛，始於善導大師之「長跪唱佛，非力竭不休」；迨至淨空法師之「一句彌陀念到底」，修淨行者多循稱名念佛之法而得成就。

其三、末法聞佛，發端於明清之際，《西方確指》行世，傳觀聲念佛之法，引入耳根。千禧世紀之交，念佛機、智能手機等自動播音

器漸行普及，聞佛法緣具足，聞佛法門逐漸大行於世。《楞嚴經》云：「願加被未來，於此（觀音法）門無惑，方便易成就。堪以教阿難，及末劫沉淪。但以此（耳）根修，圓通超餘者。」

## 第二章 解門教理

### 第一節 法門教理

#### ▲ 聖號淨相 銷歸自性

漢傳大乘教理不離自性。《壇經》曰：「說一切法，莫離於自性。」

世間聲塵，相分染淨。眾生耳根與聲塵相合，捨淨執染，乃生聞識。彌陀聖號乃清淨音相。聞佛聖號，入流亡所，捨染歸淨。聞熏聞修，安住淨相。日久功成，染相寂滅，染性隱而淨性顯，識轉成智矣。八識皆轉而成四智，則凡轉成聖矣，故曰：「入流成正覺」（《楞嚴經》）。

染性者，眾生性；淨性者，佛性。佛性與眾生性，皆寓於自性之中。眾生自性中之染性盡顯而淨性皆隱，謂之「凡夫」。迨自性中之染性盡隱而淨性盡顯，即眾生性盡隱而佛性盡顯，謂之「見性成佛」。由聞佛聖號而現淨性，成佛道，故曰：「性成無上道」（《楞嚴經》）。

#### ▲ 聞佛法門 相性兼修

《楞嚴經》云：「從聞（修）、思修，入三摩地。」聞修觀彌陀聖號音相；思修觀自性中之佛性。

《楞嚴經》中，文殊菩薩曰：「將聞持佛佛，何不自聞聞。」前者指聞修，後者指思修。前者聞聖號，觀他佛；後者觀聞識、聞性，觀自性佛。前者相修契入，觀佛號、佛語之音響相；後者性修為旨，觀聞根淨、聞性淨。顯淨性則見佛性，即唯心淨土、自性彌陀。觀世

音菩薩主說聞修之法，詳說前者而略說後者；文殊菩薩主說思修之法，詳說後者而略說前者。

### ▲ 勿憂著相 勿囿空有

由相起修，銷歸自性，行者修道；直指人心，見性成佛，菩薩應化。是故，聞修勿憂著相；思修勿囿空有。

一者、聞修勿憂著相。聞佛起修，始於音相。或譏著相，是為謗法。「如幻聞熏聞修金剛三昧」者，「聞熏」即相入。《楞嚴經》云：「因入流相，得三摩提。」

二者、思修勿囿空有。漢傳大乘教理基本範疇，唯論性、相，不論空、有。《楞嚴經》云：「汝觀交中性，空、有二俱非。」空、有乃小乘教理基本範疇，源於古印度民族意識形態思維方式。《壇經》云：「第一莫著空」；「口但說空，不識真空」；「口但說空，萬劫不得見性」。漢地大乘學人思惟方式以性、相為基本範疇，唯有跳脫空、有範疇羈絆，思修方能成就。

### ▲ 不假佛接 隨意往生

念佛往生極樂，必須佛菩薩聖眾接引。而聞佛法門無須聖眾接引，命終即得往生極樂。

《無量壽經》（宋譯）云：「世尊，我得菩提，成正覺已。所有眾生，求生我剎，念吾名號，發至誠心，堅固不退。彼命終時，我令無數苾芻，現前圍繞。來迎彼人。經須臾間，得生我剎，悉皆令得阿耨多羅三藐三菩提。」復云：「世尊，我得菩提，成正覺已。所有十方無量無邊無數世界一切眾生，聞吾名號，發菩提心，種諸善根，隨意求生，諸佛剎土，無不得生，悉皆令得阿耨多羅三藐三菩提。」

前段「念吾名號」，屬念佛法門，須假接引，方得往生。後段「聞吾名號」，屬聞佛法門，無須接引，隨意往生。以往生方式不同故，《無量壽經》〈發大誓願品〉五原譯本中，佛說聞佛法門與念佛法門，分別另列，皆不在同一願中。

## 第二節 法門當機

### ▲ 眾生菩薩 皆當機眾

《無量壽經》〈發大誓願品〉將聞佛法門當機眾分為兩類：十方世界眾生與十方世界菩薩。前列《無量壽經》經文前七條，佛度十方眾生；第八、九條，佛度十方菩薩。

### ▲ 十方眾生 三根四眾

聞佛法門普度十方眾生：三根普被，四眾齊收。

「三根」者，曰利根、曰熟根、曰劣根。

一、利根者，諸佛菩薩出世應化，現高僧大德身，一聞千悟，依教修行。其中弘揚聞佛法門，現身說法者，申願十念，得生淨土，瑞相殊勝，見前列《無量壽經》經文第一條。

二、熟根者，累劫修行，得大成就。此生出世了緣，現齋公齋婆身；往往無知無識，不諳經教，而慈悲喜捨。聞佛聖號、極樂聖境，即生信願。發菩提心，堅固不退。植眾德本，至心迴向，欲生極樂。是諸眾生乃多「善根、福德、因緣」者。臨終往生，瑞相顯明，見前列《無量壽經》經文第一、三條。另有眾生善根深厚，聞佛修法，積德助道，詳見前列《無量壽經》經文第六、七條。

三、劣根者，劣根眾生具惡業、惡報、闡提之別。

惡業眾生，若聞佛教法，悔過修行，仍屬聞佛法門當機眾，見前列《無量壽經》經文第四條所稱「若有宿惡」者。

惡報眾生，前列《無量壽經》經文第五條曰：「若有女人」。推而廣之，若有貧人，若有苦人，若有賤人，若有殘人，若有病人，……是諸眾生若聞佛生信，發菩提心，發願求生極樂，皆屬聞佛法門當機眾。

闡提眾生。冥頑不化，怙惡不悛。唯此類眾生不屬聞佛法門當機眾。前列《無量壽經》經文第一條曰：「唯除五逆、誹謗正法」。

「五逆」者流，乃惡業障道。其人若一念迴心，改惡向善。聞佛

聖號，生起信願。向來惡業，類歸「宿惡」。其人臨終十念申願，亦得往生極樂，見前列《無量壽經》經文第四條。唯真回頭者，萬不得一。大多信不真、願不切。臨終往生，瑞相模稜。

「誹謗正法」之流，頗多世智障道，所謂「知識份子」者。不信經法，毀謗聖教；不敬神明，謗為迷信。若有前科，而一朝觸機，幡然悔悟；深入經藏，致力弘法者，不在此列，當屬菩薩幻化耳。

稱利根、熟根、劣根者，乃以法眼鑒定其法身根器，而非肉眼辨識其肉身世智。

度化三根眾生，佛說主修正行皆為聞佛法門，而說兼修行法各異，見前列《無量壽經》經文前七條。乃因眾生根器不同，業力不同，願力不同。度種種眾生，佛說種種法，正顯應機施教之聖智。

復有常根末法學人，大多道心不堅，慧根欠利。自身既少善根、福德，外緣復予助退障進。若修未修，因虛果渺。利濟眾生，非其本意。往生淨土，非其所願。若肯聞佛修善，結緣彌陀，亦稱利益。

三根與常根，合為四眾。聞佛法門三根普被，四眾齊收。唯除五逆、誹謗正法，而怙惡不悛者。

四眾均屬與彌陀有緣眾生。餘外無量芸芸眾生，與佛無緣，與聞佛法門無緣。故曰：佛世難值，經法難聞。聞能信行，難中之難。

### ▲ 十方菩薩 皆當機眾

十方世界一切菩薩，無論修定修慧，皆聞佛法門當機眾。

菩薩聞佛，可以得定，成就種種三昧，「住三摩地，至於成佛」，見前列《無量壽經》經文第八條。

菩薩聞佛，可以開慧，可以登地，證不退位，見前列《無量壽經》經文第九條。

法門相同而功德不同、果證不同者，乃因菩薩有通有別。通者，境界皆居十法界中菩薩法界；別者，三賢十聖境界各個不同。

### 第三節 法門典籍

#### ▲ 兩經為主 師承法源

《無量壽經》 聞佛法門根本經典。法藏比丘師從「世間自在王如來」，表因；〈發大誓願品〉說「聞我（佛）名號」，表行；經末授記「妙音如來」，表果。

《大佛頂首楞嚴經》 聞佛行門主要經典。〈耳根圓通章〉依聞修與思修二法，詳說聞佛法門行法、境界、果證。

二經合說同一大法，唯階次不同耳。聖號表法，觀音菩薩聖號有二：曰「觀世音」，曰「觀自在」。初入聞修觀世音，故師從「觀世音如來」（《楞嚴經》〈耳根圓通章〉）；高階思修觀自在，故師從「世間自在王如來」（《無量壽經》）。初階成就，位登大菩薩，號「觀世音菩薩」。高階成就佛果，號「阿彌陀佛」。

#### ▲ 通說聞佛 聞佛成佛

《佛說阿彌陀經》 彌陀淨土法門主要典籍。通說聞佛法門教、理、行、果。經末授記：「若有善男子、善女人聞是經受持者及聞諸佛名者，是諸善男子、善女人皆為一切諸佛之所護念，皆得不退轉於阿耨多羅三藐三菩提。」明示聞佛法門為「諸佛通法」；直示「聞佛成佛」。本經通說彌陀淨土三資糧，尤重修願、習信。

#### ▲ 大慈悲法 柔順功德

觀音三經說大悲行法，可獲柔順忍：

《大佛頂首楞嚴經》〈耳根圓通章〉

《妙法蓮華經》〈普門品〉

《大方廣佛華嚴經》〈觀自在菩薩章〉

#### ▲ 思修行法 空、性各說

《般若波羅蜜多心經》 詳說觀自在菩薩思修返觀內照行法，可與《楞嚴經》〈耳根圓通章〉文殊菩薩所說思修行法合參。唯前者以空、色（有）解，後者以性、相解。

### ▲ 淨土典籍 合說極樂

《觀無量壽佛經》 彌陀淨土法門行門主要典籍，主說觀法，未及聞法。

《大方廣佛華嚴經》〈普賢行願品〉 佛門主要典籍，概說佛教行門通法：終於導歸極樂。

《往生論》 淨土法門重要典籍，簡述淨土法門要義。

### ▲ 會參典籍 旁通助修

《藥師琉璃光如來本願功德經》 淨土聞佛法門重要典籍，主說聞佛法門，與《無量壽經》同屬釋迦末法教法，可互參。本經末法盛行漢地，法運昭彰，不可思議。二經皆以大願為主導，皆說聞佛聖號離苦得樂。《藥師經》以此方世界離苦為主，兼及往生東方淨土；

《彌陀經》主說往生西方淨土得樂，而兼及此方世界積德修福。

《楞嚴經》〈念佛圓通章〉 念佛法門根本典籍，由相起修。經中「染香人身有香氣」之義，可與聞佛法門之「聞熏」會參，以明佛德熏染之理。

聞佛法門乃佛門重要教法。諸佛多次宣說，眾多典籍備載，詳見本編第一章第一節〈諸多典籍 佛說聞佛〉。或言教，或言理，或言行，或言果；或由空說，或由性說。若能會參，法益愈豐。

### ▲ 漢傳典籍 獨惠東土

《六祖壇經》 漢傳大乘佛教根本典籍。經中佛性論可與《楞嚴經》所說「如來藏妙真如性」合參；「識性」與「見性」諸義，可與《楞嚴經》〈耳根圓通章〉文殊菩薩所說思修行法合參。

《西方確指》 漢傳大乘佛教重要典籍，解行並重，尤契漢地學人根性。其淨土法門教法，於念佛之中，摻用耳根觀聲。乃像末之交由念佛轉聞佛承前啟後重要教法。

### ▲ 當來菩薩 必有廣說

釋迦牟尼佛末法法運萬年，其間漢地必有佛菩薩出世，如禪宗六祖惠能大師者，開演大經大論，闡揚釋迦末法彌陀淨土聞佛法門。

## 第三章 行門資糧

### 第一節 契機擇法

#### ▲ 聞佛一法 隨類解行

經云：「佛以一音聲說法，聞者隨類各得解。」佛說聞佛一法，而菩薩、眾生，解行各異。

眾生聞佛聖號，或深信切願，往生極樂，見前列《無量壽經》經文前五條；或積德修福，享樂人天，見前列《無量壽經》經文第六、七條。

菩薩聞佛聖號，或修定成就功德，見前列《無量壽經》經文第八條；或修慧成就功德，見前列《無量壽經》經文第九條。

#### ▲ 眾生聞佛 求生極樂

眾生聞佛聖號，乃彌陀特別方便法門，旨在使眾生與佛願感應，引導眾生修福積德、往生極樂。

凡夫學人聞佛聖號，功歸信心、願心，與佛感應。《無量壽經》云：「至心信樂，所有善根心心迴向，願生我國」，見前列經文第一條。

凡夫學人聞佛聖號，於道法屬初入。《楞嚴經》云：「初心入三昧，遲速不同倫。」

凡夫學人於此方世界聞佛，終此一生不過耳根法門之初入而已；須待往生極樂佛國，受佛法化，方行聞修與思修之實修實證。

#### ▲ 眾生定慧 淨土法化

眾生聞修修定，思修修慧，初階修於十方，高階則屬淨土功課。眾生往生極樂淨土，受佛法化，成就定慧。修定成就「六根清澈」；修慧成就，「各於異方次第成佛，同名『妙音如來』」。 (《無量壽經》)

《無量壽經》〈菩提道場品〉云：極樂國土，「微風徐動，吹諸枝葉，演出無量妙法音聲。其聲流布，遍諸佛國。清暢哀亮，微妙和

雅。十方世界音聲之中，最為第一。」經義以樹聲喻法音。

經文復云：「若有眾生睹菩提樹，聞聲、嗅香，嘗其果味，觸其光影，念樹功德，皆得六根清淨，無諸惱患。住不退轉，至成佛道。」眾生於極樂淨土，受佛法化，成就定慧。

《楞嚴經》中，觀世音菩薩曰：「由我初獲妙妙聞心，心精遺聞，見、聞、覺、知不能分隔，成一圓融清淨寶覺。」「圓融清淨寶覺」即「六根清淨」。

六根捨染歸淨，乃聖道法。脫胎換骨，豈易言哉！非淨土法化，末法眾生焉能成就。

### ▲ 聞思定慧 菩薩功課

菩薩聞佛聖號，聞修修定，思修修慧。

佛門通法，曰：「戒、定、慧」，謂之「三學」。《楞嚴經》中，觀世音菩薩曰：「從聞、思修，入三摩地。」菩薩聖號表法。「觀世音」表聞修修定；「觀自在」表思修修慧。

聞修修定乃佛門中階教法：耳根起用，觀聖號綸音為因地行持；觀世音聞聲救苦為果地德能。

思修修慧乃佛門高階教法：返觀內照行者自性中之佛性而彰明之。《楞嚴經》中，思修行法由文殊師利法王子宣說奧義，可見其於八萬四千法門中，屬無上甚深微妙法。

思修屬聖位大菩薩功課。《般若波羅蜜多心經》云：「觀自在菩薩行深般若波羅蜜多時，照見五蘊皆空，度一切苦厄。」觀自在菩薩位居妙覺，遠超三賢，踐越十聖。

返觀內照乃聖位大菩薩行，非凡夫學人可解可行者。窮究經文字義，入文字障矣！

### ▲ 契機擇法 切忌尋伺

凡夫學人聞佛，意在與佛願感應，得佛加持，往生淨土，受佛法化，復行聞修與思修。是故，當須依教聞佛，腳踏實地，勤勉用功，

求生極樂。萬勿好高鶩遠，妄擬聞修與思修。揠苗助長，徒自誤耳！若行妄擬，乃至尋伺，魔邪堪虞矣！《楞嚴經》〈陰魔章〉曰：「若作聖解，即受群邪。」

## 第二節 聞 佛 通 法

### ▲ 聞佛通號 阿彌陀佛

《無量壽經》中，佛說：「聞我名字。」《楞嚴經》云：「將聞持佛（聖號）、佛（法語）。」《阿彌陀經》云：「聞諸佛名。」

《占察善惡業報經》中，佛說：「學習聞我名者，亦能學習聞十方諸佛名者。」淨空法師說：「『阿彌陀佛』義為『無量覺』，是諸佛通號。」是知：聞佛法門聞修行法乃聞「阿彌陀佛」四字聖號。

起修之初不拘四字、六字。修行上路者，當以專聞四字「阿彌陀佛」聖號為準。

### ▲ 音源法緣 自他有別

聖號音源乃聞佛法門重要法緣，菩薩、眾生有別。菩薩仗神通力變現聖號，聞天籟音，參見前列《無量壽經》經文第八、九兩條；眾生聞佛，依賴他人助念或念佛機等播音器。

拜電子科技之賜，「念佛機」等電子自動播音器問世。以念佛機作聞佛音源，藉「機」聞佛，晝夜不斷，最利根器成熟。

互聯網上佛號音頻資料甚多，選擇標準在於「有緣」。不拘聲調，聞之感動，心生歡喜者，即為有緣。

### ▲ 專勤用功 調身助聞

《西方確指》曰：「用功之法，不出『專勤』二字。」自起修日，當摒卻萬緣，杜絕人事；安止一室，專一聞佛。聞修上路後，日以六支香（一支香約一個半小時）為限，寧加勿減。

聞佛起修之初，當調動靜。始於坐聞；坐久行聞；昏沉行聞；散亂拜佛而聞。總之，坐、行、拜，皆以動靜相間，調身助聞為宜。

《西方確指》中，覺明妙行菩薩開示用功之法，巨細靡遺。學人當須依教奉行。若道緣不具，俗務纏身，亦當於早晚課聞佛，持之以恆。

### ▲ 異境現前 不著不怖

起修之初，便會偶有異境現前。或無響而有聞，或此響而彼聞。一旦功夫得力，耳根犀利，則六道諸響、冥界諸音，漸得與聞，種種異境陸續現前。此乃「天耳通」，俗誤謂「幻聽」。

異境現前，要須不貪不著、不驚不怖，即刻轉聞彌陀聖號。耳根入於彌陀聖號綸音之流，斷絕他音他聞。縱使得聞亦如無聞，異境自然消失。《西方確指》第四十二品中，覺明菩薩示範喝破之法對治異境。

慎防貪境著魔。《楞嚴經》云：「暫得如是，非為聖證。不作聖心，名善境界。若作聖解，即受群邪。」

彌陀聖號感召百祥，化解異境最利。佛號播音，應須晝夜不斷，行者隨時注意於聖號綸音，自能祛著除怖。

## 第三節 眾生聞佛

### ▲ 眾生聞佛 有別菩薩

聞佛法門行法，眾生與菩薩迥別。前列《無量壽經》經文前七條，說眾生聞佛行法，於本節述之。第八、九條，說菩薩聞佛行法，於此後兩節述之。

### ▲ 聞佛正行 必須學習

聞佛法門乃彌陀教法，凡夫學人必須經由學習。《占察善惡業報經》中，佛說：「此人名為學習聞我名者，亦能學習聞十方諸佛名者。」

「學」則知其方法，抉其要領；「習」則熟能生巧，日久成功。學而習之，解行相應。聞佛乃易行之法。行者萬勿以其易行，而輕忽

學習之必須。

### ▲ 求生淨土 聞佛宗旨

古德云：「釋迦所以興出世，唯說彌陀本願海。」往生淨土，受佛法化，乃釋迦末法眾生得渡唯一坦途。彌陀以聞佛聖號極其方便易行之法，引導眾生，往生極樂淨土，乃聞佛教法精華所在。學人臨終，十番申願，必得往生。是故，申願求生極樂淨佛國土，乃聞佛行門之關鍵。一部《無量壽經》宗旨在此，前列經文前五條皆歸於此，萬勿失焦。

### ▲ 聞佛要領 重在於「心」

徹悟大師曰：「一切法門，明心為要；一切行門，淨心為要。」《無量壽經》云：「以清淨心，向無量壽；乃至十念，願生彼國」，見〈三輩往生品〉；「至心信樂，所有善根心心迴向，願生我國」，見前列經文第一條。是知，清淨心、至誠心、迴向心，三者乃聞佛法要領。耳根聞佛，圓修三心，方為得法。

### ▲ 聞佛三心 指歸信願

前列清淨心、至誠心、迴向心三者一體。「至誠心」歸信；「迴向心」歸願；「清淨心」歸行。行歸信願，信願導行。信願行三，渾然一體，方得聞佛心要。

### ▲ 求生極樂 備三資糧

前列《無量壽經》經文第一條，素稱大願核心。其要者三：一曰信，「至心信樂」；二曰願，「願生我國」；三曰行，「聞我（佛）名號」。是謂「淨土三資糧」。

聞佛法門易於行持而難在信、願，故行法最重修願、習信。《彌陀要解》曰：「得生不得生，全由信、願之有無。」《阿彌陀經》以日課本而教誡行人，經義尤重修願與習信。經文正宗分義歸三門：願門、行門、信門。經文前半部屬「願門」，以極樂勝境啟發眾生由羨生願；後半部由「諸佛證信」起，廣說「信門」；而「行門」，則僅佔全經中間一小段，自「不可以少善根、福德、因緣」起。眾生闕

讀，易記首末。是故，佛陀以啟願居首，勸信居末，以助學人銘記。

### ▲ 學笨習信 寧偏迷信

信須習。

彌陀淨土法門乃難信之法。《阿彌陀經》云：「若聞斯經，信樂受持，難中之難，無過此難。」眾生信心皆不堅固。是故，習信乃重要功課。《占察善惡業報經》云：「習信修行」。《阿彌陀經》以後半部經說信，乃習信最佳典籍。經中佛語：諸佛證信、以果勸信、以生催信、以難激信。

眾生根器，於信可徵。利根者，示現正信；熟根者，常若迷信；劣根者，冥頑不信。劣根中之至劣者，名「一闍提」，義為「不信」，其中不乏世智障道之「知識份子」。

寧可迷信，不可不信。或謂：「不迷信，不為信仰；不盲從，不為服從。」淨空法師說：「迷信，有真假之別。真迷信者，沒有二念。教他念『阿彌陀佛』，他心裡就只有『阿彌陀佛』，一天到晚都念著『阿彌陀佛』；之外，連一個妄念都沒有。他真能往生，品位還很高。」迷信念佛，得大成就；迷信聞佛，亦復如是。學人莫輕齋公齋婆無知無識，唯信聞佛。臨命終時，未嘗非一大成就者。

李炳南居士自歎：欲學笨而不可得。「笨」者，上智之相也，世謂「大智若愚」。聞佛行者當以學「笨」之心習信。機巧辯給，習信大忌。

### ▲ 願門法要 發修申三

願須修。

眾生往生極樂，願力至關重要。願門三法：發願、修願、申願。

一、發願須誠。發願求生極樂，當須至誠懇惻。最忌高唱《發願文》一遍，照本宣科，有口無心。中夜佛前跪禱，發願功德最強，得佛加持最力，行者受益最豐。

二、修願淨心。極樂易往，仗佛大願聖力；娑婆難離，眾生塵慾牽纏。修願法要：離慾淨心，隔絕牽纏，打開塵網。

三、申願求生。前列《無量壽經》經文前五條，佛語明示：眾生聞佛往生，各須先行申願：「願生我國」、「願生我刹」、「欲生極樂」。未申願者，不得往生，見前列《無量壽經》經文第六、七條。

甲、「十念」申願。前列《無量壽經》經文第一條，佛言：「願生我國，乃至十念」。是謂「十念必生願」。十念必生之「念」，乃「願生極樂」之念，向佛申願之念。「十念」者，十番申願，而非十念聖號。《無量壽經》〈三輩往生品〉中，佛復明示：「乃至十念，願生其國」。

乙、淨心申願。申願與佛感應，願心必須清淨。佛言：「以清淨心，向無量壽。」學人當須行門用功，精進聞佛。得定淨心，感應則靈。

丙、申願須勤。願須常修。修願法要，在於申願。申願必須列為日課重要內容。若於聞佛法會，每支香末皆應申願一次；乃至聞佛聖號百八，即行申願一次。會末必以申願作大迴向。日久成習，命終苦逼之時，方能順利申願十念。

丁、迴向申願。佛言：「所有善根，心心迴向，願生我國。」見前列《無量壽經》經文第一條。善根乃迴向之質，申願之資。是故，學人當須努力深植善根，至誠迴向，以資申願。

### ▲ 助行功德 往生必備

學人欲求往生極樂，聞佛正行固須著力，助行亦不可少懈。《阿彌陀經》云：「不可以少善根、福德、因緣，得生彼國。」是故，學人當努力修善固根，積福植德，結佛勝緣。

助行亦須解行相應，深解方能力行。綜合前五條經文所說修淨助行，計：發菩提心，奉行六波羅密，堅固不退；修諸功德，植眾德本；懺悔過惡，為道作善，便持經戒等項。

助行者，助十萬億佛土往生之行。助寡力微，焉能成行。學人萬勿輕忽助行。

### ▲ 助行綱目 淨業三福

世謂：「福人居福地，福地福人居。」彌陀淨土乃極樂福地。欲求往生，必須福備。《觀無量壽佛經》中，佛示修福之法：「欲生彼國者，當修三福：一者、孝養父母，奉事師長，慈心不殺，修十善業；二者、受持三歸，具足眾戒，不犯威儀；三者、發菩提心，深信因果，讀誦大乘，勸進行者。如此三事，名為『淨業』。」

### ▲ 壇經說善 漢地助行

惠能大師曰：「佛法在世間，不離世間覺。」淨業助行具民族文化特徵。《壇經》云：

「心平何勞持戒；行直何用修禪。  
恩則孝養父母；義則上下相憐。  
讓則尊卑和睦；忍則眾惡無喧。  
若能鑽木出火；淤泥定生紅蓮。  
苦口的是良藥；逆耳必是忠言。  
改過必生智慧；護短心內非賢。  
日用常行饒益；成道非由施錢。  
菩提只向心覓；何勞向外求玄。  
聽說依此修行；西方只在目前。」

### ▲ 聞佛積德 襄助道業

若有眾生不求往生極樂，發願於此方世界修行，正、助諸行亦有助道之功。綜合前列《無量壽經》經文第六、七兩條經義可知：正行「聞我（佛）名字」；助行「歡喜信樂，禮拜歸命；以清淨心，修菩薩行」。其助道之功：「諸天世人莫不致敬」；「生尊貴家，諸根無缺，常修殊勝梵行」。

## 第四節 菩薩修定

### ▲ 菩薩聞佛 修定導向

菩薩聞佛修定行法，佛說導向，見於前列《無量壽經》經文第八條：「清淨解脫、普等三昧、諸深總持；住三摩地，至於成佛；定中常供無量無邊一切諸佛，不失定意。」

### ▲ 捨識用根 置「轉」專「用」

《楞嚴正脈》曰：「捨識用根」。唯識講「轉」，祇劫奏功。聞修專「用」，當生成就。「用」者，耳根起用，捨卻耳識。聖號聲塵，直入耳根。

### ▲ 入流亡所 入綸音流

《楞嚴經》云：「入流亡所」。「入流」者，要在耳根專聞彌陀聖號，入於聖號綸音音相之流，摒除餘外一切聲塵，唯聞聖號，歷歷分明。「亡所」者，漸至所聞一切聲塵，皆入空寂。

### ▲ 聞修定境 六階遞進

《楞嚴經》中，觀世音菩薩說「聞修」行法，曰：「初於聞中，入流亡所；所入既寂，動、靜二相了然不生。如是漸增，聞所聞盡；盡聞不住，覺所覺空；空覺極圓，空所空滅；生滅既滅，寂滅現前。」

可知，聞修定境須經六階遞進。

其一、「入流亡所」。《金剛經》曰：「名為『入流』，實無所入。」是為定境粗相，去動相。

其二、「動、靜二相了然不生」。是為定境細相，去靜相。古德或謂色蘊空。

其三、「聞所聞盡」。定境進階，前五識中之耳識盡捨而唯用耳根聞佛聖號。古德或謂受蘊空。

其四、「覺所覺空」。定境進階，第六識意識盡捨而唯用耳根聞佛聖號。古德或謂想蘊空。

其五、「空所空滅」。定境進階，第七識末那識盡捨而唯用耳根聞佛聖號。古德或謂行蘊空。

其六、「寂滅現前」。定境成就，第八識阿賴耶識盡捨而唯用耳根聞佛聖號。古德或謂識蘊空。

聞修境界，必須親證。根器不同，定境各異。三千公案，事各各別；求證六祖，言人人殊。八識五蘊諸說，不過依文解義耳，行者萬勿泥之。

### ▲ 辨明空、性 簡別染、淨

聞佛行者於定境中聞佛聖號，要須辨明空、性，簡別染、淨。

「空」指除染相、離染性。「亡所」、「不生」、「聞盡」、「覺空」、「空滅」、「寂滅」，皆指雜音、妄聞、染相。而於聖號綸音淨性、淨聞，則「聞中」、「漸增」、「不住」，須與無間。或謂：《楞嚴經》〈念佛圓通章〉屬有門，〈耳根圓通章〉屬空門。大乘修行，要在「見性」。《楞嚴經》說性，稱「如來藏妙真如性」。〈念佛章〉之「香氣」，暗喻淨性；〈耳根章〉之「亡所」，專指染性。離「性」修「空」，昧於根本。經云：「汝觀交中性，空、有二俱非。」

## 第五節 菩薩修慧

### ▲ 菩薩聞佛 修慧導向

菩薩聞佛修慧行法，佛說導向，見於前列《無量壽經》經文第九條：證離生法，獲陀羅尼；清淨歡喜，得平等住；修菩薩行，具足德本；獲三種忍，證不退轉。

### ▲ 思修行法 觀照起用

《心經》曰：「觀自在在菩薩行深般若蜜多時，照見五蘊皆空。」是知，思修行法須用「觀」與「照」，即返觀內照。或曰：「反聞，聞自性」；應為「返（觀）聞（識與）聞（性），（內照八識與）自性」。「性」乃抽象法，耳根不可及，意根方可及。意根起用，

「識」稱「思」，「智」稱「觀」、「照」，不可稱「聞」。

### ▲ 文殊傳法 由識觀性

《楞嚴經》中，文殊菩薩教授思修行法：「旋汝倒聞機，反聞聞自性。性成無上道，圓通實如是。」

「旋汝倒聞機，反聞聞自性」義為：「旋轉你的意識活動的方向，顛倒由聞性生聞識的運作機制，反觀內照，逆向觀察識與性的活動：由聞識的活動，反觀聞性的主宰作用，觀照聞性之特徵與功能；觀成，進而以此逆向觀照之法，運用於觀照自身諸識與自己自性之關係，觀照自己自性中本具之如來藏妙真如性之特徵與功能。」

「性成無上道，圓通實如是」，義為：「如果能夠明達如來藏妙真如性之特徵並彰顯自己自性中本具之如來藏妙真如性之功能，控制、主導，乃至取代自己諸識運作，轉識成智，即成就了無上道業。所謂『圓通』行法與成就，即前述過程與結果。」

文殊菩薩明示如來藏妙真如性之特徵與功能：「覺海性圓澄，圓澄覺元妙。」「覺海性圓澄」，言特徵；「圓澄覺元妙」，言功能。

前句之「自性」，指行者自身六根、八識之性，指凡夫之自性，內含佛性與眾生性。後句之「性」，指如來藏妙真如性，即佛性，乃佛之自性。「成」者，觀成而成就，即圓顯佛性。惠能大師證道偈五句「何期自性」，專指聖者自性。凡夫未證，不可妄稱。

### ▲ 禪淨多異 境界相通

思修與參禪，均屬佛門高階教法。

一、法運不同。禪法乃像法教法；思修屬淨乃末法教法。

二、用心不同。禪修用參；思修用觀。參禪要在離心意識；思修著力觀照心意識。

三、根器不同。參禪悟道乃諸佛諸大菩薩出世應化；思修觀照乃行者用功。

四、頓漸不同。參禪悟道屬頓法；思修觀照屬漸法。

五、境界相通。「旋汝倒聞機，反聞聞自性」，即「明心識性」。「性成無上道，圓通實如是」，即「見（現）性成佛」。「覺海性圓澄」，言識性；「圓澄覺元妙」，言見性。

## 第六節 不違通法

### ▲ 通法種種

#### （一）基礎科目

淨空法師列舉淨宗學人佛學基礎修學科目：三福、六和、三學、六度、十願。

佛說：「諸惡莫作，眾善奉行，自淨其意，是諸佛教。」《無量壽經》中，〈勸諭策進〉、〈心得開明〉、〈濁世惡苦〉、〈重重誨勉〉、〈如貧得寶〉五品，詳註前列《無量壽經》經文九條所示發菩提心、植眾德本、為道作善諸法。

#### （二）學佛通法 戒定慧三學

漢傳大乘末法學人往往戒法根基欠固，修學前述《無量壽經》五品經文，尤當注重其中戒法法義，依教奉行。

佛陀教法八萬四千法門，不離定慧。聞佛法門定慧等持。《楞嚴經》云：「將聞持佛佛，何不自聞聞。」前者聞修修定，後者思修開慧。前列《無量壽經》經文第八條屬前者，第九條屬後者。

#### （三）修淨通法 信願行三資糧

聞佛法門屬彌陀淨土法門正行教法之一。學人必須圓修淨土教法。信、願、行三資糧，淨業三福，種種淨行缺一不可。

前列《無量壽經》經文九條所示行法，除聞佛聖號正行外，諸多助行，皆為彌陀通法。《無量壽經》〈三輩往生品〉、〈往生正因果〉，詳註前列《無量壽經》經文第二條所示行法。〈勸諭策進品〉後半部，詳註前列《無量壽經》經文第三、四兩條所示行法。

#### (四) 耳門通法 聞思兼修

《楞嚴經》云：「從聞（修）、思修，入三摩地。」耳根圓通法門行法中含聞修與思修。聞佛法門通於耳根圓通法門，故須聞、思兼修。

#### (五) 漢傳通法

《六祖壇經》、《西方確指》所傳佛門通法、修淨通法，尤契釋迦末法漢地學人根性與習性。

### 第四章 證門果德

#### 第一節 忍力成就

##### ▲ 聞佛功行 忍力成就

《無量壽經》曰：「志願無倦，忍力成就。」「志願無倦」，言功行；「忍力成就」，言果德。

##### ▲ 修證成就 通別名相

佛說無量法門，修證成就有通有別。

佛門通法：戒定慧三學。定成就四禪八定；慧成就「阿耨多羅三藐三菩提」，即無上正等正覺。

大乘通法：明心見性，見性成佛。徹悟大師曰：「一切法門，明心為要。一切行門，淨心為要。」《六祖壇經》曰：「菩提自性，本來清淨。但用此心，直了成佛。」

耳根通法：《楞嚴經》說耳根圓通法門成就「耳門圓照三昧」；聞修成就「如幻聞熏聞修金剛三昧」；思修成就「金剛王如幻不思議佛母真三昧」。

聞佛別法：《無量壽經》〈菩提道場品〉說聞佛法門成就：「獲三種忍：一、音響忍；二、柔順忍；三者、無生法忍」。

##### ▲ 忍法境界 安住實相

「忍」者，「於法實相，安住為忍」（《大乘義章》）。音響忍

安住於彌陀聖號音相；柔順忍安住於慈悲德相；無生法忍安住於諸法實相。

《無量壽經》序分〈德遵普賢品〉，詳說十六正士境界，即三種忍境界。十六正士皆聖位大菩薩。是知，安住忍境乃大菩薩境界。

### ▲ 忍位品階 重重單復

三種忍具品階之別。前列《無量壽經》經文第九條曰：「一、二、三忍」。〈菩提道場品〉曰：「一音響忍；二柔順忍；三者無生法忍」是知：忍位品階：一者、初階成就曰「音響忍」；二者、進階成就曰「柔順忍」；三者、高階成就曰「無生法忍」。

各階忍位中復具上中下品忍境。三階九品，重重單復。

三種忍位之重重單復，可與耳根圓通法門修證位階之重重單復互參。《楞嚴經》〈分證章〉立信、住、行、向、地（、加行）等五十七階，分十二位。經云：「從乾慧心，至等覺已，是覺始獲金剛心中初乾慧地。如是重重單復十二，方盡妙覺，成無上道。」單數十二，復則百四。復以重重，實則無量。忍位無量，亦復如是。

### ▲ 修證境界 眾處不同

三種忍之修與證，眾生與菩薩眾不同。菩薩於十方世界修聞佛法門，即可於十方世界獲三種忍，見前列《無量壽經》經文第九條。眾生於十方世界修聞佛法門，往生極樂，而於淨土受佛法化，獲三種忍，見於前列《無量壽經》經文前五條與〈菩提道場品〉。非生淨土，眾生不能獲忍。

### ▲ 佛願加持 皆不退轉

三種忍之修與證，皆得彌陀威神加持。

一者、加持眾生。《無量壽經》（魏譯）云：「若彼國人天見此樹者得三法忍：一者、音響忍；二者、柔順忍；三者、無生法忍。此皆無量壽佛威神力故，本願力故，滿足願故，明了願故，堅固願故，究竟願故。」彌陀以佛願威神之力加持眾生。

二者、加持菩薩。前列《無量壽經》經文第九條明示：「應時不獲一、二、三忍，於諸佛法不能現證不退轉者，不取正覺」。彌陀因地以成佛大願加持菩薩。

成就三種忍，皆得不退轉。眾生往生彌陀淨土獲三種忍，「住不退轉」，見《無量壽經》〈菩提道場品〉。菩薩於十方世界獲三種忍，「證不退轉」，見前列《無量壽經》經文第九條。

## 第二節 成就境界

### ▲ 音響忍

音響忍乃聞佛法門初階成就境界。得是忍者，聞修得定，成就三昧。

音響忍安住於彌陀聖號清淨聖潔音相，成就「聞佛三昧」。「三昧」者，梵語，「定」之音譯。《大乘義章》曰：「心住一緣，離於散動」。「一緣」者，彌陀聖號清淨聖潔音相也。前列《無量壽經》經文第八條曰：「我作佛時，十方佛刹諸菩薩眾聞我名已，皆悉逮得清淨解脫、普等三昧、諸深總持。」

獲音響忍者境界：神遊十方，遍供諸佛；住深禪定，直至成佛。《無量壽經》云：「住深禪定，悉睹無量諸佛。於一念頃遍遊一切佛土。」前列經文第八條曰：「定中常供無量無邊一切諸佛，不失定意」；「住三摩地，至於成佛」。

音響忍通於耳根圓通法門初階聞修成就境界。《楞嚴經》中，觀世音菩薩曰：「我從耳門圓照三昧，緣心自在，因入流相，得三摩提。」觀世音如來傳授「如幻聞熏聞修金剛三昧」，即是聞佛三昧。「如幻」者，由相所現，虛妄如幻；「聞熏」者，聖號功德；「聞修」者，行者功德。彌陀淨土法門乃二力法門。「聞熏」顯聖力；「聞修」靠自力。「金剛」喻其堅利，可斷煩惱。

## ▲ 柔順忍

柔順忍乃聞佛法門進階成就境界。得是忍者，慈悲心生，菩薩行現。

獲柔順忍者，安住於菩薩德相。前列經文第九條曰：「修菩薩行，具足德本。」《無量壽經》云：「心常諦住度世之道」。

柔順忍重在慈悲。《無量壽經》云：「常懷慈忍」。

獲柔順忍者，內柔外順。《無量壽經》云：「亦以大悲心，利益諸群品。」

內柔者，慈悲心生。《無量壽經》云：「興大悲，愍有情。」

外順者，菩薩行顯。上順佛心，下順眾情。

上順佛心，應機施教。《無量壽經》云：「演慈辯，授法眼」；「常以法音，覺諸世間」；「善能分別眾生言語，開示顯化真實之際」；「為諸庶類，作不請之友」。上順之行乃法佈施。演說彌陀聞佛教法，乃當今末法最佳上順妙行。

下順眾生，廣度群萌。《華嚴經》云：「恆順眾生。」復云：「菩薩若能隨順眾生，則為隨順供養諸佛；若於眾生尊重承事，則為尊重承事如來；若令眾生生歡喜者，則令一切如來歡喜。」下順之行乃無畏佈施。《阿彌陀經》云：極樂世界「無有眾苦，但受諸樂。」《無量壽經》云：「欲拯群萌，惠以真實之利。」助眾生聞佛修行，往生極樂、永離眾苦，乃當今末法最佳下順妙行。

柔順忍境界通於耳根圓通法門進階成就境界。《楞嚴經》中，觀世音菩薩演說最詳：

內柔境界。菩薩云：「超越世出世間，十方圓明，獲二殊勝。一者，上合十方諸佛本妙覺心，與佛如來同一慈力。二者，下合十方一切六道眾生，與諸眾生同一悲仰。」菩薩悲智雙顯：「十方圓明」顯智慧；「獲二殊勝」顯慈悲。「慈」者，仰體佛心度眾之關懷；「悲」者，俯察眾生離苦之祈望。

外順境界。菩薩上順佛心度眾，示現三十二類應身說法施行教化；下順群情救苦，廣行十四種無畏佈施福備群生。三十二應、十四無畏諸項，詳見《楞嚴經》〈耳根圓通章〉。

### ▲ 無生法忍

無生法忍乃聞佛法門高階成就境界。獲是忍者，位列聖階。

無生法忍安住於諸法實相。《無量壽經》云：「得微妙法」；「於一切萬法隨意自在」。前列經文第九條曰：「得平等住」。法法平等，即諸法實相。「平等為佛」，「得平等住」，屬聖境。

獲無生法忍境界：「十方國土，皎然清淨；譬如琉璃，內懸明月。身心快然，妙圓平等，獲大安穩。一切如來密圓淨妙，皆現其中。是人即獲『無生法忍』。從是漸修，隨所發行，安立聖位。」（《楞嚴經》）

無生法忍屬聖境，見前「安立聖位」，復見前列《無量壽經》經文第九條曰：「清淨歡喜」，乃聖位菩薩境界。菩薩位階依證入境界不同而有三賢十聖之別。十住、十行、十迴向位菩薩稱為三賢；十地位菩薩稱為十聖。聖位菩薩也稱「菩薩摩訶薩」，義為「大菩薩」。菩薩證入初地，即得清淨歡喜，故初地稱「歡喜地」。是知，清淨歡喜乃初地以上諸聖位菩薩之通徵。清淨歡喜境界異於世俗之「高興」、「快樂」，而屬「愉悅」。為因生於定慧，故屬「禪悅」之高階境界。

獲無生法忍者乃高階聖位菩薩。前列《無量壽經》經文第九條曰：「證離生法」，即獲無生法忍；依《華嚴經》義，當屬八地以上菩薩。

獲無生法忍菩薩不退轉。前列《無量壽經》經文第九條曰：「現證不退轉」。《無量壽經》〈菩薩往生品〉分別菩薩為「不退菩薩」與「小行菩薩」。〈往生正因品〉云：「行菩薩道，得往生者，皆得阿惟越致」。「阿惟越致」義為「不退」，屬七地。菩薩證入八地，稱為「不動地」。「不動」，故不退轉。《楞嚴經》云：「一真如

心，名『不動地』。」

法忍顯慧性。思修開慧。無生法忍境界通於耳根圓通法門高階成就境界，即思修成就境界。《楞嚴經》中，文殊菩薩說思修成就境界：「性成無上道」。「性」者，見性，顯現如來藏妙真如性；「成無上道」，獲無生法忍。

### ▲ 頓漸有別

三種忍位修證，頓漸有別。前列《無量壽經》經文第九條，曰：菩薩應時獲一二三忍。「應時」者，頓入也，當屬高階上品三忍。中下階三忍須漸修遞進，次第證入。

成就頓、漸，據於根器。眾生、菩薩，遲速有別。菩薩聞佛聖號，受彌陀化，當下成就，「應時」獲三種忍，見前列《無量壽經》經文第九條。是為頓法。眾生必須往生彌陀淨土，壽命無量，於彼清淨佛國菩提道場，受佛法化，長時熏修，方能獲三種忍。是為漸法。《無量壽經》〈菩提道場品〉曰：眾生聞佛聖號，往生西方極樂淨土，於彼淨土，「睹菩提樹，聞聲、嗅香，嘗其果味，觸其光影，念樹功德，皆得六根清澈，無諸惱患。住不退轉，至成佛道。復由見彼樹故，獲三種忍：一、音響忍；二、柔順忍；三者、無生法忍。」

## 第三節 成就德能

### ▲ 四妙德能 不可思議

獲三種忍，即入不思議解脫境界，起不思議妙行，具不思議德能。《無量壽經》云：「安住一切功德法中。」

三種忍不思議德能與耳根圓通法門不可思議德能互通。《楞嚴經》〈耳根圓通章〉中，觀世音菩薩例舉四階不思議德能。

觀世音菩薩曰：「我又獲是圓通，修證無上道故，又能善獲四不思議無作妙德。」既獲圓通，已登聖位。聖位菩薩「忍力成就」，德能不可思議。

菩薩再曰：「一者：由我初獲妙妙聞心，心精遺聞，見、聞、覺、知不能分隔，成一圓融清淨寶覺；故我能現眾多妙容，能說無邊祕密神咒」；現無量首、臂、目；「或慈、或威，或定、或慧，救護眾生，得大自在」。此德能通於音響忍成就德能。《無量壽經》曰：「譬善幻師，現眾異相」；「得無生無滅諸三摩地及得一切陀羅尼門」；「超過世間諸所有法，心常諦住度世之道，於一切萬物隨意自在」。

菩薩復曰：「二者：由我聞（修）、思（修）」，脫出六塵，如聲度垣，不能為礙。故我妙能，現一一形，誦一一咒。其形、其咒，能以無畏施諸眾生。是故，十方微塵國土，皆名我為『施無畏者』。」此德能通於柔順忍成就德能。《無量壽經》曰：「具足德本」；「以諸法藥救療三苦」；「能救一切諸世間，生、老、病、死眾苦惱」。

菩薩又曰：「三者：由我修習本妙圓通清淨本根，所遊世界，皆令眾生捨身珍寶，求我哀愍。」此德能通於無生法忍成就德能。《無量壽經》云：「成熟菩薩無邊善根」；「通諸法性，達眾生相」。

菩薩末曰：「四者：我得佛心，證於究竟；能以珍寶種種，供養十方如來，傍及法界六道眾生。求妻得妻，求子得子，求三昧得三昧，求長壽得長壽，如是乃至求大涅槃得大涅槃。」此德能通於聞佛成佛之德能。《無量壽經》云：「成最正覺」；「悉獲諸佛無量功德」；「供養諸佛，開導群生」；「拯濟負荷，皆度彼岸」。

獲種種忍，則種種不思議德能必定顯現。反之，無彼德能，則未證其忍。未證言證，佛門大忌！

## 第四節 成就因果

### ▲ 證果四類 處眾不同

《無量壽經》說聞佛法門種種果德，諸多分別。依因地，眾生與

菩薩有別；依果地，十方與淨土有別。計其大略，粗分五類：

（一）眾生於十方世界聞佛，往生彌陀淨土成佛。前列《無量壽經》經文前五條，五類眾生聞佛皆得往生極樂。〈菩提道場品〉曰：「所有一切眾生，以及焰摩羅界三惡道中，來生我刹，受我法化，悉成阿耨多羅三藐三菩提。」「成阿耨多羅三藐三菩提」，義即成佛。

（二）眾生於十方世界聞佛，而於十方世界積德助道，成就殊勝道緣、法緣：「生尊貴家，諸根無缺，常修殊勝梵行」；「以清淨心，修菩薩行，諸天世人莫不致敬」，見前列《無量壽經》經文第六、七條。

（三）菩薩於十方世界聞佛，亦於十方世界得定、開慧，成就道業，乃至成佛：「獲一、二、三忍」；「現證不退轉」；「住三摩地，至於成佛」。見前列《無量壽經》經文第八、九條。

（四）十方菩薩往生彌陀淨土，不退成佛。《無量壽經》〈菩薩往生品〉中，佛說：此方世界眾多不退菩薩與小行菩薩，皆當往生極樂。他方世界亦復如是。復曰：「十方世界諸佛名號，及菩薩眾當往生者，但說其名，窮劫不盡。」

### ▲ 究竟果地 聞佛成佛

聞佛法門可證究竟佛果。《無量壽經》曰：「得授記法忍，成無上菩提」。經末，佛親授記曰：「皆當往生彼如來土，各於異方，次第成佛，同名『妙音如來』」。「妙音」者，因地耳根殊勝功行所證果德。

聞佛成佛。《無量壽經》說如來果地境界：「如來定慧，究暢無極」；「智慧聖明，不可思議」。

聞佛成佛境界通於耳根圓通法門修證成佛境界。《楞嚴經》中，文殊菩薩演說「金剛王如幻不思議佛母真三昧」，曰：「覺海性澄圓，圓澄覺元妙」。「澄」者，清淨聖潔；「圓」者，究竟圓滿，此讚如來藏妙真如性。「圓澄」言體，究竟圓滿清淨聖潔之佛心；「覺

元妙」言用，諸佛德能不可思議。

### ▲ 聞佛證果 五力為因

果證種種差別，皆由因地力用不同。彌陀淨土法門乃二力法門：聖力與自力。聖力中復含佛願、佛號、淨土諸功德力。自力中復含行者願力與業力。

#### （一）佛願加持

《無量壽經》〈發大誓願品〉中，阿彌陀佛因地以成佛大願聖力，加持此不可思議聞佛法門；眾生、菩薩方能獲得種種殊勝果德成就。縱有宿惡業力為礙，但能改惡從善，仰蒙佛願加持，亦得成就。見前列《無量壽經》經文第四條。是故，《無量壽經》云：「諸佛聖力」「不可思議」。

#### （二）聖號功德

十方菩薩、一切眾生，聞佛修行種種成就，首仗佛號功德之力。聞佛三昧名曰：「如幻聞熏聞修金剛三昧」。「名以召德」。「聞熏」即行者受彌陀佛號功德之熏。「聞熏」者，佛力；「聞修」者，自力。「聞熏」先於「聞修」，表彌陀佛號聖力功德遠超行者自力道業功德。

#### （三）淨土法化

極樂眾生皆得成佛，延壽命於無量，化三祇為當世，全仗彌陀淨土法化之力。《無量壽經》中，佛說：「國中聲聞、天人無數，壽命亦皆無量。」復曰：「所有一切眾生，以及焰摩羅界三惡道中，來生我刹，受我法化，悉成阿耨多羅三藐三菩提。」是故，《無量壽經》云：「諸佛世界亦不可思議」。

#### （四）行者願力

聞佛成就不同，行者願力乃關鍵因由。

眾生願力不同而成就不同。往生極樂淨土者，必經發願、修願、申願。前列《無量壽經》經文前五條曰：「願生我國」、「厭患女身」等。而未發願、修願、申願者，雖同聞佛聖號，而不得往生淨

土。見前列《無量壽經》經文第六、七條。

菩薩願力不同而成就不同。或有菩薩發願於十方世界聞佛，於十方世界成就者，見前列《無量壽經》經文第八、九條；或有菩薩發願往生彌陀淨土修行成就者，「不但我刹諸菩薩等往生彼國，他方佛土亦復如是」（《無量壽經》〈菩薩往生品〉）。眾菩薩各如所願而得種種成就。

### （五）行者業力

聞佛成就不同，行者業力乃重要因由。

菩薩道業業力不同，位階等差，聞佛成就乃有定、慧之別。前列《無量壽經》經文第八條，菩薩「住三摩地」，屬定成就；第九條，菩薩「證離生法」，屬慧成就。

眾生業力不同而成就不同。十方眾生欲生極樂者，皆須依教修學，增上道業業力，精勤聞佛聖號，發菩提心；增上善業業力，植眾德本等，見前列《無量壽經》經文前五條。善業道業業力具足者，方得往生。是故，《阿彌陀經》云：「不可以少善根、福德、因緣，得生彼國。」或有眾生宿惡深重，「五逆、誹謗正法」，不知悔改，新業績增，求生極樂而不可得，見前列《無量壽經》經文第一條。

聞佛行者欲求成就，應須：一者、信仗聖力，仰祈加持；二者、增上願力，竭誠發願，力行修願，勤於申願，求生極樂；三者、增上業力，精勤聞佛，植眾德本，專意銳進。

信、願、行三者具足，資糧豐饒，必生極樂，成佛可期。如是方謂「聞佛成佛」。

# 聞佛要典

## 目錄

〔一〕《聞佛要典摘編》 .....	40
《佛說法運三時輯要》 .....	54
附：《法運與論爭》 .....	69
〔二〕聞佛要典簡釋	
一、《無量壽經》	
《無量壽經》指要 .....	72
夏會本修訂版《無量壽經》 .....	77
《無量壽經》科判 .....	113
二、《楞嚴經》	
《楞嚴》指要 .....	115
《楞嚴經》科判 .....	129
三、《阿彌陀經》	
《阿彌陀經》說聞佛法門 .....	130
《阿彌陀經》科會 .....	131

## 《無量壽經》節選

### ▲《佛說無量壽莊嚴清淨平等覺經》夏會本修訂版

「我作佛時，十方眾生聞我名號，至心信樂，所有善根心心迴向，願生我國，乃至十念。若不生者，不取正覺。唯除五逆、誹謗正法。

「我作佛時，所有十方無量無邊無數世界一切眾生，聞吾名號，發菩提心，種諸善根，隨意求生，諸佛剎土，無不得生，悉皆令得阿耨多羅三藐三菩提。若不爾者，不取正覺。

「我作佛時，所有眾生，求生我剎，念吾名號，發志誠心，堅固不退。一心念我，晝夜不斷。彼命終時，我與諸菩薩眾，迎現其前，經須臾間，即生我剎，作阿惟越致菩薩。若不爾者，不取正覺。

「我作佛時，十方眾生聞我名號，繫念我國。發菩提心，堅固不退。植眾德本，至心迴向，欲生極樂，無不遂者。若有宿惡，聞我名字，即自悔過，為道作善，便持經戒，願生我剎。命終不復更三惡道，即生我國。若不爾者，不取正覺。

「我作佛時，國無婦女。若有女人，聞我名字，得清淨信，發菩提心，厭患女身，願生我國。命終即化男子，來我剎土。十方世界諸眾生類生我國者，皆於七寶池蓮華中化生。若不爾者，不取正覺。

「我作佛時，十方眾生聞我名字，歡喜信樂，禮拜歸命。以清淨心，修菩薩行。諸天世人莫不致敬。若聞我名，壽終之後，生尊貴家，諸根無缺，常修殊勝梵行。若不爾者，不取正覺。

「我作佛時，十方佛剎諸菩薩眾聞我名已，皆悉逮得清淨、解脫、普等三昧、諸深總持、住三摩地，至於成佛。定中常供無量無邊一切諸佛，不失定意。若不爾者，不取正覺。

「我作佛時，他方世界諸菩薩眾，聞我名者，證離生法，獲陀羅尼。清淨歡喜，得平等住，修菩薩行，具足德本。應時不獲一二三

忍，於諸佛法不能現證不退轉者，不取正覺。」

▲ 後漢·支婁迦讖譯《佛說無量清淨平等覺經》

十七、我作佛時，令我名聞八方上下，無數佛國。諸佛各於弟子眾中，歎我功德、國土之善。諸天人民、蠕動之類，聞我名字，皆悉踊躍來生我國。不爾者，我不作佛。

十八、我作佛時，諸佛國人民有作菩薩道者，常念我淨潔心。壽終時，我與不可計比丘眾，飛行迎之，共在前立。即還生我國，作阿惟越致。不爾者，我不作佛。

十九、我作佛時，他方佛國人民前世為惡，聞我名字及正為道，欲來生我國。壽終皆令不復更三惡道，則生我國，在心所願。不爾者，我不作佛。

▲ 吳·支謙譯《佛說阿彌陀三耶三佛薩樓佛檀過度人道經》

第四願、使某作佛時，令我名字，皆聞八方上下，無央數佛國。皆令諸佛，各於比丘僧大坐中，說我功德國土之善。諸天人民、蜎飛、蠕動之類，聞我名字，莫不慈心歡喜踊躍者，皆令來生我國。得是願，乃作佛，不得是願，終不作佛。

第五願、使某作佛時，令八方上下，諸無央數天、人民，及蜎飛、蠕動之類，若前世作惡，聞我名字，欲來生我國者，即便反政自悔過，為道作善，便持經戒，願欲生我國不斷絕。壽終皆令不復泥犁、禽獸、薜荔，即生我國。在心所願。得是願，乃作佛。不得是願，終不作佛。

第六願、使某作佛時，令八方上下，無央數佛國諸天人民，若善男子、善女人，欲來生我國，用我故益作善；若分檀布施、遶塔燒香、散花然燈、懸雜繒綵、飯食沙門、起塔作寺、斷愛欲，齋戒清淨；一心念我，晝夜一日不斷絕，皆令來生我國作菩薩。得是願乃作佛。不得是願終不作佛。

第七願、使某作佛時，令八方上下，無央數佛國，諸天人民，若善男子、善女人，有作菩薩道，奉行六波羅蜜經；若作沙門，不毀經

戒，斷愛欲，齋戒清淨，一心念欲生我國，晝夜不斷絕。若其人壽欲終時，我即與諸菩薩阿羅漢，共飛行迎之。即來生我國，則作阿惟越致菩薩，智慧勇猛。得是願，乃作佛。不得是願，終不作佛。

▲ 曹魏·康僧鎧譯《佛說無量壽經》

設我得佛，十方眾生至心信樂，欲生我國，乃至十念。若不生者，不取正覺。唯除五逆、誹謗正法。

設我得佛，十方眾生發菩提心，修諸功德；至心發願，欲生我國。臨壽終時，假令不與大眾圍遶現其人前者，不取正覺。

設我得佛，十方眾生聞我名號，係念我國，殖諸德本；至心迴向，欲生我國。不果遂者，不取正覺。

設我得佛，十方無量不可思議諸佛世界眾生之類，聞我名字，不得菩薩無生法忍、諸深總持者。不取正覺。

設我得佛，十方無量不可思議諸佛世界，其有女人，聞我名字，歡喜信樂，發菩提心，厭惡女身；壽終之後，復為女像者，不取正覺。

設我得佛，十方無量不可思議諸佛世界諸菩薩眾，聞我名字，壽終之後，常修梵行，至成佛道。若不爾者，不取正覺。

設我得佛，十方無量不可思議諸佛世界諸天人民，聞我名字，五體投地，稽首作禮，歡喜信樂，修菩薩行。諸天世人莫不致敬。若不爾者，不取正覺。

設我得佛，他方國土諸菩薩眾，聞我名字，至于得佛，諸根缺陋不具足者，不取正覺。

設我得佛，他方國土諸菩薩眾，聞我名字，皆悉速得清淨解脫三昧，住是三昧；一發意頃，供養無量不可思議諸佛世尊，而不失定意。若不爾者，不取正覺。

設我得佛，他方國土諸菩薩眾，聞我名字，壽終之後，生尊貴家。若不爾者，不取正覺。

設我得佛，他方國土諸菩薩眾，聞我名字，歡喜踊躍，修菩薩行，具足德本。若不爾者，不取正覺。

設我得佛，他方國土諸菩薩眾，聞我名字，皆悉逮得普等三昧；住是三昧，至于成佛；常見無量不可思議一切如來。若不爾者，不取正覺。

設我得佛，他方國土諸菩薩眾，聞我名字，不即得至不退轉者，不取正覺。

設我得佛，他方國土諸菩薩眾，聞我名字，不即得至第一、第二、第三法忍，於諸佛法不能即得不退轉者，不取正覺。

#### ▲ 唐·菩提流支譯《大寶積經無量壽如來會》

若我證得無上覺時，餘佛剎中諸有情類，聞我名已，所有善根，心心迴向，願生我國，乃至十念。若不生者，不取菩提。唯除造無間惡業、誹謗正法及諸聖人。

若我成佛，於他剎土，有諸眾生發菩提心，及於我所起清淨念；復以善根迴向願生極樂。彼人臨命終時，我與諸比丘眾，現其人前。若不爾者，不取正覺。

若我成佛，無量國中所有眾生，聞說我名，以己善根迴向極樂。若不生者，不取菩提。

若我成佛，無量不可思議無等界諸佛剎中菩薩之輩，聞我名已，若不證得離生、獲陀羅尼者，不取正覺。

若我成佛，周遍無數不可思議無有等量諸佛國中所有女人，聞我名已，得清淨信，發菩提心，厭患女身。若於來世不捨女人身者，不取菩提。

若我成佛，無量無數不可思議無等佛剎菩薩之眾，聞我名已，得離生法。若不修行殊勝梵行，乃至到於大菩提者，不取正覺。

若我成佛，周遍十方無有等量諸佛剎中所有菩薩，聞我名已，五體投地，以清淨心修菩薩行。若諸天人不禮敬者，不取正覺。

若我成佛，餘佛剎中所有眾生，聞我名已，乃至菩提，諸根有關、德用非廣者，不取菩提。

若我成佛，餘佛剎中所有菩薩，聞我名已，若不皆善分別勝三摩地名字、語言；菩薩住彼三摩地中，於一剎那言說之頃，不能供養無

量無數不可思議無等諸佛，又不現證六三摩地者，不取正覺。

若我成佛，餘佛土中有諸菩薩，聞我名已。壽終之後，若不得生豪貴家者，不取正覺。

若我成佛，餘佛剎中所有菩薩，聞我名已，若不應時修菩薩行，清淨歡喜，得平等住，具諸善根，不取正覺。

若我成佛，他方菩薩聞我名已，皆得平等三摩地門；住是定中，常供無量無等諸佛；乃至菩提，終不退轉。若不爾者，不取正覺。

若我證得無上菩提，餘佛剎中所有菩薩，聞我名已，於阿耨多羅三藐三菩提有退轉者，不取正覺。

若我成佛，餘佛國中所有菩薩，若聞我名，應時不獲一二三忍；於諸佛法不能現證不退轉者，不取菩提。

#### ▲ 宋·法賢譯《佛說大乘無量壽莊嚴經》

世尊！我得菩提，成正覺已。所有眾生求生我剎，念吾名號，發志誠心，堅固不退。彼命終時，我令無數苾芻現前圍繞，來迎彼人；經須臾間，得生我剎，悉皆令得阿耨多羅三藐三菩提。

世尊！我得菩提，成正覺已。所有十方無量無邊無數世界一切眾生，聞吾名號，發菩提心，種諸善根，隨意求生諸佛剎土，無不得生，悉皆令得阿耨多羅三藐三菩提。

世尊！我得菩提，成正覺已。所有十方無量無邊無數世界一切女人，若有厭離女身者，聞我名號，發清淨心，歸依頂禮。彼人命終，即生我剎，成男子身，悉皆令得阿耨多羅三藐三菩提。

世尊！我得菩提，成正覺已。所有十方無量無邊無數佛剎聲聞緣覺，聞我名號，修持淨戒，堅固不退，速坐道場，成就阿耨多羅三藐三菩提。

世尊！我得菩提，成正覺已。所有十方無量無邊不可思議無等佛剎一切菩薩，聞我名號，五體投地，禮拜歸命。復得天上、人間一切有情，尊重、恭敬、親近、侍奉，增益功德，成就阿耨多羅三藐三菩提。

世尊！我得菩提，成正覺已。所有一切眾生，聞我名號，永離熱

惱，心得清涼，行正信行，得生我剎；坐寶樹下，證無生忍，成就阿耨多羅三藐三菩提。

世尊！我得菩提，成正覺已。所有十方一切佛剎諸菩薩眾，聞我名號，應時證得寂靜三摩地。住是定已，於一念中，得見無量無邊不可思議諸佛世尊；承事供養，成就阿耨多羅三藐三菩提。

世尊！我得菩提，成正覺已。所有十方一切佛剎聲聞菩薩，聞我名號，證無生忍，成就一切平等善根。住無功用，離加行故，不久令得阿耨多羅三藐三菩提。

世尊！我得菩提，成正覺已。所有十方一切佛剎諸菩薩眾，聞我名已，生希有心。是人即得普遍菩薩三摩地。住此定已，於一念中，得至無量無數不可思議諸佛剎中，恭敬、尊重、供養諸佛，成就阿耨多羅三藐三菩提。

世尊！我得菩提，成正覺已。所有十方一切佛剎聞我名者，應時即得初忍、二忍、乃至無生法忍，成就阿耨多羅三藐三菩提。

爾時，世尊告觀自在菩薩言：「汝今諦聽！吾為汝說。彼佛如來於過去無量無邊阿僧祇劫前，為菩薩時，發大誓言：『我於未來成正覺時，若有十方世界無量眾生聞我名號，或頂禮憶念，或稱讚歸依，或香花供養等。如是眾生速生我剎。見此光明，即得解脫。若諸菩薩見此光明，即得受記，證不退位；手持香花及諸供具，往十方界無邊淨剎，供養諸佛而作佛事，增益功德。經須臾間，復還本土，受諸快樂。是故光明而入佛頂。』」

## 《楞嚴經》節選

### 〈觀音章〉

爾時，觀世音菩薩即從座起，頂禮佛足，而白佛言：「世尊！憶念我昔無數恆河沙劫，於時有佛出現於世，名『觀世音』。我於彼佛發菩提心，彼佛教我：『從聞、思修，入三摩地。』初於聞中，入流亡所；所入既寂，動、靜二相了然不生。如是漸增，聞所聞盡；盡聞不住，覺所覺空；空覺極圓，空所空滅；生滅既滅，寂滅現前。忽然

超越世出世間，十方圓明，獲二殊勝。一者，上合十方諸佛本妙覺心，與佛如來同一慈力。二者，下合十方一切六道眾生，與諸眾生同一悲仰。

「世尊！由我供養觀音如來，蒙彼如來授我『如幻聞熏聞修金剛三昧』。與佛如來同慈力故，令我身成三十二應，入諸國土。世尊！若諸菩薩，入三摩地，進修無漏，勝解現圓；我現佛身而為說法，令其解脫。若諸有學，寂靜妙明，勝妙現圓；我於彼前，現獨覺身，而為說法，令其解脫。若諸有學，斷十二緣，緣斷勝性，勝妙現圓；我於彼前，現緣覺身，而為說法，令其解脫。若諸有學，得四諦空，修道人滅，勝性現圓；我於彼前，現聲聞身，而為說法，令其解脫。若諸眾生，欲心明悟，不犯欲塵，欲身清淨；我於彼前，現梵王身，而為說法，令其解脫。若諸眾生，欲為天主，統領諸天；我於彼前，現帝釋身，而為說法，令其成就。若諸眾生，欲身自在，遊行十方；我於彼前，現自在天身，而為說法，令其成就。若諸眾生，欲身自在，飛行虛空；我於彼前，現大自在天身，而為說法，令其成就。若諸眾生，愛統鬼神，救護國土；我於彼前，現天大將軍身，而為說法，令其成就。若諸眾生，愛統世界，保護眾生；我於彼前，現四天王身，而為說法，令其成就。若諸眾生，愛生天宮，驅使鬼神；我於彼前，現四天王國太子身，而為說法，令其成就。若諸眾生，樂為人王；我於彼前，現人王身，而為說法，令其成就。若諸眾生，愛主族姓，世間推讓；我於彼前，現長者身，而為說法，令其成就。若諸眾生，愛談名言，清淨自居；我於彼前，現居士身，而為說法，令其成就。若諸眾生，愛治國土，剖斷邦邑；我於彼前，現宰官身，而為說法，令其成就。若諸眾生，愛諸數術，攝衛自居；我於彼前，現婆羅門身，而為說法，令其成就。若有男子，好學出家，持諸戒律；我於彼前，現比丘身，而為說法，令其成就。若有女人，好學出家，持諸禁戒；我於彼前，現比丘尼身，而為說法，令其成就。若有男子，樂持五戒；我於彼前，現優婆塞身，而為說法，令其成就。若有女子，五戒自居；我於彼前，現優婆夷身，而為說法，令其成就。若有女人，內

政立身，以修家國；我於彼前，現女主身，及國夫人，命婦大家，而為說法，令其成就。若有眾生，不壞男根；我於彼前，現童男身，而為說法，令其成就。若有處女，愛樂處身，不求侵暴；我於彼前，現童女身，而為說法，令其成就。若有諸天，樂出天倫；我現天身，而為說法，令其成就。若有諸龍，樂出龍倫；我現龍身，而為說法，令其成就。若有藥叉，樂度本倫；我於彼前，現藥叉身，而為說法，令其成就。若乾闥婆，樂脫其倫；我於彼前，現乾闥婆身，而為說法，令其成就。若阿修羅，樂脫其倫；我於彼前，現阿修羅身，而為說法，令其成就。若緊那羅，樂脫其倫；我於彼前，現緊那羅身，而為說法，令其成就。若摩呼羅伽，樂脫其倫；我於彼前，現摩呼羅伽身，而為說法，令其成就。若諸眾生，樂人修人；我現人身，而為說法，令其成就。若諸非人，有形、無形，有想、無想，樂度其倫；我於彼前，皆現其身，而為說法，令其成就。是名『妙淨三十二應入國土身』，皆以三昧聞熏聞修，無作妙力自在成就。

「世尊！我復以此『聞熏聞修金剛三昧』無作妙力，與諸十方、三世、六道一切眾生，同悲仰故；令諸眾生，於我身心，獲十四種無畏功德。一者，由我不自觀音，以觀觀者，令彼十方苦惱眾生，觀其音聲，即得解脫。二者：知見旋復，令諸眾生設入大火，火不能燒。三者：觀聽旋復，令諸眾生大水所漂，水不能溺。四者：斷滅妄想，心無殺害，令諸眾生入諸鬼國，鬼不能害。五者：熏聞成聞，六根銷復，同於聲聽；能令眾生臨當被害，刀段段壞，使其兵戈猶如割水，亦如吹光，性無搖動。六者：聞熏精明，明遍法界，則諸幽暗性，不能全；能令眾生、藥叉、羅刹、鳩槃荼鬼及毗舍遮富單那等，雖近其傍，目不能視。七者：音性圓銷，觀聽返入，離諸塵妄；能令眾生，禁繫枷鎖所不能著。八者：滅音圓聞，遍生慈力；能令眾生經過險路，賊不能劫。九者：熏聞離塵，色所不劫；能令一切多嬌眾生，遠離貪欲。十者：純音無塵，根境圓融，無對、所對；能令一切忿恨眾生，離諸瞋恚。十一者：銷塵旋明，法界身心，猶如琉璃，朗徹無礙；能令一切昏鈍性，障諸阿顛迦，永離癡暗。十二者：融形復聞，

不動道場，涉入世間，不壞世界，能遍十方，供養微塵諸佛如來，各各佛邊為法王子；能令法界無子眾生欲求男者，誕生福德、智慧之男。十三者：六根圓通，明照無二，含十方界，立大圓鏡，空如來藏，承順十方微塵如來祕密法門，受領無失；能令法界無子眾生欲求女者，誕生端正、福德、柔順、眾人愛敬、有相之女。十四者：此三千大千世界，百億日月，現住世間諸法王子，有六十二恆河沙數，修法垂範，教化眾生；隨順眾生方便智慧，各各不同；由我所得圓通本根，發妙耳門，然後身心微妙含容周遍法界；能令眾生持我名號，與彼共持六十二恆河沙諸法王子，二人福德正等無異。世尊！我一名號，與彼眾多名號無異，由我修習，得真圓通。是名『十四施無畏力』，福備眾生。

「世尊！我又獲是圓通，修證無上道故，又能善獲四不思議無作妙德。一者：由我初獲妙妙聞心，心精遺聞，見聞覺知不能分隔，成一圓融清淨寶覺；故我能現眾多妙容，能說無邊祕密神咒。其中或現一首、三首、五首、七首、九首、十一首，如是乃至一百八首、千首、萬首、八萬四千燦迦羅首；二臂、四臂、六臂、八臂、十臂、十二臂、十四、十六、十八、二十、至二十四，如是乃至一百八臂、千臂、萬臂、八萬四千母陀羅臂；二目、三目、四目、九目，如是乃至一百八目、千目、萬目、八萬四千清淨寶目；或慈、或威，或定、或慧，救護眾生，得大自在。二者：由我聞、思，脫出六塵，如聲度垣，不能為礙；故我妙能，現一一形，誦一一咒，其形、其咒，能以無畏施諸眾生；是故十方微塵國土，皆名我為『施無畏者』。三者：由我修習本妙圓通清淨本根，所遊世界，皆令眾生捨身珍寶，求我哀愍。四者：我得佛心，證於究竟；能以珍寶種種，供養十方如來，傍及法界六道眾生；求妻得妻，求子得子，求三昧得三昧，求長壽得長壽，如是乃至求大涅槃得大涅槃。

「佛問圓通，我從耳門圓照三昧，緣心自在，因入流相，得三摩提，成就菩提，斯為第一。世尊！彼佛如來，歎我善得圓通法門，於大會中，授記我為『觀世音』號，由我觀聽十方圓明，故『觀音』名

遍十方界。」

### 〈文殊章〉

爾時，世尊於師子座，從其五體同放寶光，遠灌十方微塵如來及法王子、諸菩薩頂。彼諸如來，亦於五體同放寶光，從微塵方，來灌佛頂，并灌會中諸大菩薩及阿羅漢。林木池沼，皆演法音，交光相羅，如寶絲網。是諸大眾得未曾有，一切普獲『金剛三昧』。即時，天雨百寶蓮華，青、黃、赤、白，間錯紛糅。十方虛空，成七寶色。此娑婆界大地山河，俱時不現。唯見十方微塵國土，合成一界。梵唄詠歌，自然敷奏。

於是，如來告文殊師利法王子：「汝今觀此二十五無學諸大菩薩及阿羅漢，各說最初成道方便，皆言修習真實圓通。彼等修行，實無優劣、前後差別。我今欲令阿難開悟二十五行，誰當其根？兼我滅後，此界眾生入菩薩乘，求無上道，何方便門，得易成就？」

文殊師利法王子奉佛慈旨，即從座起，頂禮佛足，承佛威神，說偈對佛：

「覺海性澄圓，圓澄覺元妙。  
元明照生所，所立照性亡。  
迷妄有虛空，依空立世界，  
想澄成國土，知覺乃眾生。  
空生大覺中，如海一漚發，  
有漏微塵國，皆依空所生。  
漚滅空本無，況復諸三有。  
歸元性無二，方便有多門。  
聖性無不通，順逆皆方便。  
初心入三昧，遲速不同倫。  
色想結成塵，精了不能徹；  
如何不明徹，於是獲圓通。  
音聲雜語言，但伊名句味；  
一非含一切，云何獲圓通？」

香以合中知，離則元無有；  
不恆其所覺，云何獲圓通？  
味性非本然，要以味時有；  
其覺不恆一，云何獲圓通？  
觸以所觸明，無所不明觸；  
合離性非定，云何獲圓通？  
法稱為內塵，憑塵必有所；  
能所非遍涉，云何獲圓通？  
見性雖洞然，明前不明後；  
四維虧一半，云何獲圓通？  
鼻息出入通，現前無交氣；  
支離匪涉入，云何獲圓通？  
舌非入無端，因味生覺了；  
味亡了無有，云何獲圓通？  
身與所觸同，各非圓覺觀；  
涯量不冥會，云何獲圓通？  
知根雜亂思，湛了終無見；  
想念不可脫，云何獲圓通？  
識見雜三和，詰本稱非相；  
自體先無定，云何獲圓通？  
心聞洞十方，生於大因力；  
初心不能入，云何獲圓通？  
鼻想本權機，祇令攝心住；  
住成心所住，云何獲圓通？  
說法弄音文，開悟先成者；  
名句非無漏，云何獲圓通？  
持犯但束身，非身無所束；  
元非遍一切，云何獲圓通？  
神通本宿因，何關法分別；

念緣非離物，云何獲圓通？  
若以地性觀，堅礙非通達；  
有為非聖性，云何獲圓通？  
若以水性觀，想念非真實；  
如如非覺觀，云何獲圓通？  
若以火性觀，厭有非真離；  
非初心方便，云何獲圓通？  
若以風性觀，動寂非無對；  
對非無上覺，云何獲圓通？  
若以空性觀，昏鈍先非覺；  
無覺異菩提，云何獲圓通？  
若以識性觀，觀識非常住；  
存心乃虛妄，云何獲圓通？  
諸行是無常，念性元生滅；  
因果今殊感，云何獲圓通？  
我今白世尊：佛出娑婆界，  
此方真教體，清淨在音聞；  
欲取三摩提，實以聞中入。  
離苦得解脫，良哉觀世音；  
於恆沙劫中，入微塵佛國；  
得大自在力，無畏施眾生。  
妙音、觀世音、梵音、海潮音，  
救世悉安寧，出世獲常住。  
我今啟如來，如觀音所說，  
譬如人靜居，十方俱擊鼓，  
十處一時聞，此則圓真實。  
目非觀障外，口鼻亦復然，  
身以合方知，心念紛無緒；  
隔垣聽音響，遐邇俱可聞，

五根所不齊，是則通真實。  
音聲性動靜，聞中為有無；  
無聲號無聞，非實聞無性；  
聲無既無滅，聲有亦非生；  
生滅二圓離，是則常真實。  
縱令在夢想，不為不思無，  
覺觀出思惟，身心不能及。  
今此娑婆國，聲論得宣明，  
眾生迷本聞，循聲故流轉。  
阿難縱強記，不免落邪思，  
豈非隨所淪，旋流獲無妄？  
阿難汝諦聽：我承佛威力，  
宣說金剛王如幻不思議佛母真三昧。  
汝聞微塵佛，一切秘密門；  
欲漏不先除，畜聞成過誤。  
將聞持佛佛，何不自聞聞？  
聞非自然生，因聲有名字；  
旋聞與聲脫，能脫欲誰名？  
一根既返源，六根成解脫。  
見聞如幻翳，三界若空華，  
聞復翳根除，塵銷覺圓淨。  
淨極光通達，寂照含虛空；  
卻來觀世間，猶如夢中事。  
摩登伽在夢，誰能留汝形？  
如世巧幻師，幻作諸男女，  
雖見諸根動，要以一機抽；  
息機歸寂然，諸幻成無性。  
六根亦如是，元依一精明，分成六和合；  
一處成休復，六用皆不成；

塵垢應念消，成圓明淨妙。  
餘塵尚諸學，明極即如來。  
大眾及阿難：  
旋汝倒聞機，反聞聞自性，  
性成無上道，圓通實如是。  
此是微塵佛，一路涅槃門。  
過去諸如來，斯門已成就；  
現在諸菩薩，今各入圓明；  
未來修學人，當依如是法；  
我亦從中證，非唯觀世音。  
誠如佛世尊，詢我諸方便，  
以救諸末劫，求出世間人。  
成就涅槃心，觀世音為最；  
自餘諸方便，皆是佛威神。  
即事捨塵勞，非是長修學，  
淺深同說法。  
頂禮如來藏，無漏不思議。  
願加被未來，於此門無惑，方便易成就。  
堪以教阿難，及末劫沉淪，  
但以此根修，圓通超餘者，真實心如是。」

## 《阿彌陀經》節選

「舍利弗！於意云何？何故名為《一切諸佛所護念經》？舍利子！若有善男子、善女人聞是經受持者及聞諸佛名者，是諸善男子、善女人皆為一切諸佛之所護念，皆得不退轉於阿耨多羅三藐三菩提。是故，舍利弗！汝等皆當信受我語，及諸佛所說。」

# 佛說法運三時輯要

## 序

佛法重時。時之顯者，見於佛典開卷曰「一時」；時之要者，關乎法運、眾機。故治佛學者，必先究時；修教史者，必先察時；弘佛法者，必先明時。

時關法運，眾生根性。古德稱三時：「正法時期，戒法成就；像法時期，禪法成就；末法時期，淨土成就。」淨土行法亦別三時。正法觀佛；像法念佛；末法聞佛。

法運當興，必見諸佛出世；教法當弘，必有菩薩開演；典籍當顯，必得護法流通。循諸聖蹟，驗諸眾機，檢諸典籍，可知當今已入釋迦如來末法法運。釋迦末法教法必將大興。此所以「明時」者也。

《楞嚴經》云：「誠如佛世尊，詢我諸方便；以救諸末劫，求出世間人，觀世音為最。」彌陀淨土法門，末法法船之要津也；耳根聞佛聖號，末法淨土之資糧也，故曰：「末法津糧」。輯諸典籍聖言，跡踪先賢軌範，乃成是編。

課題祖

# 目 錄

(一) 佛稱正像末 .....	56
(二) 諸佛通法 .....	58
(三) 釋迦法運 .....	60
1 法運時程諸說	
2 正法時：戒為大師	
3 正法壞：少樂習戒	
4 像法法門：禪定智慧	
5 護持像法：求禪定智慧	
6 末法漢地：濁惡	
7 末法度眾：淨土法門	
8 末劫淨土法門行法：念佛 聞佛	
9 末劫成就：觀音法門 聞佛名字 觀自性	
(四) 法運嬗變特徵 .....	66
1 正像轉變	
2 像法轉時	
(五) 法滅 .....	67
附：《法運與論爭》 .....	69

# 佛說法運三時輯要

## (一) 佛稱正像末

◆ 《大乘同性經》卷下：

佛言：「善丈夫！猶若今日躡步捷如來、魔恐怖如來、大慈意如來，有如是等一切彼如來，穢濁世中，現成佛者、當成佛者，如來顯現從兜率下，乃至住持一切正法、一切像法、一切末法。善丈夫！汝今當知，如是化事皆是應身。」

◆ 《佛說十往生阿彌陀佛國經》：

「若有比丘、比丘尼、優婆塞、優婆夷、善男子、善女人，正信是經，愛樂是經，勸導眾生說者、聽者，悉皆往生阿彌陀佛國。是故，有信者，我滅後，受持是經法，正法、像法、末法，濁惡世中，廣宣流布。是人即為真我弟子，現身即得阿耨多羅三藐三菩提。」

◇ 附：《十往生經真偽決疑》（寂譽靈哲欽）

難云：「《開元釋教錄》十八卷，此經入偽妄亂真錄。然者非正經，何祖師(道綽、善導)引用之耶？」答：「雖屬疑偽，文義不違，引證何非？況入偽目，偏在昇師古來碩德未必雷同。(觀念法門記下可見)例如：天台引《法行經》妙勝定等輔行記六之二云：準諸目錄，皆推此經(《法行經》)以為疑偽。文義既正，或是失譯。乃至今家所引《像法決疑經》、《妙勝定》等意亦如是。如《涅槃》後分本，在偽目。至大唐刊定，始入正經。豈以時人未決，便推入偽！大師親證，位在初依，不應錯用。(已上)同補註十四云：安法師《二教論》云：《法行經》者，無有人翻。雖入疑科，未傷弘旨。《像法決疑經》一卷(乃至)《妙勝定經》等，舊錄或謂疑偽。至唐已來，或刊為正。斯皆以人情自去取耳！又復，諸師撰錄，存沒去取各自不同。皆此之類也矣。」

◆ 《大梵天王問佛決疑經》〈拈花品第二〉：

佛言：「今日有獨摩訶迦葉，傳真道象。我滅度後，至於末法五濁惡世後五百歲，不絕佛道。唯在迦葉，獨付傳中。是故名曰：唯是真實。」大梵王言：「如來先說後五百歲。其五百歲是何時也？佛言「夫其五百歲者，我滅度後，佛法住世：正法八百年，像法千二百，末法五千五百年。已去正法、像法、末法後所有年，五百歲是也。」大梵王言：「正法、像法、末法，及後五百歲者，是謂何世何國然也？」佛言：「其世是人間世，而非天世及龍世也。亦復，其國是閻浮中，隨機諸國，非必一國。所以者何？天世、龍世，是聖者世，而無年限。但有人世，上清下濁，上盛下衰，是故有限。亦復，國國時改機變，或有天護，或有聖護；或無天護，或無聖護；或有神護，或有仙護；或無神護，或無仙護。人機無量，國隨人機。是故，非必一國然也。」大梵王白言：「世尊如是。如佛所說，國機不同，或有有緣，或有無緣；或有護安，或有護難；茲興彼廢，茲廢彼興。佛法東漸後五百歲，留法不絕，利益眾生。」

◆ 《占察善惡業報經》卷上

如是我聞。一時，婆伽婆一切智人，在王舍城耆闍崛山中，以神通力，示廣博嚴淨無礙道場，與無量無邊諸大眾俱，演說甚深根聚法門。

爾時，會中有一菩薩名堅淨信，從坐而起，整衣服，偏袒右肩，合掌白佛言：「我今於此眾中，欲有所問，諮請世尊，願垂聽許。」

佛言：「善男子！隨汝所問，便可說之。」

堅淨信菩薩言：「如佛先說：『若我去世，正法滅後，像法向盡，及入末世。如是之時，眾生福薄，多諸衰惱，國土數亂，災害頻起，種種厄難，怖懼逼擾。我諸弟子失其善念，唯長貪、瞋、嫉妬、我慢。設有像似行善法者，但求世間利養名稱，以之為主，不能專心修出要法。爾時眾生覩世災亂，心常怯弱，憂畏己身及諸親屬，不得衣食充養軀命。以如此等眾多障礙因緣故，於佛法中鈍根少信，得道者

極少。乃至漸漸於三乘中，信心成就者亦復甚尠。所有修學世間禪定，發諸通業，自知宿命者，次轉無有。如是於後，入末法中，經久得道、獲信、禪定、通業等一切全無。』我今為此未來惡世，像法向盡及末法中，有微少善根者，請問如來。設何方便，開化示導，令生信心，得除衰惱。以彼眾生遭值惡時，多障礙故，退其善心。於世間、出世間因果法中，數起疑惑，不能堅心專求善法。如是眾生可愍可救。世尊大慈，一切種智！願興方便而曉諭之。令離疑網，除諸障礙，信得增長。隨於何乘，速獲不退。」

## （二）諸佛通法

◆ 《佛本行集經》（卷四）佛說：

「阿難！然燈佛多陀阿伽度阿羅呵三藐三佛陀，壽命八百四千萬億歲，住世利益諸世間故（尼沙塞師如是說。迦葉遺師復言：然燈如來壽命一劫，住世及聲聞眾利益諸世間故）。

「阿難！一切勝如來，住世八萬億歲，利益一切諸世間故（尼沙塞師如是說。迦葉遺師復言：一切勝如來住世一劫，利益世間故）。

「蓮華上佛住世八萬歲，為利益故。

最上行佛住世八萬歲，為利益故。

上名稱佛住世六萬歲，為利益故。

釋迦牟尼佛住世八萬歲，為利益故。

帝沙如來住世六萬歲，為利益故。

弗沙如來住世五萬歲，為利益故。

見真義佛住世四萬歲，為利益故。

毘婆尸佛住世八萬歲，為利益故。

神闍如來住世六萬歲，為利益故。

拘婁孫馱佛住世四萬歲，為利益故。

拘那含牟尼佛住世三萬歲，為利益故。

迦葉如來住世二萬歲，為利益故。

「阿難！我今多陀阿伽度阿羅呵三藐三佛陀，住世八十歲，為利益故，而說偈言：

「有佛以神通，住世受供養；  
或神通及業，盡已入涅槃。

「阿難！然燈如來有於二百五十萬億聲聞弟子大眾集會。如來滅後，法住於世經七萬歲。末後十年，諸比丘等不生敬信、無慚愧心、營理世務、樂於諸業。所有持疑不相諮問。各恃己能，互生憍慢。恒聚非法。諸惡知識、不善之人，以為朋友。共相狎習，圍繞遊從。是等癡人，行不純故，使彼如來佛法僧寶，速疾隱沒，不現世間。所有經書悉皆滅盡。

「一切勝佛有萬四千聲聞弟子大眾集會。如來滅後，正法住世，經於少時。

「蓮華上佛有七萬眾聲聞集會。如來滅後，正法住世經十萬歲。

「上行如來有六萬眾聲聞集會，如來滅後，正法住世七萬七千歲。

「德上名稱佛有二萬眾聲聞集會。如來滅後，正法住世經五百歲。

「釋迦牟尼佛有於一千二百五十聲聞集會。如來滅後，正法住世經五百歲，像法住世亦五百歲。

「帝沙如來有六萬億聲聞集會。如來滅後，正法住世經二萬歲。

「弗沙如來有無量億聲聞集會。如來滅後，正法、像法，乃至法住，乃至法滅。

「見一切義佛有三十二億那由他眾聲聞集會。如來滅後，正法暫時，不久住世。

「毘婆尸佛三會說法。度聲聞眾：第一大會一百六十八百千人；第二大會有十萬人；第三大會八百千人。如來滅後，正法住世經二萬歲。

「神聞如來唯有二會。度聲聞眾：第一會度有七萬人，第二會度有六萬人。如來滅後，正法住世經六萬歲。

「拘婁孫馱佛有四萬眾聲聞弟子。如來滅後，正法住世經五百歲。

「拘那含牟尼佛有三百萬聲聞集會。如來滅後，正法住世二十九日。

「迦葉如來有二萬眾聲聞集會。如來滅後，正法住世經於七日。

「阿難！我多陀阿伽度阿羅呵三藐三佛陀有一千二百五十聲聞集會。我滅度後，正法住世有五百歲，像法住世亦五百歲。今當略說優陀那偈。而說偈言：

「說施及年數，種姓并壽命；  
聲聞眾集會，正法與像法；  
彼等諸世尊，住世般涅槃；  
釋種大師子，總說悉已訖。」

◆ 《三劫三千佛緣起》(出《觀藥王藥上經》)宋晁良耶舍譯

爾時，釋迦牟尼佛告大眾言：「我曾往昔無數劫時，於妙光佛末法之中，出家學道，聞是五十三佛名。聞已合掌，心生歡喜，復教他人，令得聞持。他人聞已，展轉相教，乃至三千人。此三千人異口同音，稱諸佛名，一心敬禮。如是敬禮諸佛因緣功德力故，即得超越無數億劫生死之罪。初千人者，華光佛為首，下至毘舍浮佛，於莊嚴劫得成為佛，過去千佛是也。其中千人者，拘留孫佛為首，下至樓至佛，於賢劫中次第成佛。後千人者，日光佛為首，下至須彌相佛，於星宿劫中當得成佛。」

◆ 《妙法蓮華經》(第三品)鳩摩羅什譯

「是華光佛滅度之後。正法住世三十二小劫。像法住世亦三十二小劫。」

### (三) 釋迦法運

#### 1. 法運時程諸說

◆ 《大乘悲分陀利經》佛說：

「我為一一眾生故，步涉多百千由旬多種種若干句義文字方便變化，忍此疲倦，終至置於涅槃。乃至以誓力，我當五分壽減一。欲般涅槃時，我當碎身舍利如半芥子，為悲眾生故，然後當入涅槃。令我

涅槃後，正法住世千歲，像法住世復五百歲。」

◆ 《佛本行集經》云：

「釋迦牟尼佛有於一千二百五十聲聞集會。如來滅後，正法住世經五百歲，像法住世亦五百歲。」

◆ 《大乘三聚懺悔經》（闍那崛多共笈多等譯）

「舍利弗！我於往昔行菩薩行時，勸請諸佛久住於世，轉法輪故。今得十力、四無所畏、四無礙辯、大慈大悲十八不共法。我涅槃後，正法當住於五百歲，像法亦復住五百歲。」

## 2. 正法時：戒為大師

◆ 《佛垂般涅槃略說教誡經》（亦名《遺教經》）鳩摩羅什譯

釋迦牟尼佛初轉法輪，度阿若憍陳如，最後說法度須跋陀羅，所應度者皆已度訖，於娑羅雙樹間將入涅槃。是時中夜，寂然無聲，為諸弟子略說法要：「汝等比丘，於我滅後，當尊重珍敬波羅提木叉。如闇遇明、貧人得寶。當知，此則是汝大師，若我住世無異此也。」

## 3. 正法壞：少樂習戒

◆ 《雜阿含經》（九〇六）

如是我聞。

一時，佛住舍衛國祇樹給孤獨園。

爾時，尊者摩訶迦葉住舍衛國東園鹿子母講堂。晡時從禪覺，往詣佛所，稽首禮足，退坐一面，白佛言：「世尊！何因何緣，世尊先為諸聲聞少制戒時，多有比丘心樂習學；今多為聲聞制戒，而諸比丘少樂習學。」

佛言：「如是。迦葉！命濁、煩惱濁、劫濁、眾生濁、見濁，眾生善法退滅故，大師為諸聲聞多制禁戒，少樂習學。迦葉！譬如，劫欲壞時，真寶未滅，有諸相似偽寶出於世間。偽寶出已，真寶則沒。如是。迦葉！如來正法欲滅之時，有相似像法生。相似像法出世間已，正法則滅。譬如大海中，船載多珍寶，則頓沉沒。如來正法則不如

是。漸漸消滅。如來正法不為地界所壞，不為水、火、風界所壞。乃至惡眾生出世，樂行諸惡，欲行諸惡，成就諸惡。非法言法，法言非法；非律言律，律言非律。以相似法，句味熾然。如來正法於此則沒。

「迦葉！有五因緣能令如來正法沉沒。何等為五？若比丘於大師所不敬不重，不下意供養。於大師所不敬不重，不下意供養已，然復依倚而住。若法，若學，若隨順教，若諸梵行，大師所稱歎者，不敬不重，不下意供養。而依止住。是名。迦葉！五因緣故，如來正法於此沉沒。

「迦葉！有五因緣，令如來法、律，不沒、不忘、不退。何等為五？若比丘於大師所，恭敬、尊重，下意供養，依止而住。若法、若學、若隨順教、若諸梵行，大師所稱歎者，恭敬尊重，下意供養，依止而住。迦葉！是名『五因緣』，如來法、律，不沒、不忘、不退。是故，迦葉！當如是學。於大師所，當修恭敬、尊重，下意供養，依止而住。若法、若學、若隨順教、若諸梵行，大師所讚歎者，恭敬、尊重，下意供養，依止而住。」

佛說是經已，尊者摩訶迦葉歡喜隨喜，作禮而去。

#### 4. 像法法門：禪定智慧

##### ◆ 《出曜經》（卷十六）〈忿怒品第十五〉

「人身難得，佛世難值，像法難遇。雖得為人，不能練精進、行禪寂，役神方更隨時進趣，與世同流。又不廣顯三寶，訓悟後學。三塗八難何日當空？」

#### 5. 護持像法：求禪定智慧

##### ◆ 《佛說金毘羅童子威德經》（大廣智不空密譯）

藥王菩薩白佛言：「世尊！若有諸眾生，欲在世間復求出世間者，發意如來像法滅時，擬護持使不斷絕者；或發大猛心，欲求如來禪定智慧者；或救眾生苦難者，先須持如來神呪十萬遍然行諸方法。」

## 6. 末法漢地：濁惡

### ◆ 《佛說大輪金剛總持陀羅尼經》

佛告執金剛神言：「我滅度後，末法之時，眾生薄福，三災競起。吾毒鬼神諸天魔等，南閻浮提振旦國中，諸惡鬼神及諸八萬四千元魔。一一魔有五千眷屬。南閻浮提殺害眾生無量無數。」

## 7. 末法度眾：淨土法門

### ◆ 《無量壽如來觀行供養儀軌》（不空譯）

爾時，金剛手菩薩在毘盧遮那佛大集會中，從座而起，合掌恭敬，白佛言：「世尊！我為當來末法雜染世界惡業眾生，說無量壽佛陀羅尼，修三密門，證念佛三昧，得生淨土，入菩薩正位。不以少福無慧方便得生彼剎。是故，依此教法，正念修行，決定生於極樂世界，上品上生，獲得初地。」

### ◆ 《佛說無量功德陀羅尼經》（法賢譯）

爾時，世尊告阿難言：「汝當諦聽！我今為汝及末法眾生，宣說無量功德陀羅尼。汝當憶念，勿得忘失。使於當來濁惡世中，與諸眾生，作大善利。阿難！若有眾生得聞此陀羅尼，每日晨朝誦二十一遍。是人於千劫中所積惡業悉皆消滅，見身獲得安隱快樂。若人志心持誦一洛叉數，是人當來得見慈氏菩薩；若持誦二洛叉數，當來得見觀自在菩薩；若持誦三洛叉數，當來得見無量壽佛。」

### ◆ 《佛說大乘莊嚴寶王經》（天息災譯）卷一

爾時，除蓋障菩薩復白佛言：「世尊！彼觀自在菩薩摩訶薩，救是苦已，還來於此會中耶？」

佛告除蓋障菩薩言「善男子！彼觀自在菩薩，從大阿鼻地獄出已。復入餓鬼大城。其中有無數百千餓鬼，口出火焰，燒燃面目，形體枯瘦，頭髮蓬亂，身毛皆豎，腹大如山，其咽如針。是時，觀自在菩薩摩訶薩，往詣餓鬼大城。其城熾燃業火悉滅，變成清涼。時，有守門鬼將，執熱鐵棒，醜形巨質，兩眼深赤，發起慈心：「我今不能守

護如是惡業之地。」是時，觀自在菩薩摩訶薩，起大悲心；於十指端各各出河；又於足指亦各出河；一一毛孔皆出大河。是諸餓鬼飲其中水。飲是水時，咽喉寬大，身相圓滿；復得種種上味飲食，悉皆飽滿。此諸餓鬼既獲如是利益安樂，各各心中審諦思惟：「南瞻部洲人何故常受清涼、安隱、快樂？其中或有善能常行恭敬孝養父母者；或有善能惠施遵奉善知識者；或有聰慧、明達，常好大乘者；或有善能行八聖道者；或有善能擊法犍椎者；或有善能修破壞僧伽藍者；或有善能修故佛塔者；或有善能修破損塔相輪者；或有善能供養尊重法師者；或有善能見如來經行處者；或有善能見菩薩經行處者；或有善能見辟支佛經行處者；或有善能見阿羅漢經行處者。」作是思惟：「南瞻部洲有如是等修行之事！」是時，此《大乘莊嚴寶王經》中，自然出微妙聲。是諸餓鬼得聞其聲，所執身見，雖如山峯，及諸煩惱，金剛智杵破壞無餘；便得往生極樂世界。皆為菩薩名「隨意口」。是時，觀自在菩薩摩訶薩，救斯苦已，又往他方諸世界中，救度有情。

#### ◆ 《佛說觀自在菩薩母陀羅尼經》（法賢譯）

佛告普賢菩薩言：「誠如汝說。我念往昔為菩薩時，為求正等正覺，度如鵝沙數無量無邊世界。彼有佛土，名蘇珂嚩帝。彼土有佛，號無量壽如來、應供、正等正覺。是無量壽佛於今現在，常說妙法利益眾生。我於彼會，為婆羅門，名『自在光』。我時已得證發光地。於彼會中，已曾宣說此觀自在菩薩母陀羅尼。當與百千那由他無量無邊眾生作大利益。時在會中，一切大眾聞是陀羅尼已，有罪業者皆悉消滅，未得宿命智者，獲宿命智。」

爾時，世尊復告普賢菩薩言：「汝為利益當來末法五濁惡世百千俱胝無量無邊造無間業罪惡眾生得罪消滅，令孤獨者有依怙故。欲隨喜宣說觀自在菩薩母陀羅尼。善哉！善哉！汝可宣說。」

普賢菩薩蒙佛許已，即說觀自在菩薩母陀羅尼。

#### ◆ 《金剛頂瑜伽最勝祕密成佛隨求即得神變加持成就陀羅尼儀軌》

爾時，滅惡趣菩薩在毘盧遮那佛大集會中，從座而起，合掌恭

敬，白佛言：「世尊！我為當來末法雜染世界惡趣眾生，說滅罪成佛陀羅尼，修三密門，證念佛三昧，得生淨土。何以方便重罪眾生，為拔苦與樂。我欲拔濟一切眾生苦。」

爾時，佛告滅惡趣菩薩言：「無懺、無愧、邪見、放逸眾生，無拔濟法。生受諸諸困厄，死墮無間地獄，不聞三寶名，何況不見佛，況復受人身。」

滅惡趣菩薩復白言：「如來之方便不可量，如來神力無盡。唯願世尊說祕密拔苦法。佛在一切眾生父母。為五濁眾生說決定成佛法。」

◆ 《佛說無量清淨平等覺經》佛說：

「我般泥洹去後，經道留止千歲。千歲後，經道斷絕。我皆慈哀，特留是經法，止住百歲。百歲中竟，乃休止絕。在心所願，皆可得道。」

## 8. 末劫行法：聞佛

◆ 《佛說無量清淨平等覺經》（夏蓮居會集本）：

「佛告阿難。諸佛如來，語無虛妄。若復有人，身具四重十波羅夷，瞬息即經此方他方阿鼻地獄，乃至窮盡十方無間，靡不經歷。能以一念將此法門，於末劫中開示未學。是人罪障，應念銷滅。變其所受地獄苦因，成安樂國。得福超越前之施人，百倍千倍千萬億倍，如是乃至算數譬喻所不能及。」

◆ 《無量壽經》（宋·法賢譯）法藏比丘曰：

「世尊！我得菩提，成正覺已。所有眾生求生我剎，念吾名號，發志誠心，堅固不退。彼命終時，我令無數苾芻現前圍繞，來迎彼人；經須臾間，得生我剎，悉皆令得阿耨多羅三藐三菩提。」

「世尊！我得菩提，成正覺已。所有十方無量無邊無數世界一切眾生，聞吾名號，發菩提心，種諸善根，隨意求生諸佛剎土，無不得生，悉皆令得阿耨多羅三藐三菩提。」

## 9. 末劫成就：聞佛

◆ 《楞嚴經》中，文殊菩薩曰：

「誠如佛世尊，詢我諸方便，  
以救諸末劫，求出世間人。  
成就涅槃心，觀世音為最。」  
自餘諸方便，皆是佛威神。  
即事捨塵勞，非是長修學，  
淺深同說法，頂禮如來藏，無漏不思議。」  
願加被未來，於此門無惑，方便易成就。  
堪以教阿難，及末劫沈淪。  
但以此根修，圓通超餘者，真實心如是。」  
「將聞持佛佛，何不自聞聞。  
聞非自然生，因聲有名字。  
旋聞與聲脫，能脫欲誰名。  
一根既返源，六根成解脫。」

### （四）法運嬗變特徵

#### 1. 正、像轉變

◆ 《雜阿含經》（九〇六）

佛言：「譬如，劫欲壞時，真寶未滅，有諸相似偽寶，出於世間。  
偽寶出已，真寶則沒。如是。迦葉！如來正法欲滅之時，有相似像法  
生。相似像法出世間已，正法則滅。譬如大海中，船載多珍寶，則頓  
沉沒。如來正法則不如是，漸漸消滅。」

#### 2. 像法轉時

◆ 《地藏菩薩本願經》

爾時，世尊讚曼殊室利童子言：「善哉！善哉！曼殊室利！汝以大  
悲勸請我說諸佛名號本願功德，為拔業障所纏有情，利益安樂像法轉  
時諸有情故。汝今諦聽！極善思惟。當為汝說。」

◆ 《藥師琉璃光如來本願功德經》

曼殊室利童子白佛言：「世尊！我當誓於像法轉時，以種種方便，令諸淨信善男子、善女人等，得聞世尊藥師琉璃光如來名號，乃至睡中亦以佛名覺悟其耳。」

（五）法滅

◆ 《法滅盡經》：

佛告阿難：「吾涅槃後法欲滅時，五逆濁世魔道興盛，魔作沙門壞亂吾道，著俗衣裳，樂好袈裟五色之服，飲酒啖肉殺生貪味，無有慈心更相憎嫉。時有菩薩、辟支、羅漢，精進修德一切敬待，人所宗向教化平等，憐貧念老鞠育窮厄，恆以經像令人奉事，作諸功德志性恩善，不侵害人捐身濟物，不自惜己忍辱仁和。設有是人，眾魔比丘咸共嫉之，誹謗揚惡，擯黜驅遣不令得住。自共於後不修道德，寺廟空荒無復修理轉就毀壞，但貪財物積聚不散不作福德，販賣奴婢，耕田種植，焚燒山林傷害眾生無有慈心。奴為比丘，婢為比丘尼，無有道德淫泆濁亂男女不別，令道薄淡皆由斯輩。或避縣官依倚吾道，求作沙門不修戒律，月半月盡雖名誦戒，厭倦懈怠不欲聽聞，抄略前後不肯盡說。經不誦習，設有讀者不識字句，為強言是不諳明者。貢高求名，虛顯雅步以為榮冀望人供養。眾魔比丘命終之後，精神當墮無擇地獄，五逆罪中，餓鬼、畜生靡不經歷恆河沙劫，罪竟乃出生在邊國無三寶處。」

「法欲滅時，女人精進恆作功德；男子懈慢不用法語，眼見沙門如視糞土無有信心。法將殄沒，登爾之時諸天泣淚，水旱不調，五穀不熟，疫氣流行死亡者眾，人民勤苦縣官剋罰，不順道理皆思樂亂，惡人轉多如海中沙，善者甚少若一若二。劫欲盡故，日月轉短，人命轉促，四十頭白。男子淫泆，精盡天命，或壽六十。男子壽短，女人壽長，七十、九十或至百歲。大水忽起卒至無期，世人不信故為有常，眾生雜類不問豪賤，沒溺浮漂魚鱉食啖。」

「時有菩薩、辟支、羅漢，眾魔驅逐，不預眾會。三乘入山，福德之地，恬怕自守以為欣快，壽命延長，諸天衛護。月光出世，得相遭值，共興吾道，五十二歲。首楞嚴經、般舟三昧先化滅去，十二部經尋後覆

滅，盡不復現不見文字。沙門袈裟自然變白。吾法滅時，譬如油燈臨欲滅時，光明更盛於是便滅，吾法滅時亦如燈滅。

「自此之後難可數說，如是之後數千萬歲，彌勒當下世間作佛，天下泰平毒氣消除，雨潤和適，五穀滋茂，樹木長大，人長八丈，皆壽八萬四千歲，眾生得度不可稱計。」

賢者阿難作禮白佛：「當何名斯經？云何奉持？」

佛言：「阿難，此經名為《法滅盡》，宣告一切宜令分別，功德無量不可稱計。」

四部弟子聞經，悲慘惆悵，皆發無上聖真道意，悉為佛作禮而去。」

#### ◆ 《佛說無量壽莊嚴清淨平等覺經》（夏蓮居會集本）

「若於來世，乃至正法滅時，當有眾生植諸善本，已曾供養無量諸佛。由彼如來加威力故，能得如是廣大法門，攝取受持；當獲廣大一切智智。於彼法中，廣大勝解，獲大歡喜，廣為他說，常樂修行。諸善男子及善女人，能於是法，若已求、現求、當求者，皆獲善利。汝等應當安住無疑，種諸善本；應常修習，使無疑滯，不入一切種類珍寶成就牢獄。」

#### ◆ 《佛說阿彌陀三耶三佛薩樓佛檀過度人道經》中，佛說：

「我般泥洹去後，經道留止千歲。千歲後，經道斷絕。我皆慈哀，特留是經法，止住百歲。百歲中竟，乃休止絕。在心所願，皆可得道。」

#### ◆ 《佛說無量壽經》（魏譯）佛說：

「吾去世後，經道漸滅，人民諂偽，復為眾惡。五燒五痛，還如前法。久後轉劇，不可悉說，我但為汝略言之耳。」

「當來之世，經道滅盡，我以慈悲哀愍，特留此經，止住百歲。其有眾生，值斯經者，隨意所願，皆可得度。」」

## 【附】

# 法運與論爭

## 甲、佛法判教

佛法重判教，尤重判「時」，乃因法興有其時節因緣。佛經開卷即曰：「如是我聞。一時。佛在……。」「一時」表法適當時節因緣。

「時」之大者乃佛法法運。漢傳古德深明時之重要，研教理者，頗重判時。或曰「天台五時」，或曰「相宗三時」等。此類計時，限於學派、宗派，皆時之小者。佛法「法運」時程，動輒以千年、萬年，乃至以劫計；涉及眾生以億萬計，乃時之大者。古德判教言時，或揣摩聖意，或自家知見。而法運三時，由佛親口宣說，乃如來真實意。

「法運」計時乃諸佛通例。佛陀宣說諸佛之法，大多以法運計時。說一古佛，常述其住世時程，或兼述其正法時程，或兼述其像法時程，乃至末法時程，故稱為「四時」。後世學人往往從佛滅後計起，稱為法運三時：正法時、像法時、末法時。簡稱「正像末」。

## 乙、釋迦法運

### （一）稱謂之異

一、正法與像法大多分別稱謂。

二、像法或附「末劫」。如《金剛三昧經》：「若佛滅後。正法去世。像法住世。於末劫中。五濁眾生。多諸惡業輪迴三界無有出時。」運為機易，劫為法滅。何解待驗。

三、「末法」與「末劫」同見於一部經中。如《楞嚴經》中，云：「於末劫中，開示未學。」復見：「我滅度後，末法之中。」

四、末法或與法滅合論。如《大方廣十輪經》云：「於末法中，法欲滅時。」

## (二) 隨緣而變

### 一、隨事緣而變

釋迦牟尼佛度比丘尼眾而損正法時程一半，由千年減為五百年。是故，經文或曰千年，或曰五百歲。

### 二、隨處緣而異

漢地與天竺眾生根機與修學進度皆大不同。古天竺，佛滅後五百年正像更替。東土漢地在佛滅後五百年才剛剛傳入佛教。翻譯弘傳尚且來不及，何談「成就」。其後歷經數百年整理、吸收，直至佛滅後一千多年的唐初，才正式形成學理體系，形成修學宗派。至此方可言及「成就」二字，方才談得上「禪成就」。如此算來，佛滅後五百年，古天竺出正法法運，進入像法時期；佛滅後一千多年，六祖說《壇經》，漢地才入像法法運。大乘法運在東土漢地，像法法運計時自應依漢地為準。是知，五百年與千年，乃因地而異。爭論者，刻舟求劍之談耳。

### 三、隨外緣而轉

古印度像法末期，佛教受伊斯蘭教摧殘而法滅，故古印度無末法期。佛或稱「像法末劫」，當指其像法而法滅。法運轉移，由西域而東土漢地、藏地、東亞，漸次展開。

## (三) 眾機遞降

法運之「時」，關乎眾生根性。眾生根性有通徵與別徵。五乘對應別徵。法運則關乎通徵。眾生整體根機特徵嬗變之時，即法運遞轉之期。

眾生根性整體遞降，並非釋迦牟尼佛教化無功。乃因根熟者已度，所餘者根器皆未成熟。對此，《佛遺教經》中佛有明示：當度已度。眾生根器成熟，需時甚久，動輒以阿僧祇劫計。釋迦法運，不過萬餘年。根熟者已超凡入聖，未熟者進步緩慢，成就無期。故而，眾生根性看似每況愈下，只是比較而言，是扣除高材生、畢業生之後，所餘留級部份狀況。

末法眾生根機未熟，自力修行很難計日程功。淨土法門以佛力彌補自力之不足。彌陀接引根器未熟眾生往生聖域留學，借助環境條件，以求速得進步。

## (四) 史實印證

### 一、古印度佛教史印證。

佛滅後五百年內，印度佛教僧團雖有爭論，但大體保持佛陀基本教法。五百年後大乘、密教相繼興起。千餘年後，像法末劫而法滅。史實印證佛語。

### 二、漢地佛教史印證

漢地正像之交，大致在隋唐之際。完成當以《壇經》問世為標誌。像法時，禪法大興，廣弘。

漢地像末之交，大致在佛滅後二千五百至二千七百年間。斷代當以佛號法音自動播放器普及為標誌。末法時，禪法衰微，淨土法門大興，廣弘。

總之，佛說法運教法，已為佛教史實印證，真實不虛。當今道者自應尊重事實，擇善景從，依教奉行。授記預言為誰所說，已不重要。諍論不休，枉費唇舌，並無實義。自家有疑，讀經讀史，參究便是。

### 丙、古德功德

法運理論，乃佛法重要教理。釋迦牟尼佛多次宣說，散見諸經。西土論師多有論述。漢地古德總結概括，形成結論。言簡義賅，功德無量。

禪門大家總述為：「正法眾生戒成就；像法眾生禪成就；末法眾生淨成就。」淨宗古德綜述為：「正法眾生持戒成就；像法眾生禪法成就；末法眾生淨土成就。」前者最為簡捷，後者更顯準確。

漢地古代「三階教」亦曾深入研究法運課題，成果顯著；形成教派，聲勢頗大。惜乎被禁，譯著散佚。有待考古，文獻出現。

## 《無量壽經》指要

### (甲) 聞佛法典

《無量壽經》乃西方淨土法門根本經典，主說「聞佛」法門。聞佛法門乃耳根法門，屬觀音教法。《無量壽經》中因、行、果俱備。法藏比丘師從「世間自在王如來」表因；〈發大誓願品〉說聞佛聖號，表行；經末授記「妙音如來」，表果。

#### (一) 重要法門「聞佛」

「聞佛聖號」乃一重要淨土行法，不同於任何其他淨土法門。「聞佛」法門用耳根。而「觀佛」法門用眼根；「念佛」法門用意根，攝六根。「稱名唵佛」法門用聲根，亦名「唱佛」、「誦佛」、「諷佛」(《淨土聖賢錄》)。

#### (二) 本經主說「聞佛」

《無量壽經》原譯本中，「聞佛」聖號，甚為顯著。

五種原譯中，四種含〈發大誓願〉品。計其「聞佛名號(字)」出現次數如下：

- 一、後漢·支婁迦讖譯本，列二十四大願，兩處「聞我名字」。
- 二、吳·支謙譯本，列二十四大願，兩處「聞我名字」。
- 三、曹魏·僧鎧譯本，列四十八大願，十處「聞我名字」。
- 四、唐·菩提流志譯本，列四十八大願，十三處「聞我名已」。
- 五、宋·法賢譯本，列三十六大願，九處「聞吾名號」、「聞我名號」、「聞我名已」。僅一處「念吾名號」。

後勝前前。古德必是發現更佳梵本，才會勞師動眾重譯。後來譯本，講大願的篇幅逐漸增加，而講「聞佛名號」者，增加更多。由此可見，「聞佛名號」乃經中重要法義。

綜計《無量壽經》各本，出現頻率最高的行法，即是「聞我(佛)名號(字、已)」。由此可證，《無量壽經》主說聞佛法門。

### （三）本經兼說念佛

佛說一經，通常主說一法，兼說他法。淨土諸經皆具主說法門與兼說法門：

《觀無量壽佛經》主說「觀佛」法門，見第一至第十三觀；兼說「念佛」法門，見第十四、十五、十六三觀。

《楞嚴經》主說「聞佛」法門，見〈耳根圓通章〉；兼說「念佛」法門，見〈念佛圓通章〉。

《阿彌陀經》主說「念佛」法門，云「執持名號，一心不亂」；兼說聞佛法門，云：「若有善男子、善女人，聞是經受持者，及聞諸佛名者，是諸善男子、善女人，皆為一切諸佛之所護念，皆得不退轉於阿耨多羅三藐三菩提」。

《無量壽經》主說「聞佛」法門，云「聞我名號」；兼說「念佛」法門。〈發大誓願品〉魏譯云：「繫念我國」；吳譯云：「一心念我」；宋譯云：「念吾名號」。〈三輩往生品〉云：「發菩提心，一向專念阿彌陀佛」。

聞佛屬空門，耳根起用，觀音教法；念佛屬有門，意根都攝，勢至傳法。

### （四）法門師承旁證

「聞佛」乃耳根法門，屬觀音法門。觀世音菩薩亦號「觀自在」菩薩。法藏比丘師承「世自在王如來」。聖號表法，阿彌陀佛因地法藏比丘所修法門即屬「自在」法系，即觀音法門。可知，法藏比丘乃專修耳根聞佛法門而得成就。由是可證，聞佛聖號乃本經主說法門。

### （五）法門功德驗證

經（魏譯）云聞佛聖號法門功德：「他方國土諸菩薩眾，聞我名字，皆悉逮得清淨解脫三昧。住是三昧，一發意頃，供養無量不可思議諸佛世尊，而不失定意」；「他方國土諸菩薩眾，聞我名字，歡喜踊躍，修菩薩行，具足德本」；「他方國土諸菩薩眾，聞我名字，皆悉逮得普

等三昧。住是三昧，至于成佛；常見無量不可思議一切如來」。如此殊勝功德，必是殊勝法門實修所證果德；而因地行法，經文唯有「聞我（佛）名字」。可見，「聞」者，「聞修」也，非僅「聞知」。非一聞而後已，乃聞而不已，二六時中耳根「聞修」。由是可證《無量壽經》主說聞佛法門。

## （六）佛語授記果證

經末授記：「各於異方次第成佛，同名『妙音如來』。」妙音者，耳根聞佛成就功德。若言念佛成就功德，當號「妙心如來」。由是可證《無量壽經》主說聞佛法門。

## （乙）十念申願

《無量壽經》(魏譯)云：「十方眾生至心信樂。欲生我國，乃至十念。若不生者不取正覺。唯除五逆，誹謗正法。」此願通稱「十念必生願」。「十念」多解為「十唵(念)」阿彌陀佛聖號。依經義，當為十番申願：欲生極樂。

### （一）願門三法

願門攝三法：發願、修願、申願。

**發願** 《無量壽經》(魏譯)云：「十方眾生發菩提心，修諸功德。至心『發願』，欲生我國。」此云發願。

**修願** 《無量壽經》(夏會本)云：「發菩提心，修諸功德，奉行六波羅蜜，堅固不退」；「發菩提心，堅固不退，植眾德本」；「若有宿惡，聞我名字，即自悔過，為道作善，便持經戒」；「以清淨心，向無量壽」。皆云修願。

**申願** 《無量壽經》(夏會本)云：「復以善根迴向，願生我國」；「所有善根，心心迴向，願生我國」；「至心迴向，欲生極樂」。皆云申願。

發願者，發而後已。修願者，積德淨心。申願者，迴向往生。

## （二）「十念」申願

淨土資糧三，曰：信、願、行。稱念佛號，屬行門念佛。「乃至十念，欲生其國」，屬願門申願。《彌陀要解》曰：「得生與否，全由信願之有無。品位高下，全由持名之深淺。」故知：「十念必生」願，當為十念申願，而非僅「十稱聖號」。

日課誦《迴向文》，為申願常法；「十念」求生，為臨終大法。

## （丙）末法渡眾

### （一）緣俱法顯

「聞佛」觀音，必具適宜聲源方能起觀。由行人自己念佛發聲。自觀自聲。發聲源雖然便利，但難於控制，難於標準化。很難做到不疾不徐、不澀不掉。再者，發聲消耗體力、精力，力竭則罷，不能持久。即如善導大師唸佛，也只能「非力竭不休」。《淨土聖賢錄》

拜電子科技之賜，「念佛機」等電子自動播放設備問世。以念佛機為「聞佛」聲源，既標準，又省力，可持久，晝夜持續。藉此「聞佛」不斷，最利根器成熟。念佛機等電子自動播放設備是末法「聞佛」法門弘傳的重要法緣，必備物質條件。

《無量壽經》兩千年前已傳譯漢地，時運未至，法緣未具，法本雖備，而聞佛教法未彰於世。直待末法運至，方有菩薩夏蓮居士出現於世，會集佳本；方有菩薩黃念祖居士出現於世，註解會本；方有菩薩淨空法師出現於世，專弘最佳會本。二十世紀以來，錄音機、念佛機等電子自動播放設備問世，末法法緣具足，《無量壽經》佳本才風行天下，「聞佛」法門才彰顯於世。

時運既至，諸緣現前，眾生方才悟解經文佛語之如來本意，方歎諸佛菩薩述往記來，真實不虛。

## （二）末法應機

釋迦法運三時，眾生根性遞降。彌陀接引標準，隨眾漸次寬泛。

正法時期，學人多累世修行而道行高深者。此時彌陀接引標準最高。必須觀法（《觀無量壽佛經》）成就，得佛立三昧（《般舟三昧經》）方才及格，蒙佛接引往生極樂。仿如當今大學招生之名校掐尖。

像法時期，學人資質普遍平庸。此時彌陀接引標準隨之有所下降。只須「發菩提心，一向專念阿彌陀佛」（《無量壽經》），臨終「繫念不亂」（玄奘譯《佛說阿彌陀經》），即屬及格，蒙佛接引，往生極樂。仿如當今大學招生之普通院校，依分數等綜合資質錄取。

末法時期，眾生根性濁劣。此時彌陀接引標準隨之再降。只須聞佛聖號，至心信樂，十番申願，確定無疑，即予接收，極樂得生。仿如當今美國之社區大學或成人學校，只要報名，不經考試，即可入學。

阿彌陀佛無量慈悲，普渡眾生離苦得樂，由此可見。《楞嚴經》云：「隨眾生心，應所知量。」此之謂也。

綜上可知，《無量壽經》開演「聞佛」法門，乃度末法眾生應機法門。

夏蓮居會集本修訂版《無量壽經》

## 《佛說大乘無量壽莊嚴清淨平等覺經》

夏蓮居 會集  
課題組 參訂

### 序

諺曰：「愚者千慮，必有一得。智者千慮，必有一失。」佛門大德，難逃此讖。戮力補天，乃成是編。

《無量壽經》素稱佛門要典。佛祖金口，屢次宣說。漢地祖師，隨之傳譯。淨空大師稱：史錄譯本十二，今存者五。依譯尋源，佛祖至少宣說四次。佛言大同，諸譯小異。依經修學，原無礙大旨。朝暮課誦，則無所適從。為求定於一統，古德多次會集。後後勝於前前，夏公會本稱最。辭語出自原譯，本屬精美絕倫。然而，白璧稍存微瑕，分段有欠如法。聞佛、念佛二法，未能清晰分別。

《無量壽經》（宋譯）云：「世尊，我得菩提，成正覺已。所有眾生，求生我刹，念吾名號，發至誠心，堅固不退。彼命終時，我令無數苾芻，現前圍繞。來迎彼人。經須臾間，得生我刹，悉皆令得阿耨多羅三藐三菩提。」復云：「世尊，我得菩提，成正覺已。所有十方無量無邊無數世界一切眾生，聞吾名號，發菩提心，種諸善根，隨意求生，諸佛刹土，無不得生，悉皆令得阿耨多羅三藐三菩提。」前段「念吾名號」，屬念佛法門，須假接引，方得往生。後段「聞吾名號」，屬聞佛法門，無須接引，隨意往生。以法門不同，往生方式不同故，《無量壽經》〈發大誓願品〉五原譯本中，將聞佛法門與念佛法門，標示法門，區別另列。

聞佛、念佛，涇渭分明。聞佛屬空門，耳根起用，觀音教法；念佛屬有門，意根都攝，勢至傳法。佛言啻啻，原譯歷歷。惜乎夏

公，未標二法名稱，而混編入同段。有違經義，誤導學人。今依宋譯，標名二法，析為二段。

夏會本：

「我作佛時，十方眾生聞我名號，發菩提心，修諸功德，奉行六波羅密，堅固不退。復以善根迴向，願生我國。一心念我，晝夜不斷。臨壽終時，我與諸菩薩眾迎現其前，經須臾間，即生我剎，作阿惟越致菩薩。不得是願，不取正覺。」

修訂版：

「我作佛時，所有十方無量無邊無數世界一切眾生，聞吾名號，發菩提心，種諸善根，隨意求生，諸佛剎土，無不得生，悉皆令得阿耨多羅三藐三菩提。若不爾者，不取正覺。」

「我作佛時，所有眾生，求生我剎，念吾名號，發志誠心，堅固不退。一心念我，晝夜不斷。彼命終時，我與諸菩薩眾，迎現其前，經須臾間，即生我剎，作阿惟越致菩薩。若不爾者，不取正覺。」

妄施斧斤，就正有道。

課題組

## 目 錄

第一章 教起因緣 .....	80
第二章 法門 .....	82
第三章 願門 .....	88
第一節 讚歎淨土啟願 .....	88
第二節 讚歎道場啟願 .....	90
第三節 讚歎聖眾啟願 .....	92
第四節 佛讚教令發願 .....	94
第四章 行門 .....	94
第一節 淨業正行 .....	94
第二節 淨業助行 .....	101
第五章 信門 .....	105
第六章 付囑流通 .....	112

# 《佛說大乘無量壽莊嚴清淨平等覺經》

## 第一章 教起因緣

### 一、法會聖眾

如是我聞。一時，佛在王舍城耆闍崛山中，與大比丘眾萬二千人俱。一切大聖神通已達。其名曰：尊者憍陳如、尊者舍利弗、尊者大目犍連、尊者迦葉、尊者阿難、等，而為上首。又有普賢菩薩、文殊師利菩薩、彌勒菩薩及賢劫中一切菩薩，皆來集會。

### 二、概說佛法

又，賢護等十六正士，所謂善思惟菩薩、慧辯才菩薩、觀無住菩薩、神通華菩薩、光英菩薩、寶幢菩薩、智上菩薩、寂根菩薩、信慧菩薩、願慧菩薩、香象菩薩、寶英菩薩、中住菩薩、制行菩薩、解脫菩薩而為上首，咸共遵修普賢大士之德，具足無量行願，安住一切功德法中。遊步十方，行權方便，入佛法藏，究竟彼岸，願於無量世界成等正覺。捨兜率、降王宮，棄位出家，苦行學道。作斯示現，順世間故。以定慧力，降伏魔怨。得微妙法，成最正覺。天人歸仰，請轉法輪。常以法音，覺諸世間。破煩惱城，壞諸欲塹。洗濯垢汙，顯明清白。調眾生、宣妙理；貯功德、示福田；以諸法藥救療三苦。升灌頂階，授菩提記。為教菩薩作阿闍黎。常習相應無邊諸行，成熟菩薩無邊善根。無量諸佛咸共護念。諸佛剎中皆能示現。譬善幻師，現眾異相。於彼相中，實無可得。此諸菩薩亦復如是。通諸法性，達眾生相。供養諸佛，開導群生。化現其身，猶如電光。裂魔見網，解諸纏縛。遠超聲聞、辟支佛地。入空無相、無願法門。善立方便，顯示三乘。於此中下，而現滅度。得無生無滅諸三摩地及得一切陀羅尼門。隨時悟入華嚴三昧，具足總持百千三昧。住深禪定，悉睹無量諸佛。於一念頃遍遊一切佛土。得佛辯才，住普賢行。善能分別眾生語言。開化顯示真實之際，超過世間諸所有法。心常諦住度世之道。於一切

萬物隨意自在。為諸庶類作不請之友。受持如來甚深法藏。護佛種性常使不絕。興大悲、愍有情；演慈辯、授法眼；杜惡趣、開善門。於諸眾生，視若自己。拯濟負荷，皆度彼岸。悉獲諸佛無量功德。智慧聖明，不可思議。如是等諸大菩薩無量無邊，一時來集。

又有比丘尼五百人，清信士七千人，清信女五百人，欲界天、色界天、諸天梵眾，悉共大會。

### 三、瑞示大法

爾時，世尊威光赫奕，如融金聚，又如明鏡，影暢表裡，現大光明，數千百變。

尊者阿難即自思惟：「今日世尊色身諸根，悅豫清淨、光顏巍巍、寶剎莊嚴。從昔以來，所未曾見。喜得瞻仰，生希有心。」即從座起，偏袒右肩，長跪合掌，而白佛言：「世尊今日入大寂定，住奇特法，住諸佛所住導師之行，最勝之道。去、來、現在佛佛相念，為念過去未來諸佛耶？為念現在他方諸佛耶？何故威神顯耀，光瑞殊妙乃爾？願為宣說！」

於是，世尊告阿難言：「善哉！善哉！汝為哀愍利樂諸眾生故，能問如是微妙之義。汝今斯問，勝於供養一天下阿羅漢、辟支佛，佈施累劫諸天人民、蜎飛蠕動之類，功德百千萬倍。何以故？當來諸天人民、一切含靈，皆因汝問而得度脫故。

「阿難！如來以無盡大悲，矜哀三界，所以出興於世，光闡道教。欲拯群萌，惠以真實之利。難值難見，如優曇花，希有出現。汝今所問，多所饒益。

「阿難！當知，如來正覺，其智難量，無有障礙。能於念頃，住無量億劫，身及諸根無有增減。所以者何？如來定慧究暢無極，於一切法而得最勝自在故。

「阿難！諦聽，善思念之。吾當為汝分別解說。」

## 第二章 法門

### 四、法系師承

佛告阿難：「過去無量不可思議無央數劫，有佛出世，名『世間自在王如來』——應供、等正覺、明行足、善逝、世間解、無上士、調御丈夫、天人師、佛世尊——在世教授四十二劫。時為諸天及世人民說經講道。

「有大國主名『世饒王』，聞佛說法，歡喜開解，尋發無上真正道意。棄國捐王，行作沙門，號曰：『法藏』，修菩薩道。高才勇哲，與世超異。信解明記，悉皆第一。又有殊勝行願，及念慧力，增上其心，堅固不動。修行精進，無能踰者。往詣佛所，頂禮長跪，向佛合掌。即以伽他讚佛，發廣大願。頌曰：

如來微妙色端嚴，一切世間無有等；  
光明無量照十方，日月火珠皆匿曜。  
世尊能演一音聲，有情各各隨類解；  
又能現一妙色身，普使眾生隨類見。  
願我得佛清淨聲，法音普及無邊界；  
宣揚戒定精進門，通達甚深微妙法。  
智慧廣大深如海，內心清淨絕塵勞；  
超過無邊惡趣門，速到菩提究竟岸；  
無明貪瞋皆永無，惑盡過亡三昧力。  
亦如過去無量佛，為彼群生大導師；  
能救一切諸世間，生老病死眾苦惱。  
常行佈施及戒忍，精進定慧六波羅；  
未度有情令得度，已度之者使成佛。  
假令供養恆沙聖，不如堅勇求正覺。  
願當安住三摩地，恆放光明照一切；  
感得廣大清淨居，殊勝莊嚴無等倫。  
輪迴諸趣眾生類，速生我剎受安樂；

常運慈心拔有情，度盡無邊苦眾生。  
我行決定堅固力，唯佛聖智能證知；  
縱使身止諸苦中，如是願心永不退。」

## 五、法門宗旨

法藏比丘說此偈已，而白佛言：我今為菩薩道，已發無上正覺之心，取願作佛，悉令如佛。願佛為我廣宣經法，我當奉持，如法修行。拔諸勤苦生死根本，速成無上正等正覺。欲令我作佛時，智慧光明、所居國土、教授名字，皆聞十方。諸天人民及蜎蠕類，來生我國，悉作菩薩。我立是願，都勝無數諸佛國者，寧可得否？」

世間自在王佛即為法藏而說經言：「譬如大海，一人斗量，經歷劫數，尚可窮底。人有至心求道，精進不止，會當剋果，何願不得？汝自思惟：修何方便，而能成就佛剎莊嚴？如所修行，汝自當知；清淨佛國，汝應自攝。」

法藏白言：「斯義宏深，非我境界。惟願如來應正遍知，廣演諸佛無量妙剎。若我得聞如是等法，思惟修習，誓滿所願。」

世間自在王佛知其高明，志願深廣，即為宣說二百一十億諸佛剎土功德嚴淨、廣大圓滿之相。應其心願，悉現與之。說是法時，經千億歲。

爾時，法藏聞佛所說，皆悉睹見，起發無上殊勝之願。於彼天人善惡、國土麗妙，思惟究竟。便一其心，選擇所欲，結得大願。精勤求索，恭慎保持。修習功德，滿足五劫。於彼二十一俱胝佛土功德莊嚴之事，明了通達，如一佛剎。所攝佛國超過於彼。既攝受已，復詣世自在王如來所，稽首禮足，繞佛三匝，合掌而住，白言：「世尊！我已成就莊嚴佛土，清淨之行。」

佛言：「善哉！今正是時，汝應具說，令眾歡喜；亦令大眾聞是法已，得大善利；能於佛剎修習攝受，滿足無量大願。」

## 六、宏誓示法

法藏白言：「唯願世尊大慈聽察。我若證得無上菩提，成正覺已，

所居佛刹具足無量不可思議功德莊嚴。無有地獄、餓鬼、禽獸、蝸飛、蠕動之類。所有一切眾生，以及焰摩羅界三惡道中，來生我刹，受我法化，悉成阿耨多羅三藐三菩提，不復更墮惡趣。得是願，乃作佛；不得是願，不取無上正覺。

「我作佛時，十方世界所有眾生，令生我刹，皆具紫磨真金色身、三十二種大丈夫相。端正淨潔，悉同一類。若形貌差別，有好醜者，不取正覺。

「我作佛時，所有眾生生我國者，自知無量劫時宿命。所作善惡，皆能洞視、徹聽。知十方去、來、現在之事。不得是願不取正覺。

「我作佛時，所有眾生生我國者，皆得他心智通。若不悉知億那由他百千佛刹眾生心念者，不取正覺。

「我作佛時，所有眾生生我國者，皆得神通自在波羅密多。於一念頃，不能超過億那由他百千佛刹，周遍巡歷、供養諸佛者，不取正覺。

「我作佛時，所有眾生生我國者，遠離分別，諸根寂靜。若不決定成等正覺、證大涅槃者，不取正覺。

「我作佛時，光明無量，普照十方，絕勝諸佛，勝於日月之明千萬億倍。若有眾生見我光明照觸其身，莫不安樂，慈心作善，來生我國。若不爾者，不取正覺。

「我作佛時，壽命無量。國中聲聞天人無數，壽命亦皆無量。假令三千大千世界眾生悉成緣覺，於百千劫，悉共計校，若能知其量數者，不取正覺。

「我作佛時，十方世界無量刹中，無數諸佛，若不共稱歎我名，說我功德國土之善者，不取正覺。

「我作佛時，十方眾生聞我名號，至心信樂，所有善根心心迴向，願生我國，乃至十念。若不生者，不取正覺。唯除五逆、誹謗正法。

「我作佛時，**所有十方無量無邊無數世界一切眾生，聞吾名號，發**

菩提心，種諸善根，隨意求生，諸佛剎土，無不得生，悉皆令得阿耨多羅三藐三菩提。若不爾者，不取正覺。

「我作佛時，所有眾生，求生我剎，念吾名號，發志誠心，堅固不退。一心念我，晝夜不斷。彼命終時，我與諸菩薩眾，迎現其前，經須臾間，即生我剎，作阿惟越致菩薩。若不爾者，不取正覺。

「我作佛時，十方眾生聞我名號，繫念我國。發菩提心，堅固不退。植眾德本，至心迴向，欲生極樂，無不遂者。若有宿惡，聞我名字，即自悔過，為道作善，便持經戒，願生我剎。命終不復更三惡道，即生我國。若不爾者，不取正覺。

「我作佛時，國無婦女。若有女人，聞我名字，得清淨信，發菩提心，厭患女身，願生我國。命終即化男子，來我剎土。十方世界諸眾生類生我國者，皆於七寶池蓮華中化生。若不爾者，不取正覺。

「我作佛時，十方眾生聞我名字，歡喜信樂，禮拜歸命。以清淨心，修菩薩行。諸天世人莫不致敬。若聞我名，壽終之後，生尊貴家，諸根無缺，常修殊勝梵行。若不爾者，不取正覺。

「我作佛時，國中無不善名。所有眾生生我國者，皆同一心，住於定聚。永離熱惱，心得清涼。所受快樂，猶如漏盡比丘。若起想念，貪計身者，不取正覺。

「我作佛時，生我國者，善根無量，皆得金剛那羅延身，堅固之力。身頂皆有光明照耀，成就一切智慧，獲得無邊辯才，善談諸法祕要。說經行道，語如鐘聲。若不爾者，不取正覺。

「我作佛時，所有眾生生我國者，究竟必至一生補處。除其本願為眾生故，被弘誓鎧，教化一切有情，皆發信心，修菩提行，行普賢道。雖生他方世界，永離惡趣。或樂說法，或樂聽法，或現神足，隨意修習，無不圓滿。若不爾者，不取正覺。

「我作佛時，生我國者所須飲食、衣服、種種供具，隨意即至，無不滿願。十方諸佛應念受其供養。若不爾者，不取正覺。

「我作佛時，國中萬物嚴淨光麗，形色殊特，窮微極妙，無能稱量。其諸眾生雖具天眼，有能辨其形色、光相、名數，及總宣說者，

不取正覺。

「我作佛時，國中無量色樹，高或百千由旬。道場樹高四百萬里。諸菩薩中，雖有善根劣者，亦能了知。欲見諸佛淨國莊嚴，悉於寶樹間見。猶如明鏡，睹其面像。若不爾者，不取正覺。

「我作佛時，所居佛剎廣博嚴淨，光瑩如鏡，徹照十方無量無數不可思議諸佛世界。眾生睹者，生希有心。若不爾者，不取正覺。

「我作佛時，下從地際，上至虛空，宮殿、樓觀、池流、華樹，國土所有一切萬物，皆以無量寶香合成。其香普熏十方世界。眾生聞者，皆修佛行。若不爾者，不取正覺。

「我作佛時，十方佛剎諸菩薩眾聞我名已，皆悉逮得清淨、解脫、普等三昧、諸深總持、住三摩地，至於成佛。定中常供無量無邊一切諸佛，不失定意。若不爾者，不取正覺。

「我作佛時，他方世界諸菩薩眾，聞我名者，證離生法，獲陀羅尼。清淨歡喜，得平等住，修菩薩行，具足德本。應時不獲一二三忍，於諸佛法不能現證不退轉者，不取正覺。」

## 七、偈說法門

佛告阿難：「爾時法藏比丘說此願已，以偈頌曰：

「我建超世志，必至無上道；  
斯願不滿足，誓不成等覺。  
復為大施主，普濟諸窮苦；  
令彼諸群生，長夜無憂惱；  
出生眾善根，成就菩提果。  
我若成正覺，立名無量壽；  
眾生聞此號，俱來我剎中。  
如佛金色身，妙相悉圓滿。  
亦以大悲心，利益諸群品；  
離欲深正念，淨慧修梵行。  
願我智慧光，普照十方剎；  
消除三垢冥，明濟眾厄難；

悉捨三途苦，滅諸煩惱暗；  
開彼智慧眼，獲得光明身；  
閉塞諸惡道，通達善趣門。  
為眾開法藏，廣施功德寶。  
如佛無礙智，所行慈愍行。  
常作天人師，得為三界雄；  
說法師子吼，廣度諸有情。  
圓滿昔所願，一切皆成佛。  
斯願若剋果，大千應感動；  
虛空諸天神，當雨珍妙華。」

佛告阿難：「法藏比丘說此頌已，應時普地六種震動，天雨妙華，以散其上。自然音樂。空中讚言：『決定必成無上正覺』。」

## 八、專志精進

「阿難！法藏比丘於世自在王如來前及諸天人大眾之中，發斯弘誓願已，住真實慧，勇猛精進，一向專志莊嚴妙土。所修佛國開廓廣大，超勝獨妙；建立常然，無衰無變。於無量劫積植德行。不起貪瞋癡欲諸想，不著色聲香味觸法。但樂憶念過去諸佛所修善根，行寂靜行，遠離虛妄。依真諦門，植眾德本。不計眾苦，少欲知足。專求白法，惠利群生。志願無倦，忍力成就。於諸有情常懷慈忍；和顏愛語，勸喻策進。恭敬三寶，奉事師長，無有虛偽諂曲之心。莊嚴眾行，軌範具足。觀法如化，三昧常寂。善護口業，不譏他過；善護身業，不失律儀；善護意業，清淨無染。所有國城、聚落、眷屬、珍寶，都無所著。恆以佈施、持戒、忍辱、精進、禪定、智慧——六度之行，教化、安立眾生，住於無上真正之道。由成如是諸善根故，所生之處無量寶藏自然發應。或為長者居士、豪姓尊貴；或為刹利國王、轉輪聖帝；或為六欲天主，乃至梵王。於諸佛所，尊重供養，未曾間斷。如是功德，說不能盡。身、口常出無量妙香，猶如栴檀、優鉢羅華。其香普熏無量世界。隨所生處，色相端嚴。三十二相、八十種好，悉皆具足。手中常出無盡之寶、莊嚴之具。一切所須最上之

物，利樂有情。由是因緣，能令無量眾生，皆發阿耨多羅三藐三菩提心。」

## 九、佛土成就

佛告阿難：「法藏比丘修菩薩行，積功累德無量無邊，於一切法而得自在，非是語言分別之所能知。所發誓願圓滿成就。如實安住，具足莊嚴，威德廣大，清淨佛土。」

阿難聞佛所說，白世尊言：「法藏菩薩成菩提者，為是過去佛耶？未來佛耶？為今現在他方世界耶？」

世尊告言：「彼佛如來，來無所來，去無所去，無生無滅，非過現未來，但以酬願度生。現在西方，去閻浮提百千俱胝那由他佛剎，有世界名曰『極樂』。法藏成佛，號『阿彌陀』。成佛以來，於今十劫，今現在說法。有無量無數菩薩、聲聞之眾，恭敬圍繞。」

## 十、眾皆欽仰

佛說阿彌陀佛為菩薩求得是願時，阿闍王子與五百大長者，聞之皆大歡喜。各持一金華蓋，俱到佛前作禮，以華蓋上佛。已，卻坐一面聽經，心中願言：「令我等作佛時，皆如阿彌陀佛。」

佛即知之，告諸比丘：「是王子等後當作佛。彼於前世住菩薩道，無數劫來供養四百億佛。迦葉佛時，彼等為我弟子。今供養我，復相值也。」

時，諸比丘聞佛言者，莫不代之歡喜。

# 第三章 願門

## 第一節 讚歎淨土啟願

### 十一、國土嚴淨

佛語阿難：「彼極樂世界無量功德，具足莊嚴。永無眾苦、諸難、惡趣、魔惱之名；亦無四時、寒暑、雨冥之異；復無大小江海、丘陵坑坎、荊棘砂礫、鐵圍、須彌、土石等山。唯以自然七寶、黃金為地，寬廣平正，不可限極。微妙奇麗，清淨莊嚴，超逾十方一切世

界。」

阿難聞已，白世尊言：「若彼國土無須彌山，其四天王天及忉利天，依何而住？」

佛告阿難：「夜摩、兜率，乃至色無色界一切諸天，依何而住？」

阿難白言：「不可思議業力所致。」

佛語阿難：「『不思議業』，汝可知耶？汝身果報不可思議，眾生業報亦不可思議；眾生善根不可思議，諸佛聖力、諸佛世界亦不可思議。其國眾生功德善力，住行業地，及佛神力，故能爾耳。」

阿難白言：「業因果報不可思議。我於此法實無所惑。但為將來眾生破除疑網，故發斯問。」

## 十二、佛德極尊

佛告阿難：「阿彌陀佛威神光明最尊第一，十方諸佛所不能及，遍照東方恆沙佛剎。南西北方、四維上下，亦復如是。若化頂上圓光，或一、二、三、四由旬，或百、千、萬、億由旬。諸佛光明或照一二佛剎，或照百千佛剎。唯阿彌陀佛光明，普照無量無邊無數佛剎。諸佛光明所照遠近，本其前世求道所願功德大小不同；至作佛時，各自得之；自在所作，不為預計。阿彌陀佛光明善好，勝於日月之明千億萬倍。光中極尊，佛中之王。是故，無量壽佛亦號『無量光佛』，亦號『無邊光佛』、『無礙光佛』、『無等光佛』，亦號『智慧光』、『常照光』、『清淨光』、『歡喜光』、『解脫光』、『安穩光』、『超日月光』、『不思議光』。如是光明普照十方一切世界。

「其有眾生遇斯光者，垢滅善生，身意柔軟。若在三途極苦之處，見此光明，皆得休息，命終皆得解脫。若有眾生聞其光明威神、功德，日夜稱說，至心不斷，隨意所願，得生其國。」

## 十三、壽眾無量

佛語阿難：「無量壽佛壽命長久，不可稱計。又有無數聲聞之眾，神智洞達，威力自在，能於掌中持一切世界。我弟子中，大目犍連神通第一，三千大千世界所有一切星宿眾生，於一晝夜悉知其數。假使

十方眾生悉成緣覺，一一緣覺壽萬億歲，神通皆如大目犍連。盡其壽命，竭其智力，悉共推算。彼佛會中聲聞之數，千萬分中不及一分。

「譬如大海深廣無邊。設取一毛，析為百分，碎如微塵。以一毛塵，沾海一滴。此毛塵水，比海孰多？阿難！彼目犍連等所知數者，如毛塵水；所未知者，如大海水。彼佛壽量及諸菩薩、聲聞、天人，壽量亦爾，非以算計譬喻之所能知。」

#### 十四、寶樹遍國

「彼如來國多諸寶樹。或純金樹、純白銀樹、琉璃樹、水晶樹、琥珀樹、美玉樹、瑪瑙樹。唯一寶成，不雜餘寶。或有二寶、三寶，乃至七寶，轉共合成。根、莖、枝、幹，此寶所成，華、葉、果、實，他寶化作。或有寶樹，黃金為根，白銀為身，琉璃為枝，水晶為梢，琥珀為葉，美玉為華，瑪瑙為果。其餘諸樹，復有七寶互為根、幹、枝、葉、華、果，種種共成。各自異行，行行相值，莖莖相望，枝葉相向，華實相當，榮色光曜，不可勝視。清風時發，出五音聲。微妙宮商，自然相和。是諸寶樹，周遍其國。」

### 第二節 讚歎道場啟願

#### 十五、聞音獲忍

「又，其道場有菩提樹，高四百萬里。其本周圍五千由旬。枝葉四布二十萬里。一切眾寶自然合成。華果敷榮，光暉遍照。復有紅、綠、青、白，諸摩尼寶，眾寶之王，以為瓔珞。雲聚寶鎖，飾諸寶柱。金、珠、鈴、鐸周匝條間。珍妙寶網羅覆其上。百千萬色互相映飾。無量光炎照耀無極。一切莊嚴隨應而現。微風徐動，吹諸枝葉，演出無量妙法音聲。其聲流布，遍諸佛國。清暢哀亮，微妙和雅。十方世界音聲之中，最為第一。若有眾生睹菩提樹，聞聲、嗅香，嘗其果味，觸其光影，念樹功德，皆得六根清澈，無諸惱患。住不退轉，至成佛道。復由見彼樹故，獲三種忍：一、音響忍；二、

柔順忍；三者、無生法忍。」

佛告阿難：「如是佛剎華、果、樹、木，與諸眾生，而作佛事。此皆無量壽佛威神力故，本願力故，滿足願故，明了、堅固究竟願故。」

## 十六、設施明妙

「又，無量壽佛講堂精舍、樓觀欄楯，亦皆七寶自然化成。復有白珠摩尼以為交絡，明妙無比。諸菩薩眾所居宮殿，亦復如是。中有在地講經、誦經者，有在地受經、聽經者，有在地經行者、思道及坐禪者；有在虛空講、誦、受、聽者，經行、思道及坐禪者。或得須陀洹，或得斯陀含，或得阿那含、阿羅漢。未得阿惟越致者，則得阿惟越致。各自念道、說道、行道，莫不歡喜。」

## 十七、香聲清淨

「又，其講堂左右，泉池交流。縱廣深淺，皆各一等。或十由旬、二十由旬，乃至百千由旬。湛然香潔，具八功德。岸邊無數栴檀香樹、吉祥果樹，華果恆芳，光明照耀。修條密葉，交覆於池。出種種香，世無能喻。隨風散馥，沿水流芬。」

「又復，池飾七寶，地佈金沙。優鉢羅華、鉢曇摩華、拘牟頭華、芬陀利華，雜色光茂，彌覆水上。」

「若彼眾生過浴此水，欲至足者、欲至膝者、欲至腰腋、欲至頸者，或欲灌身、或欲冷者、溫者、急流者、緩流者，其水一一隨眾生意，開神悅體，淨若無形。寶沙映澈，無深不照。微瀾徐迴，轉相灌注。波揚無量微妙音聲。或聞佛法僧聲、波羅蜜聲、止息寂靜聲、無生無滅聲、十力無畏聲；或聞無性無作無我聲、大慈大悲喜捨聲、甘露灌頂受位聲。得聞如是種種聲已，其心清淨，無諸分別，正直平等、成熟善根。隨其所聞，與法相應。其願聞者，輒獨聞之；所不欲聞，了無所聞。永不退於阿耨多羅三藐三菩提心。十

方世界諸往生者，皆於七寶池蓮華中，自然化生。悉受清虛之身、無極之體。不聞三涂惡惱苦難之名。尚無假設，何況實苦。但有自然快樂之音，是故彼國名為『極樂』。」

### 第三節 讚歎聖眾啟願

#### 十八、正報莊嚴

「彼極樂國所有眾生，容色微妙，超世希有；咸同一類，無差別相。但因順餘方俗，故有天人之名。」

佛告阿難：「譬如世間貧苦乞人，在帝王邊，面貌形狀寧可類乎？帝王若比轉輪聖王，則為鄙陋；猶彼乞人在帝王邊也。轉輪聖王威相第一，比之忉利天王，又復醜劣。假令帝釋比第六天，雖百千倍，不相類也。第六天王若比極樂國中菩薩、聲聞，光顏容色，雖萬億倍，不相及逮。

「所處宮殿、衣服、飲食，猶如他化自在天王。至於威德、階位、神通變化，一切天人不可為比。百千萬億，不可計倍。

「阿難應知，無量壽佛極樂國土如是功德莊嚴，不可思議。」

#### 十九、依報隨意

「復次，極樂世界所有眾生（或已生、或現生，或當生），皆得如是諸妙色身，形貌端嚴，福德無量，智慧明了，神通自在。受用種種，一切豐足。宮殿、服飾、香花、幡蓋、莊嚴之具，隨意所須，悉皆如念。

「若欲食時，七寶鉢器自然在前，百味飲食自然盈滿。雖有此食，實無食者。但見色聞香，以意為食。色力增長，而無便穢。身心柔軟，無所味著。事已化去，時至復現。

「復有眾寶妙衣、冠帶、瓔珞，無量光明、百千妙色，悉皆具足，自然在身。

「所居舍宅，稱其形色。寶網彌覆，懸諸寶鈴。奇妙珍異，周遍校飾。光色晃曜，盡極嚴麗。樓觀、欄楯、堂宇、房閣，廣狹方圓，或大或小，或在虛空，或在平地，清淨安隱，微妙快樂。應念現前，無不具足。」

## 二十、享樂殊勝

「其佛國土每於食時，自然德風徐起，吹諸羅網及眾寶樹，出微妙音，演說苦空、無常、無我，諸波羅蜜，流佈萬種溫雅德香。其有聞者，塵勞垢習自然不起。風觸其身，安和調適，猶如比丘得滅盡定。復吹七寶林樹，飄華成聚。種種色光遍滿佛土。隨色次第，而不雜亂。柔軟光潔，如兜羅綿。足履其上，沒深四指。隨止舉已，還復如初。過食時後，其華自沒。大地清淨，更雨新華。隨其時節，還復周遍，與前無異。如是六反。」

## 二十一、安立正道

「又，眾寶蓮華周滿世界。一一寶華百千億葉。其華光明，無量種色。青色青光、白色白光。玄、黃、朱、紫，光色亦然。復有無量妙寶，百千摩尼，映飾珍奇，明曜日月。彼蓮華量，或半由旬，或一二三四，乃至百千由旬。一一華中，出三十六百千億光。一一光中，出三十六百千億佛。身色紫金，相好殊特。一一諸佛又放百千光明，普為十方說微妙法。如是諸佛，各各安立無量眾生於佛正道。」

## 二十二、極樂正定

「復次，阿難！彼佛國土，無有昏闇火光、日月星曜、晝夜之象；亦無歲月劫數之名；復無住著家室。於一切處，既無標式、名號，亦無取捨分別，唯受清淨最上快樂。若有善男子、善女人——若已生，若當生——皆悉住於正定之聚，決定證於阿耨多羅三藐三

菩提。何以故？若邪定聚及不定聚，不能了知建立彼因故。」

## 第四節 佛讚教令發願

### 二十三、佛令發願

「復次，阿難！東方恆河沙數世界，一一界中如恆沙佛。各出廣長舌相，放無量光，說誠實言，稱讚無量壽佛不可思議功德。南、西、北方恆沙世界諸佛稱讚，亦復如是。四維上下恆沙世界諸佛稱讚，亦復如是。何以故？欲令他方所有眾生，聞彼佛名，發清淨心，憶念、受持，歸依、供養。乃至能發一念淨信，所有善根至心迴向，願生彼國。隨願皆生，得不退轉，乃至無上正等菩提。」

## 第四章 行 門

### 第一節 淨 業 正 行

#### （一）眾生往生

### 二十四、念佛往生

佛告阿難：「十方世界諸天人民，其有至心願生彼國，凡有三輩：

「其上輩者。捨家棄欲而作沙門；發菩提心，一向專念『阿彌陀佛』；修諸功德，願生彼國。此等眾生臨壽終時，阿彌陀佛與諸聖眾現在其前。經須臾間，即隨彼佛往生其國，便於七寶華中自然化生。智慧勇猛，神通自在。是故，阿難！其有眾生欲於今世見阿彌陀佛者，應發無上菩提之心，復當專念極樂國土；積集善根，應持迴向。由此見佛，生彼國中，得不退轉，乃至無上菩提。

「其中輩者。雖不能行作沙門，大修功德；當發無上菩提之心，一向專念『阿彌陀佛』；隨己修行諸善功德，奉持齋戒，起立塔像，飯食沙門，懸繒燃燈，散華燒香。以此迴向，願生彼國。其人臨終，

阿彌陀佛化現其身，光明相好，具如真佛。與諸大眾，前後圍繞，現其人前，攝受導引。即隨化佛往生其國，住不退轉，無上菩提。功德智慧次如上輩者也。

「其下輩者。假使不能作諸功德；當發無上菩提之心，一向專念『阿彌陀佛』；歡喜信樂，不生疑惑，以至誠心，願生其國。此人臨終，夢見彼佛，亦得往生。功德智慧次如中輩者也。

「若有眾生住大乘者，以清淨心，向無量壽，乃至十念願生其國；聞甚深法，即生信解；乃至獲得一念淨心，發一念心念於彼佛。此人臨命終時，如在夢中見阿彌陀佛，定生彼國，得不退轉無上菩提。」

## 二十五、往生正因

「復次，阿難！若有善男子、善女人，聞此經典，受持讀誦，書寫供養，晝夜相續，求生彼剎；發菩提心，持諸禁戒，堅守不犯；饒益有情，所作善根悉施與之，令得安樂；憶念西方阿彌陀佛及彼國土。是人命終，如佛色相，種種莊嚴，生寶剎中，速得聞法，永不退轉。

「復次，阿難！若有眾生欲生彼國，雖不能大精進、禪定，盡持經戒；要當作善。所謂：一、不殺生；二、不偷盜；三、不淫慾；四、不妄言；五、不綺語；六、不惡口；七、不兩舌；八、不貪；九、不瞋；十、不癡。如是晝夜思惟，極樂世界阿彌陀佛種種功德、種種莊嚴；志心歸依，頂禮供養。是人臨終不驚不怖，心不顛倒，即得往生彼佛國土。

「若多事物，不能離家；不暇大修齋戒，一心清淨。有空閒時，端正身心，絕欲去憂，慈心精進。不當瞋怒、嫉妒，不得貪饕慳惜，不得中悔，不得狐疑。要當孝順，至誠忠信。當信佛經語深，當信作善得福。奉持如是等法，不得虧失。思惟熟計，欲得度脫，晝夜

常念，願欲往生阿彌陀佛清淨佛國。十日十夜，乃至一日一夜，不斷絕者，壽終皆得往生其國。

「行菩薩道諸往生者，皆得阿惟越致，皆具金色三十二相，皆當作佛。欲於何方佛國作佛，從心所願。隨其精進早晚，求道不休，會當得之，不失其所願也。

「阿難！以此義利故，無量無數不可思議無有等等無邊世界諸佛如來，皆共稱讚無量壽佛所有功德。」

## (二) 菩薩修持

### 二十六、禮佛聞法

「復次，阿難！十方世界諸菩薩眾，為欲瞻禮極樂世界無量壽佛，各以香華幢幡寶蓋，往詣佛所，恭敬供養，聽受經法，宣佈道化，稱讚佛土功德莊嚴。」

爾時，世尊即說頌曰：

「東方諸佛刹，數如恆河沙。  
恆沙菩薩眾，往禮無量壽。  
南西北四維，上下亦復然。  
咸以尊重心，奉諸珍妙供。  
暢發和雅音，歌歎最勝尊。  
究達神通慧，遊入深法門。  
聞佛聖德名，安穩得大利。  
種種供養中，勤修無懈倦。  
觀彼殊勝刹，微妙難思議。  
功德普莊嚴，諸佛國難比。  
因發無上心，願速成菩提。  
應時無量尊，微笑現金容。  
光明從口出，遍照十方國；

迴光還繞佛，三匝從頂入。  
菩薩見此光，即證不退位。  
時會一切眾，互慶生歡喜。  
佛語梵雷震，八音暢妙聲。  
十方來正士，吾悉知彼願。  
志求嚴淨土，受記當作佛。  
覺了一切法，猶如夢幻響。  
滿足諸妙願，必成如是剎。  
知土如影像，恆發弘誓心。  
究竟菩薩道，具諸功德本。  
修勝菩提行，受記當作佛。  
通達諸法性，一切空無我。  
專求淨佛土，必成如是剎。  
聞法樂受行，得至清淨處。  
必於無量尊，受記成等覺。  
無邊殊勝剎，其佛本願力。  
聞名欲往生，自致不退轉。  
菩薩興至願，願己國無異。  
普念度一切 各發菩提心。  
捨彼輪迴身，俱令登彼岸。  
奉事萬億佛，飛化遍諸剎。  
恭敬歡喜去，還到安養國。」

## 二十七、遍供諸佛

佛語阿難：「彼國菩薩承佛威神，於一食頃，復往十方無邊淨剎，供養諸佛。華香、幢幡供養之具，應念即至，皆現手中。珍妙殊特，非世所有，以奉諸佛及菩薩眾。其所散華，即於空中，合為

一華。華皆向下，端圓周匝，化成華蓋。百千光色，色色異香，香氣普薰。蓋之小者，滿十由旬。如是轉倍，乃至遍覆三千大千世界。隨其前後，以次化沒。若不更以新華重散，前所散華終不復落。於虛空中共奏天樂，以微妙音歌歎佛德。

「經須臾間，還其本國，都悉集會七寶講堂。無量壽佛則為廣宣大教，演暢妙法。莫不歡喜，心解得道。即時，香風吹七寶樹，出五音聲。無量妙華隨風四散。自然供養，如是不絕。一切諸天皆齎百千華香、萬種伎樂，供養彼佛及諸菩薩、聲聞之眾。前後往來，熙怡快樂。此皆無量壽佛本願加威，及曾供養如來善根相續，無缺減故、善修習故、善攝取故、善成就故。」

## 二十八、廣度眾生

佛告阿難：「彼佛國中，諸菩薩眾悉皆洞視、徹聽八方、上下、去、來、現在之事。諸天人民以及蜎飛蠕動之類心意善惡、口所欲言、何時度脫、得道往生，皆豫知之。」

「又，彼佛刹諸聲聞眾身光一尋；菩薩光明照百由旬。有二菩薩最尊第一，威神光明普照三千大千世界。」

阿難白佛：「彼二菩薩其號云何？」

佛言：「一名『觀世音』；一名『大勢至』。此二菩薩於娑婆界修菩薩行，往生彼國，常在阿彌陀佛左右。欲至十方無量佛所，隨心則到。現居此界，作大利樂。世間善男子、善女人，若有急難恐怖，但自歸命觀世音菩薩，無不得解脫者。」

## 二十九、願力宏深

「復次，阿難！彼佛刹中，所有現在、未來一切菩薩，皆當究竟一生補處。唯除大願入生死界，為度群生，作師子吼，擐大甲冑，以宏誓功德而自莊嚴。雖生五濁惡世，示現同彼，直至成佛，不受惡趣。生生之處，常識宿命。無量壽佛意欲度脫十方世界諸眾生類，

皆使往生其國，悉令得泥洹道。作菩薩者，令悉作佛。既作佛已，轉相教授，轉相度脫。如是輾轉，不可復計。十方世界聲聞、菩薩、諸眾生類，生彼佛國、得泥洹道、當作佛者，不可勝數。

「彼佛國中，常如一法，不為增多。所以者何？猶如大海，為水中王。諸水流行，都入海中。是大海水寧為增減？八方上下，佛國無數。阿彌陀國長久廣大，明好快樂，最為獨勝。本其為菩薩時求道所願，累德所致。無量壽佛恩德佈施八方上下，無窮無極，深大無量，不可勝言。」

### 三十、解行相應

「復次，阿難！彼佛剎中一切菩薩，禪定、智慧、神通、威德，無不圓滿。諸佛密藏，究竟明了。調伏諸根，身心柔軟。深入正慧，無復餘習。依佛所行七覺聖道，修行五眼，照真達俗。肉眼簡擇，天眼通達，法眼清淨，慧眼見真，佛眼具足，覺了法性。辯才總持，自在無礙。善解世間無邊方便。所言誠諦，深入義味。度諸有情，演說正法。無相無為、無縛無脫，無諸分別，遠離顛倒。於所受用，皆無攝取。遍遊佛剎，無愛無厭，亦無希求不希求想，亦無彼我違怨之想。何以故？彼諸菩薩於一切眾生有大慈悲利益心故，捨離一切執著，成就無量功德。以無礙慧，解法如如。善知集滅，音聲方便。不欣世語，樂在正論。知一切法悉皆空寂。生身煩惱，二餘俱盡。於三界中，平等勤修究竟一乘，至於彼岸。決斷疑網，證無所得。以方便智，增長了知。從本以來，安住神通。得一乘道，不由他悟。」

### 三十一、定慧等持

「其智宏深，譬如巨海。菩提高廣，喻若須彌。自身威光，超於日月。其心潔白，猶如雪山。忍辱如地，一切平等。清淨如水，洗諸塵垢。熾盛如火，燒煩惱薪。不著如風，無諸障礙。法音雷震，

覺未覺故。雨甘露法，潤眾生故。曠若虛空，大慈等故。如淨蓮華，離染污故。如尼拘樹，覆蔭大故。如金剛杵，破邪執故。如鐵圍山，眾魔外道不能動故。其心正直，善巧決定。論法無厭，求法不倦。戒若琉璃，內外明潔。其所言說，令眾悅服。擊法鼓、建法幢、曜慧日、破癡闇。淳淨溫和，寂定明察。為大導師，調伏自他。引導群生，捨諸愛著；永離三垢，遊戲神通；因緣願力，出生善根；摧伏一切魔軍，尊重奉事諸佛。為世明燈，最勝福田。殊勝吉祥，堪受供養。赫奕歡喜，雄猛無畏。身色相好，功德辯才，具足莊嚴，無與等者。常為諸佛所共稱讚。究竟菩薩諸波羅蜜。而常安住不生不滅諸三摩地。行遍道場，遠二乘境。

「阿難！我今略說，彼極樂界所生菩薩真實功德，悉皆如是。若廣說者，百千萬劫不能窮盡。」

### （三）佛令往生

#### 三十二、求生極樂

佛告彌勒菩薩、諸天人等：「無量壽國聲聞、菩薩，功德、智慧不可稱說。又，其國土微妙、安樂、清淨若此，何不力為善，念道之自然？出入供養，觀經行道，喜樂久習，才猛智慧。心不中迴，意無懈時。外若遲緩，內獨駛急。容容虛空，適得其中。中表相應，自然嚴整。檢斂端直，身心潔淨。無有愛貪，志願安定。無增缺減。求道和正，不誤傾邪。隨經約令，不敢蹉跌。若於繩墨，咸為道慕。曠無他念，無有憂思。自然無為，虛空無立。淡安無欲。作得善願。盡心求索。含哀慈愍。禮義都合。苞羅表裡。過度解脫。自然保守真真潔白。志願無上淨定安樂。一旦開達明徹，自然中之自然相，自然之有根本，自然光色參迴。轉變最勝，鬱單成七寶，橫攬成萬物。光精明俱出，善好殊無比。著於無上下，洞達無邊際。宜各勤精進，努力自求之。必得超絕去，往生無量清淨阿彌陀佛國。橫截

於五趣，惡道自閉塞。無極之勝道，易往而無人。其國不逆違，自然所牽隨。捐志若虛空，勤行求道德。可得極長生，壽樂無有極。何為著世事，譏譏憂無常。」

## 第二節 淨業助行

### 三十三、厭離濁世

「世人共爭不急之務，於此劇惡極苦之中，勤身營務，以自給濟。尊卑、貧富、少長、男女，累念積慮，為心走使。無田憂田，無宅憂宅。眷屬財物，有無同憂。有一少一，思欲齊等。適小具有，又憂非常。水、火、盜、賊、怨家、債主，焚、漂、劫、奪，消散磨滅。心慳意固，無能縱捨。命終棄捐，莫誰隨者。貧富同然，憂苦萬端。世間人民（父子、兄弟、夫婦、親屬……），當相敬愛，無相憎嫉。有無相通，無得貪惜。言色常和，莫相違戾。或時心諍，有所恚怒，後世轉劇，至成大怨。世間之事，更相患害。雖不臨時，應急想破。人在愛欲之中，獨生獨死、獨去獨來。苦樂自當，無有代者。善惡變化，追逐所生。道路不同，會見無期。何不於強健時努力修善？欲何待乎？

「世人善惡，自不能見；吉凶禍福，競各作之。身愚神闇，轉受餘教。顛倒相續，無常根本。蒙冥抵突，不信經法。心無遠慮，各欲快意。迷於瞋恚，貪於財色，終不休止。哀哉可傷！先人不善，不識道德，無有語者，殊無怪也。死生之趣，善惡之道，都不之信，謂無有是。更相瞻視，且自見之。或父哭子，或子哭父；兄弟夫婦，更相哭泣。一死一生，迭相顧戀。憂愛結縛，無有解時。思想恩好，不離情欲。不能深思熟計，專精行道。年壽旋盡，無可奈何。惑道者眾，悟道者少。各懷殺毒，惡氣冥冥。為妄興事，違逆天地。恣意罪極，頓奪其壽。下入惡道，無有出期。若曹當熟思計：遠離眾惡，擇其善者，勤而行之。愛欲榮華，不可常保，皆當別離，無可樂者。當勤精進，生安樂國。智慧明達，功德殊勝。勿得隨心所欲，虧負經戒，在人後也。」

### 三十四、勤修善法

彌勒白言：「佛語教誡，甚深甚善！皆蒙慈恩，解脫憂苦。佛為法王，尊超群聖；光明徹照，洞達無極；普為一切天人之師。今得值佛，復聞無量壽聲，靡不歡喜，心得開明。」

佛告彌勒：「敬於佛者，是為大善。實當念佛，截斷狐疑。拔諸愛欲，杜眾惡源。遊步三界，無所罣礙。開示正道，度未度者。若曹當知：十方人民永劫以來，輾轉五道，憂苦不絕。生時苦痛，老亦苦痛，病極苦痛，死極苦痛。惡臭不淨，無可樂者。宜自決斷，洗除心垢。言行忠信，表裡相應。人能自度，轉相拯濟。至心求願，積累善本。雖一世精進勤苦，須臾間耳。後生無量壽國，快樂無極。永拔生死之本，無復苦惱之患。壽千萬劫，自在隨意。宜各精進，求心所願，無得疑悔，自為過咎。生彼邊地七寶城中，於五百歲，受諸厄也。」

彌勒白言：「受佛明誨，專精修學。如教奉行，不敢有疑。」

### 三十五、嚴持戒法

佛告彌勒：「汝等能於此世端心正意，不為眾惡，甚為大德。所以者何？十方世界善多惡少，易可開化。唯此五惡世間，最為劇苦。我今於此作佛，教化群生。令捨五惡、去五痛、離五燒，降化其意；令持五善，獲其福德。何等為五？

「其一者。世間諸眾生類，欲為眾惡。強者伏弱，轉相剋賊，殘害殺傷，迭相吞噉。不知為善，後受殃罰；故有窮乞、孤獨、聾盲、瘖啞、癡惡、尪狂。皆因前世不信道德，不肯為善。其有尊貴、豪富、賢明、長者、智勇、才達，皆由宿世慈孝、修善、積德所致。世間有此目前現事，壽終之後，入其幽冥。轉生受身，改形易道。故有泥犁、禽獸、螭飛、蠕動之屬。譬如世法牢獄、劇苦、極刑。魂神命精隨罪趣向。所受壽命或長或短。相從共生，更相報償。殃惡未盡，終不得離。輾轉其中，累劫難出。難得解脫，痛不可言。天地之間自然有是。雖不即時暴

應，善惡會當歸之。

「其二者。世間人民不順法度，奢淫驕縱，任心自恣。居上不明，在位不正。陷人冤枉，損害忠良。心口各異，機偽多端。尊卑中外更相欺誑。瞋恚愚癡，欲自厚己，欲貪多有。利害、勝負，結忿成讎。破家亡身，不顧前後。富有慳惜，不肯施與。愛保貪重，心勞身苦。如是至竟，無一隨者。善惡禍福，追命所生。或在樂處，或入苦毒。又，或見善憎謗，不思慕及。常懷盜心，悻望他利。用自供給，消散復取。神明剋識，終入惡道。自有三途，無量苦惱。輾轉其中，累劫難出，痛不可言。

「其三者。世間人民相因寄生，壽命幾何？不良之人，身心不正，常懷邪惡，常念姪姩。煩滿胸中，邪態外逸。費損家財，事為非法。所當求者，而不肯為！又或交結聚會，興兵相伐。攻劫殺戮，強奪迫脅，歸給妻子。極身作樂，眾共憎厭，患而苦之。如是之惡，著於人鬼，神明記識。自入三途，無量苦惱。輾轉其中，累劫難出，痛不可言。

「其四者。世間人民不念修善，兩舌、惡口、妄言、綺語。憎嫉善人，敗壞賢明。不孝父母，輕慢師長。朋友無信，難得誠實。尊貴自大，謂己有道。橫行威勢，侵易於人。欲人畏敬，不自慚懼。難可降化，常懷驕慢。賴其前世福德營護，今世為惡。福德盡滅，壽命終盡，諸惡繞歸。又其名籍記在神明。殃咎牽引，無從捨離。但得前行，入於火鑊。身心摧碎，神形苦極。當斯之時，悔復何及！

「其五者。世間人民徒倚懈怠，不肯作善、治身、修業。父母教誨，違戾反逆。譬如怨家，不如無子。負恩違義，無有報償。放恣、遊散、耽酒、嗜美、魯扈、抵突。不識人情，無義、無禮，不可諫曉。六親眷屬資用有無，不能憂念。不惟父母之恩，不存師友之義。意念、身、口，曾無一善。不信諸佛經法，不信生死善惡。欲害真人，鬥亂僧眾。愚癡蒙昧，自為智慧。不知生所從來，死所趣向。不仁、不順，希望長生。

慈心教誨，而不肯信；苦口與語，無益其人。心中閉塞，意不開解。大命將終，悔懼交至。不豫修善，臨時乃悔。悔之於後，將何及乎？

「天地之間，五道分明。善惡報應，禍福相承。身自當之，無誰代者。善人行善，從樂入樂，從明入明。惡人行惡，從苦入苦，從冥入冥。誰能知者？獨佛知耳。教語開示，信行者少。生死不休，惡道不絕。如是世人，難可俱盡。故有自然三塗，無量苦惱。輾轉其中，世世累劫。無有出期，難得解脫，痛不可言。如是五惡、五痛、五燒，譬如大火，焚燒人身。若能自於其中，一心制意，端身正念；言行相副，所作至誠；獨作諸善，不為眾惡。身獨度脫，獲其福德，可得長壽、泥洹之道。是為五大善也。」

### 三十六、斷除惡法

佛告彌勒：「吾語汝等，如是五惡、五痛、五燒，輾轉相生。敢有犯此，當歷惡趣。或其今世，先被病殃，死生不得，示眾見之。或於壽終，入三惡道，愁痛酷毒，自相焦然。共其怨家，更相殺傷。從小微起，成大困劇。皆由貪著財色，不肯施惠；各欲自快，無復曲直；癡欲所迫，厚己爭利；富貴榮華，當時快意；不能忍辱，不務修善。威勢無幾隨以磨滅。天道施張，自然糾舉。兢兢忪忪，當入其中。古今有是，痛哉可傷。

「汝等得佛經語，熟思惟之。各自端守，終身不怠。尊聖敬善，仁慈博愛。當求度世，拔斷生死眾惡之本；當離三塗，憂怖苦痛之道。若曹作善，云何第一？當自端心，當自端身。耳、目、口、鼻，皆當自端。身心淨潔，與善相應。勿隨嗜欲，不犯諸惡。言色當和，身行當專。動作瞻視安定徐為。作事倉卒，敗悔在後。為之不諦亡其功夫。」

### 三十七、奉持經戒

「汝等廣植德本，勿犯道禁，忍辱精進，慈心專一，齋戒清淨，一日一夜，勝在無量壽國為善百歲。所以者何？彼佛國土皆積德眾善，

無毫髮之惡。於此修善，十日十夜，勝於他方諸佛國中為善千歲。所以者何？他方佛國福德自然，無造惡之地。唯此世間，善少惡多。飲苦食毒，未嘗寧息。

「吾哀汝等，苦心誨喻，授與經法。悉持思之，悉奉行之。尊卑、男女、眷屬、朋友，轉相教語，自相約檢。和順義理，歡樂慈孝。所作如犯，則自悔過。去惡就善，朝聞夕改。奉持經戒，如貧得寶。改往修來，洒心易行。自然感降，所願輒得。

「佛所行處，國邑丘聚靡不蒙化。天下和順，日月清明。風雨以時，災厲不起。國豐民安，兵戈無用。崇德興仁，務修禮讓。國無盜賊，無有冤枉。強不凌弱，各得其所。

「我哀汝等，甚於父母念子。我於此世作佛，以善攻惡，拔生死之苦；令獲五德，升無為之安。吾般泥洹，經道漸滅。人民諂偽，復為眾惡。五燒、五痛，久後轉劇。汝等轉相教誡，如佛經法，無得犯也。」

彌勒菩薩合掌白言：「世人惡苦如是如是，佛皆慈哀，悉度脫之。受佛重誨，不敢違失。」

## 第五章 信 門

### 三十八、目睹生信

佛告阿難：「若曹欲見無量清淨平等覺及諸菩薩、阿羅漢等所居國土，應起西向，當日沒處，恭敬頂禮，稱念：『南無阿彌陀佛』。」

阿難即從座起，面西合掌，頂禮白言：「我今願見極樂世界阿彌陀佛，供養奉事，種諸善根。」頂禮之間，忽見：阿彌陀佛容顏廣大，色相端嚴，如黃金山，高出一切諸世界上。又聞：十方世界諸佛如來稱揚讚歎阿彌陀佛種種功德，無礙無斷。

阿難白言：「彼佛淨刹得未曾有。我亦願樂生於彼土。」

世尊告言：「其中生者，已曾親近無量諸佛，植眾德本。汝欲生彼，應當一心歸依瞻仰。」

作是語時，阿彌陀佛即於掌中放無量光，普照一切諸佛世界。時諸佛國，皆悉明現，如處一尋。以阿彌陀佛殊勝光明、極清淨故；於此世界——所有黑山、雪山、金剛、鐵圍、大小諸山、江河、叢林、天人宮殿，一切境界無不照見。譬如日出，明照世間；乃至泥犁、溪谷、幽冥之處，悉大開闢，皆同一色。猶如劫水彌滿世界。其中萬物，沉沒不現。混養浩汗，唯見大水。彼佛光明亦復如是。聲聞、菩薩，一切光明悉皆隱蔽。唯見佛光，明耀顯赫。此會四眾、天龍八部、人非人等，皆見極樂世界種種莊嚴。阿彌陀佛於彼高座，威德巍巍，相好光明。聲聞、菩薩圍繞恭敬。譬如須彌山王出於海面，明現照耀，清淨平正。無有雜穢及異形類；唯是眾寶莊嚴，聖賢共住。

阿難及諸菩薩眾等，皆大歡喜，踊躍作禮，以頭著地，稱念：「南無阿彌陀三藐三佛陀」。諸天人民以至蜎飛蠕動，睹斯光者，所有疾苦莫不休止，一切憂惱莫不解脫，悉皆慈心作善，歡喜快樂。鐘磬琴瑟、箜篌樂器，不鼓自然皆作五音。諸佛國中，諸天人民各持花香，來於虛空，散作供養。

爾時，極樂世界過於西方百千俱胝那由他國，以佛威力，如對目前，如淨天眼觀一尋地。彼見此土亦復如是，悉睹娑婆世界，釋迦如來及比丘眾，圍繞說法。

### 三十九、聖言證信

爾時，佛告阿難及慈氏菩薩：「汝見極樂世界宮殿、樓閣、泉池、林樹，具足微妙、清淨、莊嚴不？汝見欲界諸天，上至色究竟天，雨諸香華，遍佛剎不？」

阿難對曰：「唯然，已見。」

「汝聞阿彌陀佛大音宣佈一切世界，化眾生不？」

阿難對曰：「唯然，已聞。」

佛言：「汝見彼國淨行之眾，遊處虛空，宮殿隨身，無所障礙，遍至十方供養諸佛不？及見彼等念佛相續不？復有眾鳥住虛空界，出種種音，皆是化作。汝悉見不？」

慈氏白言：「如佛所說，一一皆見。」

佛告彌勒：「彼國人民有胎生者，汝復見不？」

彌勒白言：「世尊！我見極樂世界人住胎者，如夜摩天處於宮殿；又見眾生，於蓮華內結跏趺坐，自然化生。何因緣故，彼國人民有胎生者，有化生者？」

#### 四十、除疑堅信

佛告慈氏：「若有眾生以疑惑心修諸功德，願生彼國；不了佛智、不思議智、不可稱智、大乘廣智、無等無倫最上勝智，於此諸智疑惑不信；猶信罪福，修習善本，願生其國。復有眾生積集善根，希求佛智、普遍智、無等智、威德廣大不思議智；於自善根不能生信。故於往生清淨佛國，意志猶豫，無所專據；然猶續念不絕。結其善願為本，續得往生。是諸人等以此因緣，雖生彼國，不能前至無量壽所，道止佛國邊界七寶城中。佛不使爾，身行所作，心自趣向。亦有寶池蓮華，自然受身，飲食快樂如忉利天。於其城中，不能得出。所居舍宅在地，不能隨意高大。於五百歲，常不見佛，不聞經法，不見菩薩、聲聞聖眾。其人智慧不明，知經復少，心不開解，意不歡樂。是故。於彼謂之『胎生』。」

「若有眾生明信佛智，乃至勝智；斷除疑惑，信己善根；作諸功德，至心迴向；皆於七寶華中自然化生，跏趺而坐。須臾之頃，身相、光明、智慧、功德如諸菩薩，具足成就。彌勒！當知，彼化生者，智慧勝故。」

「其胎生者，五百歲中，不見三寶，不知菩薩法式，不得修習功德，無因奉事無量壽佛。當知此人宿世之時，無有智慧，疑惑所

致。」

#### 四十一、解惑深信

「譬如轉輪聖王有七寶獄。王子得罪，禁閉其中。層樓綺殿，寶帳金床，欄窗榻座，妙飾奇珍。飲食衣服，如轉輪王，而以金鎖繫其兩足。諸小王子寧樂此不？」

慈氏白言：「不也。世尊！彼幽繫時，心不自在。但以種種方便，欲求出離。求諸近臣，終不從心。輪王歡喜，方得解脫。」

佛告彌勒：「此諸眾生亦復如是。若有墮於疑悔，希求佛智、至廣大智；於自善根不能生信，由聞佛名，起信心故。雖生彼國，於蓮華中，不得出現。彼處華胎，猶如園苑宮殿之想。何以故？彼中清淨，無諸穢惡。然於五百歲中，不見三寶，不得供養奉事諸佛，遠離一切殊勝善根。以此為苦，不生欣樂。若此眾生識其罪本，深自悔責，求離彼處。往昔世中過失盡已，然後乃出，即得往詣無量壽所，聽聞經法。久久亦當開解、歡喜，亦得遍供無數無量諸佛，修諸功德。汝阿逸多，當知疑惑於諸菩薩為大損害，為失大利。是故，應當明信諸佛無上智慧。」

慈氏白言：「云何此界一類眾生雖亦修善，而不求生？」

佛告慈氏：「此等眾生智慧微淺，分別西方不及天界；是以非樂，不求生彼。」

慈氏白言：「此等眾生虛妄分別，不求佛刹，何免輪迴？」

佛言：「彼等所種善根，不能離相，不求佛慧，深著世樂、人間福報。雖復修福，求人天果。得報之時，一切豐足，而未能出三界獄中。假使父母、妻子、男女眷屬，欲相救免。邪見業王未能捨離，常處輪迴而不自在。汝見愚癡之人，不種善根，但以世智聰辯增益邪心。云何出離生死大難！復有眾生，雖種善根，作大福田；取相分別，情執深重。求出輪迴，終不能得。若以無相智慧，植眾

德本，身心清淨，遠離分別，求生淨刹，趣佛菩提。當生佛刹，永得解脫。」

## 四十二、以例催信

彌勒菩薩白佛言：「今此娑婆世界及諸佛刹，不退菩薩當生極樂國者，其數幾何？」

佛告彌勒：「於此世界，有七百二十億菩薩，已曾供養無數諸佛，植眾德本，當生彼國。諸小行菩薩修習功德、當往生者，不可稱計。

「不但我刹諸菩薩等往生彼國，他方佛土亦復如是。從遠照佛刹，有十八俱胝那由他菩薩摩訶薩，生彼國土。東北方寶藏佛刹有九十億不退菩薩，當生彼國。從無量音佛刹、光明佛刹、龍天佛刹、勝力佛刹、師子佛刹、離塵佛刹、德首佛刹、仁王佛刹、華幢佛刹，不退菩薩當往生者，或數十百億，或數百千億，乃至萬億。其第十二佛名『無上華』。彼有無數諸菩薩眾，皆不退轉，智慧勇猛，已曾供養無量諸佛，具大精進，發趣一乘；於七日中，即能攝取百千億劫大士所修堅固之法。斯等菩薩皆當往生。其第十三佛名曰『無畏』。彼有七百九十億大菩薩眾，諸小菩薩及比丘等，不可稱計，皆當往生。十方世界諸佛名號，及菩薩眾當往生者，但說其名，窮劫不盡。」

## 四十三、以利誘信

佛告慈氏：「汝觀彼諸菩薩摩訶薩善獲利益。若有善男子、善女人，得聞阿彌陀佛名號，能生一念喜愛之心，歸依瞻禮，如說修行；當知，此人為得大利，當獲如上所說功德，心無下劣，亦不貢高，成就善根，悉皆增上；當知，此人非是小乘，於我法中，得名第一弟子。是故，告汝天人、世間、阿修羅、等，應當愛樂修習，生希有心；於此經中，生導師想。欲令無量眾生速疾安住，得不退

轉，及欲見彼廣大莊嚴，攝受殊勝佛刹，圓滿功德者，當起精進，聽此法門；為求法故，不生退屈諂偽之心；設入大火，不應疑悔。何以故？彼無量億諸菩薩等，皆悉求此微妙法門，尊重聽聞，不生違背。多有菩薩欲聞此經而不能得。是故，汝等應求此法。」

#### 四十四、以德導信

「若於來世，乃至正法滅時，當有眾生植諸善本，已曾供養無量諸佛。由彼如來加威力故，能得如是廣大法門，攝取受持；當獲廣大一切智智。於彼法中，廣大勝解，獲大歡喜，廣為他說，常樂修行。諸善男子及善女人，能於是法，若已求、現求、當求者，皆獲善利。汝等應當安住無疑，種諸善本；應常修習，使無疑滯，不入一切種類珍寶成就牢獄。」

「阿逸多，如是等類大威德者，能生佛法廣大異門。由於此法不聽聞故，有一億菩薩退轉阿耨多羅三藐三菩提。」

「若有眾生於此經典書寫、供養、受持、讀誦，於須臾頃為他演說，勸令聽聞，不生憂惱，乃至晝夜思惟彼刹及佛功德；於無上道終不退轉。彼人臨終，假使三千大千世界滿中大火，亦能超過，生彼國土。是人已曾值過去佛，受菩提記，一切如來同所稱讚。是故，應當專心信受、持誦、說行。」

#### 四十五、以難激信

「吾今為諸眾生說此經法，令見無量壽佛，及其國土一切所有。所當為者，皆可求之。無得以我滅度之後，復生疑惑。當來之世，經道滅盡。我以慈悲哀愍，特留此經止住百歲。其有眾生值斯經者，隨意所願，皆可得度。」

「如來興世，難值難見。諸佛經道，難得難聞。遇善知識，聞法能行，此亦為難。若聞斯經，信樂受持，難中之難，無過此難。若有眾生得聞佛聲，慈心清淨，踊躍歡喜，衣毛為起，或淚出者，

皆由前世曾作佛道，故非凡人。若聞佛號，心中狐疑，於佛經語都無所信，皆從惡道中來。宿殃未盡，未當度脫，故心狐疑，不信向耳。」

#### 四十六、佛語勸信

佛告彌勒：「諸佛如來無上之法，十力無畏、無礙無著甚深之法，及波羅蜜等菩薩之法，非易可遇。能說法人亦難開示，堅固深信，時亦難遭。我今如理宣說如是廣大微妙法門，一切諸佛之所稱讚。付囑汝等，作大守護。為諸有情長夜利益。莫令眾生淪墮五趣，備受危苦。應勤修行，隨順我教。當孝於佛，常念師恩。當令是法久住不滅。當堅持之，無得毀失；無得為妄，增減經法。常念不絕，則得道捷。我法如是，作如是說。如來所行，亦應隨行。種修福善，求生淨刹。」

#### 四十七、佛偈勸信

爾時，世尊而說頌曰：

「若不往昔修福慧，於此正法不能聞。  
已曾供養諸如來，則能歡喜信此事。  
惡驕懈怠及邪見，難信如來微妙法。  
譬如盲人恆處闇，不能開導於他路。  
唯曾於佛植眾善，救世之行方能修。  
聞已受持及書寫，讀誦讚演並供養。  
如是一心求淨方，決定往生極樂國。  
假使大火滿三千，乘佛威德悉能超。  
如來深廣智慧海，唯佛與佛乃能知。  
聲聞億劫思佛智，盡其神力莫能測。  
如來功德佛自知，唯有世尊能開示。  
人身難得佛難值，信慧聞法難中難。」

若諸有情當作佛，行超普賢登彼岸。  
是故博聞諸智士，應信我教如實言。  
如是妙法幸聽聞，應常念佛而生喜。  
受持廣度生死流，佛說此人真善友。」

## 第六章 付 囑 流 通

### 四十八、法會圓滿

爾時，世尊說此經法。天人、世間有萬二千那由他億眾生，遠離塵垢，得法眼淨。二十億眾生得阿那含果、六千八百比丘諸漏已盡，心得解脫。四十億菩薩於無上菩提住不退轉，以弘誓功德而自莊嚴。二十五億眾生得不退忍。四萬億那由他百千眾生於無上菩提未曾發意，今始初發，種諸善根，願生極樂，見阿彌陀佛。皆當往生彼如來土，各於異方次第成佛，同名『妙音如來』。

復有十方佛刹，若現在生，及未來生，見阿彌陀佛者，各有八萬俱胝那由他人得受記法忍，成無上菩提。彼諸有情皆是阿彌陀佛宿願因緣，俱得往生極樂世界。

爾時，三千大千世界六種震動，並現種種希有神變，放大光明，普照十方。復有諸天於虛空中，作妙音樂，出隨喜聲。乃至色界諸天悉皆得聞，歎未曾有。無量妙花紛紛而降。尊者阿難、彌勒菩薩及諸菩薩、聲聞、天龍八部、一切大眾，聞佛所說，皆大歡喜，信受奉行。

# 《無量壽經》科

(夏蓮居會集本修訂版)

┌①序分 教起因緣	┌①通序 六種成就	第01品	法會開啟			
	└②別序	┌①緒論 概說佛法	第02品 德尊普賢			
		└②瑞示大法	第03品 請法功德			
└②正宗分	┌①淨土法門	┌①	第04品 法系師承			
		②	第05品 法門宗旨			
		③	第06品 宏誓示法			
		④	第07品 偈說法門			
		⑤	第08品 專志精進			
		⑥	第09品 淨土成就			
		└⑦	第10品 普皆欽仰			
	└②淨土資糧	┌①願門	┌①讚歎佛國啟願	┌①	第11品 圍土嚴淨	
			②	第12品 佛德極尊		
			③	第13品 壽眾無量		
			└④	第14品 寶樹遍國		
			└②讚歎道場啟願	┌①	第15品 聞音獲忍	
			②	第16品 設施明妙		
			└③讚歎聖眾啟願	┌③	第17品 香聲清淨	
			①	第18品 正報莊嚴		
			②	第19品 依報隨意		
			③	第20品 享樂殊勝		
			④	第21品 安立正道		
			└⑤	第22品 極樂正定		
			└④佛讚教令發願	第23品 佛令發願		
	└②行門	┌①淨業正行	┌①眾生往生	┌①	第24品 念佛往生	
				└②	第25品 往生正因	
				└②菩薩修持	┌①	第26品 禮佛聞法
				②	第27品 遍供諸佛	



# 《楞嚴》指要

## 序

道書傳述道法。道法特徵有二：秘密性與奧密性，故亦稱「密法」。秘密者，關鍵之處或秘而不宣，或曲言隱晦，故而「佛法無人說，雖智不能解」。奧密者，未經證入不解其義，故曰「不可思議」。

《楞嚴經》傳道法密法，古德判為密教。

《楞嚴經》乃重要佛典，註疏者眾。每見泛泛之言註之詳詳，而要要之言疏之忽忽。其故有二：一由佛，二由人。

由佛者。法興有時。時至法顯，佛菩薩自會出世弘法闡教。或肉身示現，或冥中加持。時機未屆，自有護法神嚴戒，人天不得近其法相。洩露天機者，神遭天譴，人受冥誅。《楞嚴經》屬釋迦末劫教法。正、像時期法不當顯，人天焉得窺其堂奧。

由人者。漢傳大乘教內，僧分道者與學者。道者志在修證，而學者志在著述。莘莘筆耕者，大多有修無證，乃至無修無證。於是乎「知者不言，言者不知」。乃至「以其昏昏，使人昭昭」耳。

課題組

## 目 錄

第一章 教門 .....	117
第二章 理門 .....	118
第一節 空有範疇 .....	119
第二節 性相範疇 .....	121
第三章 行門 .....	124
第一節 三慧與兩修 .....	124
(一) 經義	
(二) 教理	
一、法藏辨	
二、教相辨	
三、法相辨	
四、機教辨	
五、時教辨	
(三) 文法	
一、略語誤導	
二、離經誤解	
第二節 聞佛與觀性 .....	127
(一) 聞修密義——聞佛聖號	
一、佛號與佛語	
二、世音與綸音	
三、聞佛與觀性	
四、一根與六根	
五、觀音與勢至	
(二) 思修奧義——內照佛性	
一、聞識與聞性	
二、聞性與觀性	
三、自性與藏性	
四、略語誤導	
第四章 果門 .....	128

# 《楞嚴》指要

《首楞嚴義疏註經》云：「一經法體，總含教、理、行、果。」

（宋·子璿）僅舉數句經文，略辨其義。

## 第一章 教 門

《楞嚴經》云：「此方真教體，清淨在音聞」，總示耳根法門教法；「將聞持佛佛」，示聞修修定教法；「何不自聞聞」，示思修修慧教法。

### 一、佛號與佛語

《楞嚴經》云：「將聞持佛佛」，持聞佛號與持聞佛語也。

其一、一「佛」字言佛號。聞佛法門之主要教法之一，乃持聞佛號。《無量壽經》傳彌陀淨土教法，云：「聞吾名號」。

其二、另「佛」字言佛語。聞佛法門之主要教法之一，乃持聞佛語。《佛說大乘莊嚴寶王經》云：「是時，此《佛說大乘莊嚴寶王經》中，自然出微妙聲。是諸惡鬼得聞其聲，所執身見雖如山峰及諸煩惱，金剛智杵破壞無餘，便得往生極樂世界。」

### 二、世音與綸音

觀世音菩薩因地「初於聞中」，所「聞」何音？聞佛聖號。觀音菩薩由「聞熏聞修」而得成就「金剛三昧」。「聞熏」者，聞佛聖號而受熏。以佛名召德，佛德熏染故。此「熏」恰如大勢至菩薩念佛法門「香光莊嚴」之「染」衣人「身有香氣」。非佛名號，何來如此強大功德之力而能熏行者入於金剛三昧！觀世音菩薩名號「世音」，表其果地功德——觀世音聲而救苦。若論因地行法，則非聞「世音」，乃聞聖號「綸音」。

### 三、聞佛與觀性

「將聞持佛佛」，相修契入，聞佛聖號攝心修定；「何不自聞聞」，性修為旨，觀如來藏妙真如性，定慧等持。

#### 四、一根與六根

經云：「但於一門深入。入一無妄，彼六知根，一時清淨。」聞佛法門藉娑婆眾生耳根之利，由耳根契入，得六根清淨。

#### 五、觀音與勢至

觀音位次何以先於勢至？

其一、聞佛法門易於成就。觀世音菩薩表聞佛法門；大勢至菩薩表念佛法門。文殊菩薩比較圓通諸法，偈曰：「諸行是無常，念性元生滅。因果今殊感，云何獲圓通？」又曰：「於此（耳根法）門無惑，方便易成就。」是知，念佛法門難修而聞佛法門易成。

其二、聞佛法門契眾根機。娑婆世界眾生耳根最利。文殊偈曰：「此方真教體，清淨在音聞」；「以救諸末劫，求出世間人，成就涅槃心，觀世音為最」。觀音聞佛法門更契此方眾生根性，法緣更盛，度眾更廣，功德更大。

【依古人註經之法，當曰：道法者，天機在焉，神明戒護。法本要義必隱晦曲奧。或投明師，或祈冥加。竭誠可望開解。】

## 第二章 理 門

《楞嚴經》開示如來藏妙真如性，曰：「如來藏中，性色真空，性空真色；清淨本然，周遍法界；隨眾生心，應所知量，循業發現。」佛語關乎眾生思維模式，屬哲學「範疇論」。

「範疇」，是人們用以觀察、辨識客觀事物的最基本思維構架，體現著人們的思維模式。範疇是現代哲學重要研究領域，稱為「範疇論」。德國哲學家康德對「範疇論」學說貢獻至鉅。

《楞嚴經》說「如來藏妙真如性」，至多涉及「性」、「相」對法，佛何以言及「空」與「色（有）」呢？此乃方便說，隨順印度古人既有思維模式之空有範疇，應機設教。

## 第一節 空有範疇

印度古人思維模式重表象，建立在「空」與「有」基本範疇基礎之上。對有形有相、可觸可及、具有物質實體的事物，他們統統歸入「有」範疇；而對無形無相、不可觸不可及、不具物質實體的事物，則統統歸入「空」範疇。其模式參見圖一。此種思維模式也體現於佛教僧團中，古印度部派佛教時期重要教派即名為「說一切『有』部」與「說一切『空』部」。

釋迦牟尼佛為印度古人說法，一切概念均置入「空」、「有」範疇框架中解說。因此，對無形質者，均以「空」標示之。如「抽象」之理，稱為「空理」。

《楞嚴經》所示「如來藏性」，屬於「性」、「相」對法。其模式參見圖二。

佛陀向印度古人演說「如來藏性」，須於印度古人原有「空有」範疇基礎之上，構建「性」的概念，即將圖一與圖二重合，那麼，「性」，就橫跨「空」、「有」兩個範疇。其模式正如圖三。

「性」是抽象概念，依印度古人的觀念，屬於「空」的範疇。因此，佛陀引導阿難七處徵心，了不可得，使之明瞭「性」屬於「空」的一部份特徵。此即「性色真空」之義。其模式參見圖三中之A區域。

「性」又具有極強的穩定性，決定著對應的事物。依印度古人觀念，這屬於「有」範疇。因此，佛又以四科、七大「本如來藏妙真如性」，使之明瞭「性」屬於「有」範疇特徵。此即「性空真色」之義。其模式參見圖三中之B區域。


「性色真空」說色相，了不可得；「性空真色」說色力，能生萬法。

為了讓阿難在空有範疇構架下，建立「性」概念，佛以色（地）說明之後，又舉火、水、風、覺四例解說：「性火真空，性空真火」；「性水真空，性空真水」；「性風真空，性空真風」；「性覺


真空，性空真覺」。佛在空有範疇體系下，運用一系列概念（「妙」、「明」等），解說「性」。如「性妙覺明，本覺明妙」等。

如來藏理論是大乘佛教教理的核心。經文中，在建立起「性」的概念之後，佛陀以「汝觀交中性，空有二俱非」，教導印度古人擺脫空有範疇體係思維模式束縛，正確認知「性」。佛陀又說一系列的「非」與「即」，用自相矛盾的判定，指出性相與空有範疇體係的不相容性。釋迦牟尼佛應機說法，示現無量聖智。


【依古人註經之法，當曰：「性色真空」體也，言色相；「性空真色」用也，言色力。「性」體空寂，了不可得，故色相「真空」。「性火」、「性水」、「性風」、「性覺」，亦復如是。「性」起用處，色力強大，能生色法，制約色法，故曰「真色」。「真火」、「真水」、「真風」、「真覺」，亦復如是。地（色）、水、火、風、覺，統攝無情有情。故曰「一切萬法不離自性」。



圖一 西土正法眾生思維方式的空有範疇模式



圖二 漢地末法眾生思維方式的性相範疇模式



圖三 佛說「性」與空有範疇示意圖

## 第二節 性相範疇

漢地學人思維模式重於分析，觀察事物重在解析其現象與本質，思維模式建立在「性」與「相」基本範疇之上。（其模式參見圖二）

《中庸》第一句「天命之謂『性』」。《三字經》第一句：「人之初，『性』本善。」俗語：「江山易改、秉性難移。」此種思維模式與大乘佛教教理契合。漢傳佛教宗派，不依「空有」分，而依「性相」論，稱為「性宗」與「相宗」。

對漢地學人解說如來藏性，只須在「性相」範疇之上，直接建立「佛性」概念，由「眾生皆具佛性」，即可直接契入「如來藏性」。因此，《壇經》既不講性色真空，也不講性空真色，而是開門見山地直示：「菩提自性，本來清淨。但用此心，直了成佛。」如果深入講解佛性，只須建立「佛相」（三身）與「佛性」對法。因此，《壇經》以很大篇幅，講「一體三身自性佛」。漢地學人建構在「性相」範疇基礎上的思維模式，乃修學大乘佛法之優勢，所謂「近水樓臺」，「就路還家」。故釋迦牟尼佛預言：大乘法運在東土。

漢傳佛教古德譯註古印度佛典，雖也善盡闡釋佛語之職，卻並未注意轉換範疇。遂使漢地學人依經修學，先須改換自己的思維模式，建立「空」、「有」範疇，而後才能理解經文佛語。之後，再依經義，由「空」、「有」解「性」；由「性」解「佛性」。這樣，漢地學人兜了一個比印度古人更大的圈子，卻又回到自己思維模式原點。正如佛說：「頭上安頭」，導致漢地學人修學大乘佛法的優勢反成劣勢。

如果繞了圈子，而能修學成就，學人終究不枉辛苦一場。嚴重的是，在兜這個大圈子的漫長途中，有兩大障礙難於逾越：其一、摧毀原有的「性相」範疇體係而另建新的「空有」範疇體係，即摧毀原有的思維模式而另建新的思維模式；其二、以新構建的空有範疇，取代自己原有的空、有概念。範疇是思維模式，概念只是思維工具。漢地學人原具「空」與「有」兩個概念，存在明確的定義，清晰的外延與內涵；而與「空有」範疇並不重合；從而產生思維邏輯的混亂。

建立或改變思維模式是「基因工程」，舉一個民族之力，以千萬年之功，方可完成；絕非個人力所能及，更非數十寒暑可以奏功。對普通學人而言，改變思維模式，建立新的基本範疇體係，近乎不可能。因此，許多漢地學人終其一生，陷於空有範疇與空有概念混亂糾

纏的思維困境。

漢地學人思維模式中，「空有」範疇無法建立，而「空有」概念又牢不可破。於是，印度佛典中關於「空」的精闢論述，在漢地學人思維模式中形成明顯悖論、謬論。例如：「緣起性空」與「因果不空」，是逆命題，互為反證。再如：「因緣所生法，我說即是空，一名為假名，一名中道義」。「空」、「假」、「中」概念的外延互相重合，內涵自相矛盾。

範疇與概念的混亂，導致漢傳佛教教理基礎雜亂無章自相矛盾，造成漢地學人重大修學障礙。因此，漢地學人大多無法深入教理，而選擇繞過教理。幸而，釋迦牟尼佛拈花示意涅槃妙心，教外別傳正法眼藏。因應法運轉移，諸佛菩薩降臨東土，在性相範疇基礎上，重新構建符合漢地眾生思維模式的大乘教理體系，集大成者為《六祖壇經》。六祖大師總說教法：「菩提自性，本來清淨。但用此心，直了成佛。」又曰：「說一切法，莫離於性相」（敦煌本）。《壇經》繞過空有，直接在性相基本範疇上，建構教理體系。

同時，《壇經》還指出漢地學人對空有範疇的懵懂：「口但說空，不識『真空』（指範疇）」；「當念之時有妄，有妄即非『真有』（指範疇）」。六祖大師指出了空有、性相兩大範疇體系之間的鴻溝：「口但說空，萬劫不得見性」。大師棒喝漢地學人：「第一莫著空！」教導漢地學人跳脫空有概念、範疇的糾纏。大師示現不識字，以極端方式喻示，擺脫漢譯印度佛典「空有」文字相的束縛。

《壇經》中，大師凡講到「空」，皆使用語辭概念「虛空」，以「空」解「大（摩訶）」，明確其「廣大」、「無物」等義，使之不與範疇相混，以避免因誤解而干擾性相範疇體系。

漢地本土佛典《六祖壇經》、《西方確指》等，因應漢地學人思維模式，直捷在「性」、「相」範疇框架下，闡釋大乘教理體系。漢地學人由此契入佛法，事半功倍。

【依古人註經之法，當曰：佛度眾生，因病與藥，應機設教。西土眾生當以「空有」之理得度，諸佛菩薩依「空有」之理而為說法。

縱論「性相」，亦循空有之理而善巧演義。譬之「性色真空，性空真色」。漢地眾生當以「性相」得度者，諸佛菩薩依性相之理而為說法。縱論「空有」，亦循「性相」之理而說之。譬如「口但說空，萬劫不得見性。」若以「空有」之理而演於漢地，乃刻舟以求劍也。若復以空有之理而說性相，乃「頭上安頭」，佛所誡也。】

## 第三章 行 門

《楞嚴經》云：「從聞、思修，入三摩地」，示修定之法；「旋汝倒聞機，返聞聞自性」，示修慧之法。

### 第一節 三慧與兩修

《楞嚴經》〈耳根圓通章〉云：「爾時，觀世音菩薩即從座起，頂禮佛足，而白佛言：「世尊！憶念我昔無數恆河沙劫，於時有佛出現於世，名『觀世音』。我於彼佛發菩提心，彼佛教我：『從聞思修，入三摩地。』」

「聞思修」，通常解釋為「三慧」，聞慧、思慧、修慧。依文解義，並無不妥。但依經義、教理、文法，「聞思修」似應解釋為「兩修」：聞修與思修。偶見古註家言及此義。

#### （一）經義

《耳根圓通章》一卷經文，無一句離「兩修」，而無一句涉「三慧」。例如：

一、《楞嚴經》云：「由我供養觀音如來，蒙彼如來授我『如幻聞熏聞修金剛三昧』。」此處觀世音菩薩明示：「聞」乃「聞熏」與「聞修」，並非「聞慧」。

二、《楞嚴經》云：「熏聞離塵，色所不劫」。證入「色所不劫」境界，不可能經由「聞慧」之散慧，而只能經由「（聞）熏聞（修）」之寂定而「離塵」。

三、《楞嚴經》云：「由我聞、思，脫出六塵」。證入「脫出六塵」境界，不可能經由「聞慧」、「思慧」之散慧，而只能經由「聞修」之

寂定與「思修」之妙慧。

## （二）教理

### 一、法藏辨

「三慧」是聲聞藏法，屬小乘教法；「兩修」是菩薩藏法，屬大乘教法。

三慧見於《成實論》，為小乘論典。《楞嚴經》大乘密教經典。觀世音菩薩發菩提心之後，觀世音如來才傳法。聞修成就，大悲彰顯，三十二應、十四無畏廣度眾生，儼然大乘菩薩氣象。

### 二、教相辨

「三慧」屬解門；「兩修」屬行門。

《大乘義章》曰：「受教名『聞』，生解名為『聞慧』。」「生解」自屬解門。《楞嚴經》前半部〈徵心辨見章〉，講解門；而〈圓通章〉講行門。觀世音菩薩講述：「初於聞中」至「寂滅現前」，皆講修證行法，而非慧解。

### 三、法相辨

「聞慧」指用聞識；「聞修」指攝聞根。

「聞慧」者，聞指「聽」聞教法，旨在根塵相合。「聞修」者，聞指「觀」音而得定入寂，旨在根塵相離。

### 四、機教辨

「三慧」是悟前之法；「兩修」是悟後之法。

聞慧、思慧皆為散慧，皆屬尚未明心之悟前境界。《楞嚴經》中，在阿難開悟明心之後，才教授圓通行法觀音法門之聞修、思修。

### 五、時教辨

「三慧」是度正法眾生教法；「兩修」是度末法眾生教法。

三慧見於《成實論》，屬正法教法。《楞嚴經》云：「以救諸『末劫』，求出世間人。成就涅槃心，觀世音為最。」經文明示兩修屬末法教法。

### (三) 文法

#### 一、略語誤導

譯經採用變體文，文法異於散文、論說文。為便於讀誦，湊齊字數，譯師通常添加虛字或省字略語。經文「從聞思修，入三摩地」一句，譯師省略了一個「修」字，應為「從聞（修）、思修，入三摩地」。經文「由我聞思，脫出六塵」一句，譯師省略了兩個「修」字，應為「由我聞（修）、思（修），脫出六塵」。經文「熏聞離塵，色所不劫」一句，應為「（聞）熏聞（修）離塵，色所不劫」。可見，省略「修」字是本段經文譯師的習慣。

如果採用現代標點符號，應為「從聞、思修，入三摩地」。

#### 二、離經誤解

古印度注重「因明學」，論述邏輯性強。典籍文法結構嚴謹。綜觀《耳根圓通章》文義，未離兩修而未涉三慧。漢地大乘學人大多起於世學，尋章摘句積習甚深，依文解義，在所難免。兼以實修親證經義功夫每感不足，以致以訛傳訛。

【依古人註經之法，當曰：斷句乃讀書之本，故曰「句讀」。斷句誤而求解義，未知其可也。斷句之法，依文義而不可依文字之相，依本文義而不可依他文義。解「聞思修」義亦然。《楞嚴經》與《成實論》皆有「聞思修」三字。依文字相則以「三慧」解未嘗不可，依文義則大相徑庭。《楞嚴經》〈圓通章〉以觀音、文殊二菩薩說法為主。一說聞修之法，一說思修之法。「聞思修」自當解為聞修與思修。經為大乘經，法為菩薩法，焉能以聲聞乘法作「聞慧」解。〈耳根圓通章〉說「聞修」、「思修」，皆行門之法，焉能以他文之解門「聞慧」、「思慧」。古人論辨義：「不怕迥異，只怕微殊」。於今言之：尤懼文同，所謂「疑似」者也。】

## 第二節 聞佛與觀性

### （一）聞修密義——聞佛聖號

經中，觀世音菩薩說「聞修」行法（經文自「初於聞中」至「寂滅現前」）、境界（心相十方圓明、二種殊勝與行相三十二應、十四無畏）與功德（如幻聞熏聞修金剛三昧）。經文未涉淨土，何以觀音忝列西方三聖？文殊菩薩曰：「將聞持佛佛，何不自聞聞。」點出密義——觀音菩薩以耳根聞佛，屬淨土法門。

### （二）思修奧義——內照佛性

經中，文殊菩薩說思修行法：「旋汝倒聞機，反聞聞自性」。

「旋汝倒聞機，反聞聞自性」，一句略字甚多。義為：「旋轉你自己意識活動的方向，由原來聞性生聞識的運作機制，倒轉為反觀內照，逆向觀察識與性的活動：由聞識的活動，反觀聞性的主宰作用，思維聞性的特徵與功能。觀成，進而以此逆向觀察的方法，運用於觀察藏識與藏性之間的關係，由此明了如來藏妙真如性的特徵與功能。」（此即「明心識性」）

#### 一、聞識與聞性

「反」者，返觀內照。「聞聞」者，聞識與聞性之運作機制。

#### 二、聞性與觀性

或曰「反聞，聞自性」，斷句錯誤。應為「反聞聞，（觀）自性」。「性」者，抽象「法」。「萬法皆空」，耳根不可及，唯意根可及。意根起用，「識」稱「思」，「智」稱「觀」、「照」，不可稱「聞」。

#### 三、自性與藏性

前句之「自性」，指自身主宰自己藏識之藏性。後句之「性」，指如來藏妙真如性。

#### 四、略語誤導

「何不自聞聞」與「反聞聞自性」，皆省略「觀」字，乃此段譯者之文風。

【依古人註經之法，當曰：文法者，著作之軌範，解義之準則也。昧於文法而解經義者，猶棄規矩而辯方圓耳。以「聞自性」解者，動賓不配，昧於語法之學而誤解經義矣。】

### 第四章 果 門

《楞嚴經》云：「覺海性澄圓，圓澄覺元妙」，示成就境界；「性成無上道，圓通實如是」，示果門功德。

「覺海性澄圓」，自性清淨而達致圓滿；「圓澄覺元妙」，契入玄妙而不可思議境界。

「性成無上道，圓通實如是」，義為：「如果能夠明達如來藏妙真如性的特徵並彰顯自己本具的如來藏妙真如性的功能，控制、主導，乃至取代自己諸識的運作，所謂「轉識成智」，即成就了無上道業。所謂「圓通」的行法與成就，就是指前述過程與結果。」（此即「見性成佛」）

【依古人註經之法，當曰：事竟謂之「成」。如來藏妙真如性圓澄盡顯，方稱「性成」。外示三十二相，內俱慈悲喜捨，行現三十二應身說法，四重妙德。故曰：「無上道」。「見性成佛」，此之謂也。】

# 《楞嚴經》科判

1 序分	1 通序 .....	第 1 品	法會成就			
	2 別序 .....	第 2 品	教起因緣			
2 正宗分	1 悟道識性	1 因空說性	1 例示 .....	第 3 品	徵心明空	
			2 理示 .....	第 4 品	辨見說性	
		2 因色說性	.....	第 5 品	四科說性	
			.....	第 6 品	七大說性	
			3 性非空色 .....	第 7 品	因覺悟性	
		2 修道顯性	1 顯性之理	1 纏縛之理 .....	第 8 品	塵濁根結
				2 解脫之理 .....	第 9 品	六解一亡
	2 顯性之法		1 顯教行法	1 泛說諸法圓通 .....	第 11 品	諸法圓通
		2 略說念佛圓通 .....		第 12 品	念佛圓通	
		3 詳說耳根圓通		1 聞修 定學 .....	第 13 品	耳根聞修
2 思修 慧學 .....		第 14 品	耳根思修			
2 顯密通法 戒學 .....	第 15 品	清淨明誨				
3 證道見性	分證聖境	1 壇法 .....	第 16 品	道場壇法		
		2 咒法 .....	第 17 品	持咒功德		
	1 分證之理 .....	第 18 品	增進漸次			
3 付囑分	分證之境 .....	2 分證之境 .....	第 19 品	分證位階		
		1 結名付囑 .....	第 20 品	結名付囑		
	附 凡魔境界	1 當脫凡境 .....	第 21 品	七趣因果		
		2 辨識魔境 .....	第 22 品	五陰魔境		
2 再囑末劫 .....	第 23 品	再囑末劫				

## 《阿彌陀經》說聞佛法門

《佛說阿彌陀經》主說念佛法門；兼說聞佛法門。

經中，佛說聞佛法門，含攝教、理、行、果四重法義。

經云：「聞說『阿彌陀佛』。」示教，聞法。

經云：「是諸眾鳥晝夜六時出和雅音。其音演暢五根、五力、七菩提分、八聖道分，如是等法。其土眾生聞是音已，皆悉念佛、念法、念僧。」復云：「彼佛國土微風吹動，諸寶行樹及寶羅網出微妙音，譬如百千種樂同時俱作。聞是音者，自然皆生念佛、念法、念僧之心。」示理。前段言聞修，聞佛法語；後段言聞薰。由兼說聞法，歸於主說念法。

經云：「若有善男子、善女人，聞是經受持者，及聞諸佛名者。」示行，聞修，聞佛聖號。

經云：「是諸善男子、善女人，皆為一切諸佛之所護念，皆得不退轉於阿耨多羅三藐三菩提。」示果，聞佛成佛。

# 《阿彌陀經》科會

## 序

古德判教，正宗分三，曰「信、願、行」；而以半部經判為流通分。既違經義，復悖常例。正宗分似宜判為「願、行、信」。

盛讚勝境，以利勾牽，誘羨啟「願」。超乎常識，反易啟疑，豈可判「信」。「難信」法故，乃以下半部經詳說「信」：諸佛證信；以果勸信；以例催信；以難激信。反復開示，結歸「難信」。故當判「信」，方合經義。

「願、行、信」者，聖言應機教法。「信、願、行」者，行人修學次第。

課題組

## 《阿彌陀經》科會

經開三分：一、序分；二、正宗分；三、流通分。

### 甲一 序分。

如是我聞。一時，佛在舍衛國祇樹給孤獨園，與大比丘僧千二百五十人俱，皆是大阿羅漢，眾所知識：長老舍利弗、摩訶目犍連、摩訶迦葉、摩訶迦旃延、摩訶俱絺羅、離婆多、周利槃陀伽、難陀、阿難陀、羅睺羅、憍梵波提、賓頭盧頗羅墮、迦留陀夷、摩訶劫賓那、薄拘羅、阿晃樓駄，如是等諸大弟子；並諸菩薩摩訶薩：文殊師利法王子、阿逸多菩薩、乾陀訶提菩薩、常精進菩薩，與如是等諸大菩薩，及釋提桓因等無量諸天大眾俱。

### 甲二 正宗分 分三：一、願門；二、行門；三、信門

乙一 願門 分二：一、讚羨啟願；二、教導發願；三、類聚催願。

丙一 讚羨啟願 分四：一、讚法啟願；二、讚土啟願；三、讚佛啟願；四、讚眾啟願。

### 丁一 讚法啟願。

爾時，佛告長老舍利弗：「從是西方，過十萬億佛土，有世界名曰『極樂』。其土有佛，號『阿彌陀』，今現在說法。

「舍利弗！彼土何故名為『極樂』？其國眾生無有眾苦，但受諸樂，故名『極樂』。

### 丁二 讚土啟願。

「又，舍利弗！極樂國土七重欄楯、七重羅網、七重行樹，皆是四寶周匝圍遶。是故，彼國名為『極樂』。

「又，舍利弗！極樂國土有七寶池，八功德水充滿其中；池底純以金沙布地；四邊階道金銀、琉璃、玻璃合成。上有樓閣，亦以金銀、琉璃、玻璃、硨磲、赤珠、瑪瑙而嚴飾之。池中蓮華大如車輪，青色青光、黃色黃光、赤色赤光、白色白光，微妙香潔。舍利弗！極樂國土成就如是功德莊嚴。

「又，舍利弗！彼佛國土常作天樂；黃金為地；晝夜六時雨天曼陀羅華。其土眾生常以清旦，各以衣祴盛眾妙華，供養他方十萬億佛。即以食時，還到本國，飯食經行。舍利弗！極樂國土成就如是功德莊嚴。」

「復次，舍利弗！彼國常有種種奇妙雜色之鳥：白鶴、孔雀、鸚鵡、舍利、迦陵頻伽、共命之鳥。是諸眾鳥晝夜六時出和雅音。其音演暢五根、五力、七菩提分、八聖道分，如是等法。其土眾生聞是音已，皆悉念佛、念法、念僧。舍利弗！汝勿謂此鳥實是罪報所生。所以者何？彼佛國土無三惡道。舍利弗！其佛國土尚無惡道之名，何況有實！是諸眾鳥，皆是阿彌陀佛欲令法音宣流，變化所作。」

「舍利弗！彼佛國土微風吹動，諸寶行樹及寶羅網出微妙音，譬如百千種樂同時俱作。聞是音者，自然皆生念佛、念法、念僧之心。舍利弗！其佛國土成就如是功德莊嚴。」

### 丁三 讚佛啟願

「舍利弗！於汝意云何，彼佛何故號『阿彌陀』？舍利弗！彼佛光明無量，照十方國，無所障礙，是故號為『阿彌陀』。又，舍利弗！彼佛壽命，及其人民無量無邊阿僧祇劫，故名『阿彌陀』。舍利弗！阿彌陀佛成佛以來，於今十劫。又，舍利弗！彼佛有無量無邊聲聞弟子，皆阿羅漢，非是算數之所能知。諸菩薩眾亦復如是。舍利弗！彼佛國土成就如是功德莊嚴。」

### 丁四 讚眾啟願

「又，舍利弗！極樂國土眾生生者，皆是阿鞞跋致，其中多有一生補處。其數甚多，非是算數所能知之，但可以『無量無邊阿僧祇』說。」

### 丙二 教導發願。

「舍利弗！眾生聞者，應當發願：願生彼國。」

### 丙三 類聚促願。

「所以者何？得與如是諸上善人俱會一處。」

### 乙二 行門 分三：一、助行；二、正行；三、主行。

### 丙一 助行。

「舍利弗！不可以少善根、福德、因緣，得生彼國。」

### 丙二 正行。

「舍利弗！若有善男子、善女人，聞說『阿彌陀佛』，執持名號，若一日、若二日、若三日、若四日、若五日、若六日、若七日，一心不亂。其人臨命終時，阿彌陀佛與諸聖眾現在其前。是人終時，心不顛倒，即得往生阿彌陀佛極樂國土。舍利弗！我見是利，故說此言。」

### 丙三 主行。

「若有眾生聞是說者，應當發願：生彼國土。」

## 乙三 信門 分四：一、諸佛證信；二、以果勸信；三、以例催信；四、以難激信。

### 丙一 諸佛證信。

「舍利弗！如我今者，讚歎阿彌陀佛不可思議功德之利，東方亦有阿閼鞞佛、須彌相佛，大須彌佛、須彌光佛、妙音佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』」

「舍利弗！南方世界有日月燈佛、名聞光佛、大燄肩佛、須彌燈佛、無量精進佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』」

「舍利弗！西方世界有無量壽佛、無量相佛、無量幢佛、大光佛、大明佛、寶相佛、淨光佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』」

「舍利弗！北方世界有燄肩佛、最勝音佛、難沮佛、日生佛、網明佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』」

「舍利弗！下方世界有師子佛、名聞佛、名光佛、達摩佛、法幢

佛、持法佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』

「舍利弗！上方世界有梵音佛、宿王佛、香上佛、香光佛、大毘肩佛、雜色寶華嚴身佛、娑羅樹王佛、寶華德佛、見一切義佛、如須彌山佛、……如是等恆河沙數諸佛，各於其國，出廣長舌相，遍覆三千大千世界，說誠實言：『汝等眾生當信是《稱讚不可思議功德一切諸佛所護念經》。』」

### 丙二 以果勸信。

「舍利弗！於意云何？何故名為《一切諸佛所護念經》？舍利子！若有善男子、善女人，聞是經受持者，及聞諸佛名者，是諸善男子、善女人，皆為一切諸佛之所護念，皆得不退轉於阿耨多羅三藐三菩提。是故，舍利弗！汝等皆當信受我語，及諸佛所說。」

### 丙三 以例催信。

「舍利弗！若有人已發願、今發願、當發願，欲生阿彌陀佛國者，是諸人等，皆得不退轉於阿耨多羅三藐三菩提；於彼國土，若已生、若今生、若當生。是故，舍利弗！諸善男子、善女人若有信者，應當發願：生彼國土。」

### 丙四 以難激信。

「舍利弗！如我今者稱讚諸佛不可思議功德；彼諸佛等亦稱讚我不可思議功德，而作是言：『釋迦牟尼佛能為甚難希有之事，能於娑婆國土、五濁惡世，劫濁、見濁、煩惱濁、眾生濁、命濁中，得阿耨多羅三藐三菩提；為諸眾生說是一切世間難信之法』。舍利弗！當知，我於五濁惡世行此難事，得阿耨多羅三藐三菩提，為一切世間說此難信之法，是為甚難。」

### 甲三 流通分。

佛說是經已，舍利弗及諸比丘、一切世間天、人、阿修羅、等，聞佛所說，歡喜信受，作禮而去。

【下編】

# 聞 佛 儀 軌

## 序

妙法修證，本無儀軌之說；菩提樹下，焉得魚磬之設？後世學人，難於攝念；古聖先賢，方便施為。鋪張陳設，無非藉境以拘身；觀、念、聞、誦，要在緣行而攝心。積習既久，乃成定法。若無儀軌，便似虛妄。是故，順眾生而原曲舊調，效先賢而步韻成篇。共修或有齊整之功，自修未必增益之效。古來實修，講求二六時中；當今後生，每喜耳機常掛。自家體驗，當為取捨依據；萬法皆空，方稱諸佛本懷。

課題組

## 目 錄

(一) 儀軌 .....	138
聞佛法會儀軌 .....	138
早課儀軌 .....	139
晚課儀軌 .....	140
(二) 課本 .....	141
〈1〉 經咒 .....	141
《無量壽經》節選 .....	141
《楞嚴經》節選 .....	148
《阿彌陀經》節選 .....	156
《往生咒》 .....	156
〈2〉 讚頌 .....	156
〈3〉 懺悔 .....	162
〈4〉 祈願 .....	162
〈5〉 迴向 .....	165

## （一）儀軌

### 聞佛法會儀軌

#### 【供佛】

〔播音：讚頌〕

〔上香、上供、禮讚如儀或禮佛聞讚〕

#### 【聞佛法語】

〔播音：《開經偈》後，下列各經輪換播音：

一、《無量壽經》或節選；

二、《阿彌陀經》或節選；

三、《楞嚴經》或節選；

〔播音：《往生咒》（三遍）〕

〔坐聞〕

#### 【聞佛聖號】

〔播音：彌陀聖號百千萬〕（自選梵唄。不侷四字六字，不限二聲四聲六聲，乃至五會。以聞生法喜為宜）

〔坐聞。坐久行聞。昏沉行聞，間以拜佛。坐、行、拜佛，皆以調身助調心。要須不昏沉、不散亂，不雜聞，不斷聞，歷歷分明，一念不生〕

#### 【發願】

〔發願：跪禱。或誦《求生淨土文》，自禱更佳，務須至誠懇切。聞佛每支香發願一次〕

#### 【迴向】

〔播音：《迴向文》立聞〕

〔禮佛三拜〕

〔立誦迴向偈〕

#### 【圓滿】

## 早課儀軌

### 【供佛】

〔播音：讚頌〕

〔上香、上供、禮讚如儀或禮佛聞讚〕

### 【聞佛法語】

〔播音：《開經偈》、《無量壽經》佛說聞佛經文。之後，或於下列選一，或每日輪換播音：

一、《無量壽經》或節選：說戒五品經文（學戒者宜），

二、《阿彌陀經》或節選（修信者宜），

三、《無量壽經》或節選〈發大誓願品〉（修願者宜），

四、《楞嚴經》或節選〈觀音章〉（聞修者宜），

五、《楞嚴經》或節選〈文殊章〉（思修者宜），

之後，播音：《往生咒》（三遍）〕

〔坐聞〕

### 【聞佛聖號】

〔播音：彌陀聖號（百八，或三遍或七遍或二十一遍）

〔坐聞〕

### 【發願】

〔發願：跪禱，或誦《求生淨土文》，自禱更佳，務須至誠懇切〕

〔禮佛三拜〕

### 【迴向】

〔立誦迴向偈〕

### 【圓滿】

## 晚課儀軌

### 【供佛】

〔播音：讚頌〕

〔上香、上供、禮讚如儀或行禮聞讚〕

### 【聞佛法語】

〔播音：《開經偈》、《無量壽經》佛說聞佛經文。之後，或於下列選一，或每日輪換播音：

一、《無量壽經》或節選：說戒五品經文（學戒者宜），

二、《阿彌陀經》或節選（修信者宜），

三、《無量壽經》或節選〈發大誓願品〉（修願者宜），

四、《楞嚴經》或節選〈觀音章〉（聞修者宜），

五、《楞嚴經》或節選〈文殊章〉（思修者宜），

之後，播音：《往生咒》（三遍）〕

〔坐聞〕

### 【聞佛聖號】

〔播音：彌陀聖號（百八，或三遍或七遍或二十一遍）〕

〔坐聞〕

### 【發願】

〔發願：跪禱，或誦《求生淨土文》，自禱更佳，務須至誠懇切〕

〔禮佛三拜〕

### 【迴向】

〔立誦迴向偈〕

### 【圓滿】

〔上列儀程各項下之內容，均應自選。合成完整音頻。自禱時段可設背景音樂或留白〕

## (二) 課本

### 〈1〉經咒

## 《無量壽經》節選

### 〈說戒五品〉

#### 三十三、厭離濁世

「世人共爭不急之務，於此劇惡極苦之中，勤身營務，以自給濟。尊卑、貧富、少長、男女，累念積慮，為心走使。無田憂田，無宅憂宅。眷屬財物，有無同憂。有一少一，思欲齊等。適小具有，又憂非常。水、火、盜、賊、怨家、債主，焚、漂、劫、奪，消散磨滅。心慳意固，無能縱捨。命終棄捐，莫誰隨者。貧富同然，憂苦萬端。世間人民（父子、兄弟、夫婦、親屬……），當相敬愛，無相憎嫉。有無相通，無得貪惜。言色常和，莫相違戾。或時心諍，有所恚怒，後世轉劇，至成大怨。世間之事，更相患害。雖不臨時，應急想破。人在愛欲之中，獨生獨死、獨去獨來。苦樂自當，無有代者。善惡變化，追逐所生。道路不同，會見無期。何不於強健時努力修善？欲何待乎？

「世人善惡，自不能見；吉凶禍福，競各作之。身愚神闇，轉受餘教。顛倒相續，無常根本。蒙冥抵突，不信經法。心無遠慮，各欲快意。迷於瞋恚，貪於財色，終不休止。哀哉可傷！先人不善，不識道德，無有語者，殊無怪也。死生之趣，善惡之道，都不之信，謂無有是。更相瞻視，且自見之。或父哭子，或子哭父；兄弟夫婦，更相哭泣。一死一生，迭相顧戀。憂愛結縛，無有解時。思想恩好，不離情欲。不能深思熟計，專精行道。年壽旋盡，無可奈何。惑道者眾，悟道者少。各懷殺毒，惡氣冥冥。為妄興事，違逆天地。恣意罪極，頓奪其壽。下入惡道，無有出期。若曹當熟思計：遠離眾惡，擇其善者，勤而行之。愛欲榮華，不可常保，皆當別離，無可樂者。當勤精進，生安樂國。智慧明達，功德殊勝。勿得隨心所欲，虧負經戒，在人後也。」

### 三十四、勤修善法

彌勒白言：「佛語教誡，甚深甚善！皆蒙慈恩，解脫憂苦。佛為法王，尊超群聖；光明徹照，洞達無極；普為一切天人之師。今得值佛，復聞無量壽聲，靡不歡喜，心得開明。」

佛告彌勒：「敬於佛者，是為大善。實當念佛，截斷狐疑。拔諸愛欲，杜眾惡源。游步三界，無所掛礙。開示正道，度未度者。若曹當知：十方人民永劫以來，輾轉五道，憂苦不絕。生時苦痛，老亦苦痛，病極苦痛，死極苦痛。惡臭不淨，無可樂者。宜自決斷，洗除心垢。言行忠信，表裡相應。人能自度，轉相拯濟。至心求願，積累善本。雖一世精進勤苦，須臾間耳。後生無量壽國，快樂無極。永拔生死之本，無復苦惱之患。壽千萬劫，自在隨意。宜各精進，求心所願，無得疑悔，自為過咎。生彼邊地七寶城中，於五百歲，受諸厄也。」

彌勒白言：「受佛明誨，專精修學。如教奉行，不敢有疑。」

### 三十五、嚴持戒法

佛告彌勒：「汝等能於此世端心正意，不為眾惡，甚為大德。所以者何？十方世界善多惡少，易可開化。唯此五惡世間，最為劇苦。我今於此作佛，教化群生。令捨五惡、去五痛、離五燒，降化其意；令持五善，獲其福德。何等為五？

「其一者。世間諸眾生類，欲為眾惡。強者伏弱，轉相尅賊，殘害殺傷，迭相吞噉。不知為善，後受殃罰；故有窮乞、孤獨、聾盲、瘖啞、癡惡、尅狂。皆因前世不信道德，不肯為善。其有尊貴、豪富、賢明、長者、智勇、才達，皆由宿世慈孝、修善、積德所致。世間有此目前現事，壽終之後，入其幽冥。轉生受身，改形易道。故有泥犁、禽獸、蜻飛、蠕動之屬。譬如世法牢獄、劇苦、極刑。魂神命精隨罪趣向。所受壽命或長或短。相從共生，更相報償。殃惡未盡，終不得離。輾轉其中，累劫難出。難得解脫，痛不可言。天地之間自然有是。雖不即時暴

應，善惡會當歸之。

「其二者。世間人民不順法度，奢淫驕縱，任心自恣。居上不明，在位不正。陷人冤枉，損害忠良。心口各異，機偽多端。尊卑中外更相欺誑。瞋恚愚癡，欲自厚己，欲貪多有。利害、勝負，結忿成讎。破家亡身，不顧前後。富有慳惜，不肯施與。愛保貪重，心勞身苦。如是至竟，無一隨者。善惡禍福，追命所生。或在樂處，或入苦毒。又，或見善憎謗，不思慕及。常懷盜心，悖望他利。用自供給，消散復取。神明尅識，終入惡道。自有三途，無量苦惱。輾轉其中，累劫難出，痛不可言。

「其三者。世間人民相因寄生，壽命幾何？不良之人，身心不正，常懷邪惡，常念姪姩。煩滿胸中，邪態外逸。費損家財，事為非法。所當求者，而不肯為！又或交結聚會，興兵相伐。攻劫殺戮，歸給妻子。極身作樂，眾興憎厭，患而苦之。如是之惡，著於人鬼，神明記識。自入三途，無量苦惱。輾轉其中，累劫難出，痛不可言。

「其四者。世間人民不念修善，兩舌、惡口、妄言、綺語。憎嫉善人，敗壞賢明。不孝父母，輕慢師長。朋友無信，難得誠實。尊貴自大，謂己有道。橫行威勢，侵易於人。欲人畏敬，不自慚懼。難可降化，常懷驕慢。賴其前世福德營護，今世為惡。福德盡滅，壽命終盡，諸惡繞歸。又其名籍記在神明。殃咎牽引，無從捨離。但得前行，入於火鑊。身心摧碎，神形苦極。當斯之時，悔復何及！

「其五者。世間人民徒倚懈怠，不肯作善、治身、修業。父母教誨，違戾反逆。譬如怨家，不如無子。負恩違義，無有報償。放恣、游散、耽酒、嗜美、魯扈、抵突。不識人情，無義、無禮，不可諫曉。六親眷屬資用有無，不能憂念。不惟父母之恩，不存師友之義。意念、身、口，曾無一善。不信諸佛經法，不信生死善惡。欲害真人，鬥亂僧眾。愚癡蒙昧，自為智慧。不知生所從來，死所趣向。不仁、不順，希望長生。

慈心教誨，而不肯信；苦口與語，無益其人。心中閉塞，意不開解。大命將終，悔懼交至。不豫修善，臨時乃悔。悔之於後，將何及乎？

「天地之間，五道分明。善惡報應，禍福相承。身自當之，無誰代者。善人行善，從樂入樂，從明入明。惡人行惡，從苦入苦，從冥入冥。誰能知者？獨佛知耳。教語開示，信行者少。生死不休，惡道不絕。如是世人，難可具盡。故有自然三塗，無量苦惱。輾轉其中，世世累劫。無有出期，難得解脫，痛不可言。如是五惡、五痛、五燒，譬如大火，焚燒人身。若能自於其中，一心制意，端身正念；言行相副，所作至誠；獨作諸善，不為眾惡。身獨度脫，獲其福德，可得長壽、泥洹之道。是為五大善也。」

### 三十六、斷除惡法

佛告彌勒：「吾語汝等，如是五惡、五痛、五燒，輾轉相生。敢有犯此，當歷惡趣。或其今生，先被病殃，死生不得，示眾見之。或於壽終，入三惡道，愁痛酷毒，自相焦然。共其怨家，更相殺傷。從小微起，成大困劇。皆由貪著財色，不肯施惠；各欲自快，無復曲直；癡欲所迫，厚己爭利；富貴榮華，當時快意；不能忍辱，不務修善。威勢無幾，隨以磨滅。天道施張，自然糾舉。兢兢忪忪，當入其中。古今有是，痛哉可傷。

「汝等得佛經語，熟思惟之。各自端守，終身不怠。尊聖敬善，仁慈博愛。當求度世，拔斷生死眾惡之本；當離三塗，憂怖苦痛之道。若曹作善，云何第一？當自端心，當自端身。耳、目、口、鼻，皆當自端。身心淨潔，與善相應。勿隨嗜欲，不犯諸惡。言色當和，身行當專。動作瞻視安定徐為。作事倉卒，敗悔在後。為之不諦亡其功夫。」

### 三十七、奉持經戒

「汝等廣植德本，勿犯道禁，忍辱精進，慈心專一，齋戒清淨，一日一夜，勝在無量壽國為善百歲。所以者何？彼佛國土皆積德眾善，

無毫髮之惡。於此修善，十日十夜，勝於他方諸佛國中為善千歲。所以者何？他方佛國福德自然，無造惡之地。唯此世間，善少惡多。飲苦食毒，未嘗寧息。

「吾哀汝等，苦心誨喻，授與經法。悉持思之，悉奉行之。尊卑、男女、眷屬、朋友，轉相教語，自相約檢。和順義理，歡樂慈孝。所作如犯，則自悔過。去惡就善，朝聞夕改。奉持經戒，如貧得寶。改往修來，洒心易行。自然感降，所願輒得。

「佛所行處，國邑丘聚靡不蒙化。天下和順，日月清明。風雨以時，災厲不起。國豐民安，兵戈無用。崇德興仁，務修禮讓。國無盜賊，無有冤枉。強不凌弱，各得其所。

「我哀汝等，甚於父母念子。我於此世作佛，以善攻惡，拔生死之苦；令獲五德，升無為之安。吾般泥洹，經道漸滅。人民諂偽，復為眾惡。五燒、五痛，久後轉劇。汝等轉相教誡，如佛經法，無得犯也。」

彌勒菩薩合掌白言：「世人惡苦如是如是，佛皆慈哀，悉度脫之。受佛重誨，不敢違失。」

### 〈發大誓願品〉

法藏白言：「唯願世尊大慈聽察。我若證得無上菩提，成正覺已，所居佛剎具足無量不可思議功德莊嚴。無有地獄、餓鬼、禽獸、蜎飛、蠕動之類。所有一切眾生，以及焰摩羅界三惡道中，來生我剎，受我法化，悉成阿耨多羅三藐三菩提，不復更墮惡趣。得是願，乃作佛；不得是願，不取無上正覺。

「我作佛時，十方世界所有眾生，令生我剎，皆具紫磨真金色身、三十二種大丈夫相。端正淨潔，悉同一類。若形貌差別，有好醜者，不取正覺。

「我作佛時，所有眾生生我國者，自知無量劫時宿命。所作善惡，皆能洞視、徹聽。知十方去、來、現在之事。不得是願，不取正

覺。

「我作佛時，所有眾生我國者，皆得他心智通。若不悉知億那由他百千佛剎眾生心念者，不取正覺。

「我作佛時，所有眾生我國者，皆得神通自在波羅密多。於一念頃，不能超過億那由他百千佛剎，周遍巡歷、供養諸佛者，不取正覺。

「我作佛時，所有眾生我國者，遠離分別，諸根寂靜。若不決定成等正覺、證大涅槃者，不取正覺。

「我作佛時，光明無量，普照十方，絕勝諸佛，勝於日月之明千萬億倍。若有眾生見我光明照觸其身，莫不安樂，慈心作善，來生我國。若不爾者，不取正覺。

「我作佛時，壽命無量。國中聲聞天人無數，壽命亦皆無量。假令三千大千世界眾生悉成緣覺，於百千劫，悉共計校，若能知其量數者，不取正覺。

「我作佛時，十方世界無量剎中，無數諸佛，若不共稱歎我名，說我功德國土之善者，不取正覺。

「我作佛時，十方眾生聞我名號，至心信樂，所有善根心心迴向，願生我國，乃至十念。若不生者，不取正覺。唯除五逆、誹謗正法。

「我作佛時，所有十方無量無邊無數世界一切眾生，聞吾名號，發菩提心，種諸善根，隨意求生，諸佛剎土，無不得生，悉皆令得阿耨多羅三藐三菩提。若不爾者，不取正覺。

「我作佛時，所有眾生，求生我剎，念吾名號，發志誠心，堅固不退。一心念我，晝夜不斷。彼命終時，我與諸菩薩眾，迎現其前，經須臾間，即生我剎，作阿惟越致菩薩。若不爾者，不取正覺。

「我作佛時，十方眾生聞我名號，繫念我國。發菩提心，堅固不退。植眾德本，至心迴向，欲生極樂，無不遂者。若有宿惡，聞我名字，即自悔過，為道作善，便持經戒，願生我剎。命終不復更三惡道，即生我國。若不爾者，不取正覺。

「我作佛時，國無婦女。若有女人，聞我名字，得清淨信，發菩提心，厭患女身，願生我國。命終即化男子，來我剎土。十方世界諸眾生類生我國者，皆於七寶池蓮華中化生。若不爾者，不取正覺。

「我作佛時，十方眾生聞我名字，歡喜信樂，禮拜歸命。以清淨心，修菩薩行。諸天世人莫不致敬。若聞我名，壽終之後，生尊貴家，諸根無缺，常修殊勝梵行。若不爾者，不取正覺。

「我作佛時，國中無不善名。所有眾生生我國者，皆同一心，住於定聚。永離熱惱，心得清涼。所受快樂，猶如漏盡比丘。若起想念，貪計身者，不取正覺。

「我作佛時，生我國者，善根無量，皆得金剛那羅延身，堅固之力。身頂皆有光明照耀，成就一切智慧，獲得無邊辯才，善談諸法秘要。說經行道，語如鐘聲。若不爾者，不取正覺。

「我作佛時，所有眾生生我國者，究竟必至一生補處。除其本願為眾生故。被弘誓鎧，教化一切有情，皆發信心，修菩提行，行普賢道。雖生他方世界，永離惡趣。或樂說法，或樂聽法，或現神足，隨意修習，無不圓滿。若不爾者，不取正覺。

「我作佛時，生我國者所需飲食、衣服、種種供具，隨意即至，無不滿願。十方諸佛應念受其供養。若不爾者，不取正覺。

「我作佛時，國中萬物嚴淨光麗，形色殊特，窮微極妙，無能稱量。其諸眾生雖具天眼，有能辨其形色、光相、名數，及總宣說者，不取正覺。

「我作佛時，國中無量色樹，高或百千由旬。道場樹高四百萬里。諸菩薩中，雖有善根劣者，亦能了知。欲見諸佛淨國莊嚴，悉於寶樹間見。猶如明鏡，睹其面像。若不爾者，不取正覺。

「我作佛時，所居佛剎廣博嚴淨，光瑩如鏡，徹照十方無量無數不可思議諸佛世界。眾生睹者，生希有心。若不爾者，不取正覺。

「我作佛時，下從地際，上至虛空，宮殿、樓觀、池流、華樹，國土所有一切萬物，皆以無量寶香合成。其香普熏十方世界。眾生聞者，皆修佛行。若不爾者，不取正覺。

「我作佛時，十方佛剎諸菩薩眾聞我名已，皆悉逮得清淨、解脫、普等三昧、諸深總持、住三摩地，至於成佛。定中常供無量無邊一切諸佛，不失定意。若不爾者，不取正覺。

「我作佛時，他方世界諸菩薩眾，聞我名者，證離生法，獲陀羅尼。清淨歡喜，得平等住，修菩薩行，具足德本。應時不獲一二三忍，於諸佛法不能現證不退轉者，不取正覺。」

## 《楞嚴經》節選

### 〈觀音章〉

爾時，觀世音菩薩即從座起，頂禮佛足，而白佛言：「世尊！憶我昔無數恆河沙劫，於時有佛出現於世，名『觀世音』。我於彼佛發菩提心，彼佛教我：『從聞、思修，入三摩地。』初於聞中，入流亡所；所入既寂，動、靜二相了然不生。如是漸增，聞所聞盡；盡聞不住，覺所覺空；空覺極圓，空所空滅；生滅既滅，寂滅現前。忽然超越世出世間，十方圓明，獲二殊勝。一者，上合十方諸佛本妙覺心，與佛如來同一慈力。二者，下合十方一切六道眾生，與諸眾生同一悲仰。

「世尊！由我供養觀音如來，蒙彼如來授我『如幻聞熏聞修金剛三昧』。與佛如來同慈力故，令我身成三十二應，入諸國土。世尊！若諸菩薩，入三摩地，進修無漏，勝解現圓；我現佛身而為說法，令其解脫。若諸有學，寂靜妙明，勝妙現圓；我於彼前，現獨覺身，而為說法，令其解脫。若諸有學，斷十二緣，緣斷勝性，勝妙現圓；我於彼前，現緣覺身，而為說法，令其解脫。若諸有學，得四諦空，修道入滅，勝性現圓；我於彼前，現聲聞身，而為說法，令其解脫。若諸眾生，欲心明悟，不犯欲塵，欲身清淨；我於彼前，現梵王身，而為說法，令其解脫。若諸眾生，欲為天主，統領諸天；我於彼前，現帝釋身，而為說法，令其成就。若諸眾生，欲身自在，遊行十方；我於彼前，現自在天身，而為說法，令其成就。若諸眾生，欲身自在，飛行虛空；我於彼前，現大自在天身，而為說法，令其成就。若諸眾

生，愛統鬼神，救護國土；我於彼前，現天大將軍身，而為說法，令其成就。若諸眾生，愛統世界，保護眾生；我於彼前，現四天王身，而為說法，令其成就。若諸眾生，愛生天宮，驅使鬼神；我於彼前，現四天王國太子身，而為說法，令其成就。若諸眾生，樂為人王；我於彼前，現人王身，而為說法，令其成就。若諸眾生，愛主族姓，世間推讓；我於彼前，現長者身，而為說法，令其成就。若諸眾生，愛談名言，清淨自居；我於彼前，現居士身，而為說法，令其成就。若諸眾生，愛治國土，剖斷邦邑；我於彼前，現宰官身，而為說法，令其成就。若諸眾生，愛諸數術，攝衛自居；我於彼前，現婆羅門身，而為說法，令其成就。若有男子，好學出家，持諸戒律；我於彼前，現比丘身，而為說法，令其成就。若有女人，好學出家，持諸禁戒；我於彼前，現比丘尼身，而為說法，令其成就。若有男子，樂持五戒；我於彼前，現優婆塞身，而為說法，令其成就。若有女子，五戒自居；我於彼前，現優婆夷身，而為說法，令其成就。若有女人，內政立身，以修家國；我於彼前，現女主身，及國夫人，命婦大家，而為說法，令其成就。若有眾生，不壞男根；我於彼前，現童男身，而為說法，令其成就。若有處女，愛樂處身，不求侵暴；我於彼前，現童女身，而為說法，令其成就。若有諸天，樂出天倫；我現天身，而為說法，令其成就。若有諸龍，樂出龍倫；我現龍身，而為說法，令其成就。若有藥叉，樂度本倫；我於彼前，現藥叉身，而為說法，令其成就。若乾闥婆，樂脫其倫；我於彼前，現乾闥婆身，而為說法，令其成就。若阿修羅，樂脫其倫；我於彼前，現阿修羅身，而為說法，令其成就。若緊那羅，樂脫其倫；我於彼前，現緊那羅身，而為說法，令其成就。若摩呼羅伽，樂脫其倫；我於彼前，現摩呼羅伽身，而為說法，令其成就。若諸眾生，樂人修人；我現人身，而為說法，令其成就。若諸非人，有形、無形，有想、無想，樂度其倫；我於彼前，皆現其身，而為說法，令其成就。是名『妙淨三十二應入國土身』，皆以三昧聞熏聞修，無作妙力自在成就。

「世尊！我復以此『聞熏聞修金剛三昧』無作妙力，與諸十方、

三世、六道一切眾生，同悲仰故；令諸眾生，於我身心，獲十四種無畏功德。一者，由我不自觀音，以觀觀者，令彼十方苦惱眾生，觀其音聲，即得解脫。二者：知見旋復，令諸眾生設入大火，火不能燒。三者：觀聽旋復，令諸眾生大水所漂，水不能溺。四者：斷滅妄想，心無殺害，令諸眾生入諸鬼國，鬼不能害。五者：熏聞成聞，六根銷復，同於聲聽；能令眾生臨當被害，刀段段壞，使其兵戈猶如割水，亦如吹光，性無搖動。六者：聞熏精明，明遍法界，則諸幽暗性，不能全；能令眾生、藥叉、羅刹、鳩槃荼鬼及毗舍遮富單那等，雖近其傍，目不能視。七者：音性圓銷，觀聽返入，離諸塵妄；能令眾生，禁繫枷鎖所不能著。八者：滅音圓聞，遍生慈力；能令眾生經過險路，賊不能劫。九者：熏聞離塵，色所不劫；能令一切多嬌眾生，遠離貪欲。十者：純音無塵，根境圓融，無對、所對；能令一切忿恨眾生，離諸瞋恚。十一者：銷塵旋明，法界身心，猶如琉璃，朗徹無礙；能令一切昏鈍性，障諸阿顛迦，永離癡暗。十二者：融形復聞，不動道場，涉入世間，不壞世界，能遍十方，供養微塵諸佛如來，各各佛邊為法王子；能令法界無子眾生欲求男者，誕生福德、智慧之男。十三者：六根圓通，明照無二，含十方界，立大圓鏡，空如來藏，承順十方微塵如來祕密法門，受領無失；能令法界無子眾生欲求女者，誕生端正、福德、柔順、眾人愛敬、有相之女。十四者：此三千大千世界，百億日月，現住世間諸法王子，有六十二恆河沙數，修法垂範，教化眾生；隨順眾生方便智慧，各各不同；由我所得圓通本根，發妙耳門，然後身心微妙含容周遍法界；能令眾生持我名號，與彼共持六十二恆河沙諸法王子，二人福德正等無異。世尊！我一名號，與彼眾多名號無異，由我修習，得真圓通。是名『十四施無畏力』，福備眾生。

「世尊！我又獲是圓通，修證無上道故，又能善獲四不思議無作妙德。一者：由我初獲妙妙聞心，心精遺聞，見聞覺知不能分隔，成一圓融清淨寶覺；故我能現眾多妙容，能說無邊祕密神咒。其中或現一首、三首、五首、七首、九首、十一首，如是乃至一百八首、千

首、萬首、八萬四千燦迦羅首；二臂、四臂、六臂、八臂、十臂、十二臂、十四、十六、十八、二十、至二十四，如是乃至一百八臂、千臂、萬臂、八萬四千母陀羅臂；二目、三目、四目、九目，如是乃至一百八目、千目、萬目、八萬四千清淨寶目；或慈、或威，或定、或慧，救護眾生，得大自在。二者：由我聞、思，脫出六塵，如聲度垣，不能為礙；故我妙能，現一一形，誦一一咒，其形、其咒，能以無畏施諸眾生；是故十方微塵國土，皆名我為『施無畏者』。三者：由我修習本妙圓通清淨本根，所遊世界，皆令眾生捨身珍寶，求我哀愍。四者：我得佛心，證於究竟；能以珍寶種種，供養十方如來，傍及法界六道眾生；求妻得妻，求子得子，求三昧得三昧，求長壽得長壽，如是乃至求大涅槃得大涅槃。

「佛問圓通，我從耳門圓照三昧，緣心自在，因入流相，得三摩提，成就菩提，斯為第一。世尊！彼佛如來，歎我善得圓通法門，於大會中，授記我為『觀世音』號，由我觀聽十方圓明，故『觀音』名遍十方界。」

### 〈文殊章〉

爾時，世尊於師子座，從其五體同放寶光，遠灌十方微塵如來及法王子、諸菩薩頂。彼諸如來，亦於五體同放寶光，從微塵方，來灌佛頂，并灌會中諸大菩薩及阿羅漢。林木池沼，皆演法音，交光相羅，如寶絲網。是諸大眾得未曾有，一切普獲『金剛三昧』。即時，天雨百寶蓮華，青、黃、赤、白，間錯紛糅。十方虛空，成七寶色。此娑婆界大地山河，俱時不現。唯見十方微塵國土，合成一界。梵唄詠歌，自然敷奏。

於是，如來告文殊師利法王子：「汝今觀此二十五無學諸大菩薩及阿羅漢，各說最初成道方便，皆言修習真實圓通。彼等修行，實無優劣、前後差別。我今欲令阿難開悟二十五行，誰當其根？兼我滅後，此界眾生入菩薩乘，求無上道，何方便門，得易成就？」

文殊師利法王子奉佛慈旨，即從座起，頂禮佛足，承佛威神，說

偈對佛：

「覺海性澄圓，圓澄覺元妙。  
元明照生所，所立照性亡。  
迷妄有虛空，依空立世界，  
想澄成國土，知覺乃眾生。  
空生大覺中，如海一漚發，  
有漏微塵國，皆依空所生。  
漚滅空本無，況復諸三有。  
歸元性無二，方便有多門。  
聖性無不通，順逆皆方便。  
初心入三昧，遲速不同倫。  
色想結成塵，精了不能徹；  
如何不明徹，於是獲圓通。  
音聲雜語言，但伊名句味；  
一非含一切，云何獲圓通？  
香以合中知，離則元無有；  
不恆其所覺，云何獲圓通？  
味性非本然，要以味時有；  
其覺不恆一，云何獲圓通？  
觸以所觸明，無所不明觸；  
合離性非定，云何獲圓通？  
法稱為內塵，憑塵必有所；  
能所非遍涉，云何獲圓通？  
見性雖洞然，明前不明後；  
四維虧一半，云何獲圓通？  
鼻息出入通，現前無交氣；  
支離匪涉入，云何獲圓通？  
舌非入無端，因味生覺了；  
味亡了無有，云何獲圓通？

身與所觸同，各非圓覺觀；  
涯量不冥會，云何獲圓通？  
知根雜亂思，湛了終無見；  
想念不可脫，云何獲圓通？  
識見雜三和，詰本稱非相；  
自體先無定，云何獲圓通？  
心聞洞十方，生於大因力；  
初心不能入，云何獲圓通？  
鼻想本權機，祇令攝心住；  
住成心所住，云何獲圓通？  
說法弄音文，開悟先成者；  
名句非無漏，云何獲圓通？  
持犯但束身，非身無所束；  
元非遍一切，云何獲圓通？  
神通本宿因，何關法分別；  
念緣非離物，云何獲圓通？  
若以地性觀，堅礙非通達；  
有為非聖性，云何獲圓通？  
若以水性觀，想念非真實；  
如如非覺觀，云何獲圓通？  
若以火性觀，厭有非真離；  
非初心方便，云何獲圓通？  
若以風性觀，動寂非無對；  
對非無上覺，云何獲圓通？  
若以空性觀，昏鈍先非覺；  
無覺異菩提，云何獲圓通？  
若以識性觀，觀識非常住；  
存心乃虛妄，云何獲圓通？  
諸行是無常，念性元生滅；

因果今殊感，云何獲圓通？  
我今白世尊：佛出娑婆界，  
此方真教體，清淨在音聞；  
欲取三摩提，實以聞中入。  
離苦得解脫，良哉觀世音；  
於恆沙劫中，入微塵佛國；  
得大自在力，無畏施眾生。  
妙音、觀世音、梵音、海潮音，  
救世悉安寧，出世獲常住。  
我今啟如來，如觀音所說，  
譬如人靜居，十方俱擊鼓，  
十處一時聞，此則圓真實。  
目非觀障外，口鼻亦復然，  
身以合方知，心念紛無緒；  
隔垣聽音響，遐邇俱可聞，  
五根所不齊，是則通真實。  
音聲性動靜，聞中為有無；  
無聲號無聞，非實聞無性；  
聲無既無滅，聲有亦非生；  
生滅二圓離，是則常真實。  
縱令在夢想，不為不思無，  
覺觀出思惟，身心不能及。  
今此娑婆國，聲論得宣明，  
眾生迷本聞，循聲故流轉。  
阿難縱強記，不免落邪思，  
豈非隨所淪，旋流獲無妄？  
阿難汝諦聽：我承佛威力，  
宣說金剛王如幻不思議佛母真三昧。  
汝聞微塵佛，一切秘密門；

欲漏不先除，畜聞成過誤。  
將聞持佛佛，何不自聞聞？  
聞非自然生，因聲有名字；  
旋聞與聲脫，能脫欲誰名？  
一根既返源，六根成解脫。  
見聞如幻翳，三界若空華，  
聞復翳根除，塵銷覺圓淨。  
淨極光通達，寂照含虛空；  
卻來觀世間，猶如夢中事。  
摩登伽在夢，誰能留汝形？  
如世巧幻師，幻作諸男女，  
雖見諸根動，要以一機抽；  
息機歸寂然，諸幻成無性。  
六根亦如是，元依一精明，分成六和合；  
一處成休復，六用皆不成；  
塵垢應念消，成圓明淨妙。  
餘塵尚諸學，明極即如來。  
大眾及阿難：  
旋汝倒聞機，反聞聞自性，  
性成無上道，圓通實如是。  
此是微塵佛，一路涅槃門。  
過去諸如來，斯門已成就；  
現在諸菩薩，今各入圓明；  
未來修學人，當依如是法；  
我亦從中證，非唯觀世音。  
誠如佛世尊，詢我諸方便，  
以救諸末劫，求出世間人。  
成就涅槃心，觀世音為最；  
自餘諸方便，皆是佛威神。

即事捨塵勞，非是長修學，  
淺深同說法。  
頂禮如來藏，無漏不思議。  
願加被未來，於此門無惑，方便易成就。  
堪以教阿難，及末劫沉淪，  
但以此根修，圓通超餘者，真實心如是。」

## 《阿彌陀經》節選

「舍利弗！於意云何？何故名為《一切諸佛所護念經》？舍利子！若有善男子、善女人聞是經受持者及聞諸佛名者，是諸善男子、善女人皆為一切諸佛之所護念，皆得不退轉於阿耨多羅三藐三菩提。是故，舍利弗！汝等皆當信受我語，及諸佛所說。」

## 《往生咒》

南無阿彌多婆夜 侈他伽多夜 哆地夜他： 阿彌利都婆毗 阿彌  
利哆 悉耽婆毗 阿彌利哆 毗迦蘭帝 阿彌利哆 毗迦蘭多 伽彌  
膩 伽伽那 枳多迦利 娑婆訶

### 〈2〉讚頌

（羅列多項備選：聞生法喜者。）

### 香 讚

（一）

戒定真香  
焚起衝天上  
弟子虔誠  
爇在金鑪放  
頃刻氤氳

即遍滿十方

昔日耶輸免難消災障

南無香雲蓋菩薩摩訶薩（三稱）

（二）

香爐乍爇 法界蒙熏

諸佛海會悉遙聞 隨處結祥雲

誠意方殷勤 諸佛現全身

南無香雲蓋菩薩摩訶薩（三稱）

南無靈山會上佛菩薩（三稱）

南無常住十方佛

南無常住十方法

南無常住十方僧

南無本師釋迦牟尼佛

南無消災延壽藥師佛

南無極樂世界阿彌陀佛

南無當來下生彌勒尊佛

南無十方三世一切諸佛

南無大智文殊師利菩薩

南無大行普賢菩薩

南無大悲觀世音菩薩

南無大勢至菩薩

南無大願地藏王菩薩

南無清淨大海眾菩薩

南無蓮池海會眾菩薩

## 蓮池讚

蓮池海會 彌陀如來 觀音勢至坐蓮台  
接引上金階 大誓弘開 普願離塵埃。

南無蓮池海會菩薩摩訶薩（三稱）

## 佛 讚

### （一）

彌陀佛 大願王 慈悲喜捨難量 眉間常放白毫光  
度眾生 極樂邦 八德池中蓮九品 七寶妙樹成行  
如來聖號若宣揚 接引往西方  
彌陀聖號若稱揚 同願往西方

### （二）

阿彌陀佛身金色 相好光明無等倫  
毫宛轉五須彌 紺目澄清四大海  
光中化佛無數億 化菩薩眾亦無邊  
四十八願度眾生 九品咸令登彼岸  
南無西方極樂世界大慈大悲阿彌陀佛  
南無阿彌陀佛（百八）

### （三）

阿彌陀佛 無上醫王  
巍巍金相放毫光 苦海作舟航  
九品蓮邦 同願往西方  
南無西方極樂世界大慈大悲阿彌陀佛  
南無阿彌陀佛  
南無觀世音菩薩  
南無大勢至菩薩  
南無清淨大海眾菩薩

〔上三任選其一〕

## 僧寶讚

僧寶不思議，身披三事雲衣；  
浮盃過海剎那時，赴感應群機。  
堪作人天功德主，堅持戒行無違。  
我今稽首願遙知，振錫杖提攜。

## 觀世音菩薩讚

### (一)

觀音菩薩妙難酬，清淨莊嚴累劫修。  
三十二應遍塵刹，百千萬劫化閻浮。  
瓶中甘露常時灑，手內楊枝不計秋。  
千處祈求千處應，苦海常作度人舟。  
南無普陀山琉璃世界，大慈大悲觀世音菩薩  
南無觀世音菩薩（繞佛三匝轉念快調）  
觀音菩薩（歸位跪念）

### (二)

菩薩號圓通 降生七寶林中  
千手千眼妙真容 端坐普陀宮  
楊柳枝頭甘露灑 普滋法界薰蒙  
千層浪裡顯神通 光降道場中  
千層浪裡顯神通 光降道場中

### (三)

南無過去正法明如來，現前觀世音菩薩，成妙功德，具大慈悲。於一身心，現千手眼。照見法界，護持眾生。令發廣大道心，教持圓滿神咒。永離惡道，得生佛前。無間重愆，纏身惡疾，莫能救濟，悉使消除。三昧辯才，現身求願，咸令果遂，決定無疑。能使速獲三乘，早登佛地。威神之力，歎莫能窮。故我一心，歸命頂

禮。

〔上三任選其一〕

## 大勢至菩薩讚

(一)

大勢至 利生深 專主念佛法門  
因心果覺兩相契 立刻返本還源  
部攝六根妙難論 願遍界流存

(二)

勢至菩薩德無疆 輔弼彌陀作慈航  
救苦直同觀自在 導西不異普賢王  
修因遍用根塵識 證果俱獲圓通常  
攝念佛人歸淨土 此恩永劫莫能忘  
南無西方極樂世界 無邊光熾身 大勢至菩薩  
南無大勢至菩薩

## 普賢讚

(一)

普賢行願深 勸發菩提大心  
三賢十地諸聖倫 令見彌陀尊  
十大願王若遵循 利益非佛莫陳  
果覺因心相符泯 證清淨法身  
果覺因心相符泯 證清淨法身

(二)

菩薩慈悲不可陳 聖凡悉使證圓因  
一心不住超諸位 十願導歸繼能仁

三乘咸令契果覺 群萌速得脫煩塵  
恪遵大士清明誨 決定即生達本真  
南無峨嵋山銀色世界 大行普賢王菩薩  
南無普賢王菩薩

## 普賢十大願

- 一者、禮敬諸佛；
- 二者、讚歎如來；
- 三者、廣修供養；
- 四者、懺除業障；
- 五者、隨喜功德；
- 六者、請轉法輪；
- 七者、請佛住世；
- 八者、常隨佛學；
- 九者、恆順眾生；
- 十者、普皆迴向。

## 普賢菩薩警眾偈

是日已過，命亦隨滅。如少水魚，斯有何樂。  
當勤精進，如救頭然。但念無常，慎勿放逸。

## 文殊菩薩讚

(一)

文殊輔法王 智慧莫量  
圓頓教中振玄綱 妙義徹底彰  
聞者直下亡情見 達本菩提道場  
願如善財沐恩光 究竟證真常

願如善財沐恩光 究竟證真常

(二)

文殊菩薩德難量 久成龍種上法王  
因憐眾生迷自性 特輔釋迦振玄綱  
為七佛師體莫測 作菩薩母用無方  
常住寂光應眾感 萬川一月影咸彰  
南無清涼山金色世界 大智文殊師利菩薩  
南無妙吉祥菩薩

(上列各讚偈俱依聞生法喜而任選組合)

〈3〉懺悔

(一)

往昔所造諸惡業，  
皆由無始貪瞋痴；  
從身語意之所生；  
一切罪障皆懺悔。

(二)

願消三障諸煩惱，  
願得智慧真明了；  
一切災障悉消除，  
日日常行菩薩道。

[上述任選其一]

〈4〉祈願

四弘誓願

自性眾生誓願度，自性煩惱誓願斷，

自性法門誓願學，自性佛道誓願成。

## 淨土發願文

(慈雲懺主作)

一心皈命 極樂世界 阿彌陀佛  
願以淨光照我 慈誓攝我  
我今淨心 聞如來名 為菩提道 求生淨土  
佛昔本誓 若有眾生 欲生我國 志心信樂 乃至十念  
若不生者 不取正覺  
以此聞佛因緣 得入如來 大誓海中  
承佛慈力 眾罪消滅 善根增長  
若臨命終 自知時至 身無病苦  
心不貪戀 意不顛倒 如入禪定  
佛及聖眾 手執金臺 來迎接我  
於一念頃 生極樂國 花開見佛 即聞佛乘 頓開佛慧  
廣度眾生 滿菩提願

## 大慈菩薩發願偈

十方三世佛 阿彌陀第一  
九品度眾生 威德無窮極  
我今大歸依 懺悔三業罪  
凡有諸福善 至心用迴向  
願同聞佛人 感應隨時現  
臨終西方境 分明在目前  
見聞皆精進 同生極樂國  
見佛了生死 如佛度一切  
無邊煩惱斷 無量法門修

誓願度眾生 總願成佛道  
虛空有盡 我願無窮  
情與無情 同圓種智

## 西方發願文

(雲棲大師作)

稽首西方安養國 接引眾生大導師  
我今發願願往生 惟願慈悲哀攝受

弟子某甲普為四恩三有，法界眾生，求於諸佛，一乘無上菩提道故，專心持念阿彌陀佛，萬德宏名，期生淨土。又以業重福輕，障深慧淺，染心易熾，淨德難成。今於佛前，俯動五體，披瀝一心，投誠懺悔。我及眾生，曠劫至今，迷本淨心，縱貪瞋痴，染穢三業，無量無邊。所作罪垢，無量無邊；所集諸業，願悉消滅。從於今日，立深誓願。遠離惡法，誓不更造。勤修聖道，誓不退墮。誓成正覺，誓度眾生。阿彌陀佛，以慈悲願力，當證知我，當哀愍我，當加被我。願禪觀之中，夢寐之際，得見阿彌陀佛金色之身；得歷阿彌陀佛寶嚴之土；得蒙阿彌陀佛甘露灌頂，光明照身，手摩我頭，衣覆我體。使我宿障自除，善根增長，疾空煩惱，頓破無明。圓覺妙心，廓然開悟；寂光真境，常得現前。至於臨欲命終，預知時至。身無一切病苦厄難，心無一毫貪戀迷惑。諸根悅豫，正念分明。捨報安詳，如入禪定。阿彌陀佛，與觀音勢至，諸聖賢眾，放光接引，垂手提攜。樓閣幢幡，異香天樂，西方聖境，昭示目前。令諸眾生，見者聞者，歡喜感歎，發菩提心。我於爾時，乘金剛台，隨從佛後，於彈指頃，生極樂國。七寶池內，勝蓮華中。華開見佛，見諸菩薩，聞妙法音，獲無生忍。於須臾間，承事諸佛，親蒙授記，得授記已，三身四智，五眼六通，無量百千陀羅尼門，一切功德，皆悉成就。然後，不違安養，回入娑婆，分身無數，遍千方刹，以不可思議自在神力，種種方便，度脫眾生。咸令離染，還得淨心，同生西方，入不退地。如此大願，

世界無盡，眾生無盡，業及煩惱，一切無盡，我願無盡。願今禮佛發願，修持功德，回施有情，四恩總報，三有齊資，法界眾生，同圓種智。

## 發願文

我今發心：不為自求人天福報、聲聞、緣覺，乃至權乘諸位菩薩；唯依最上乘，發菩提心，願與法界眾生，一時同得阿耨多羅三藐三菩提。

## 三皈依

自歸依佛	當願眾生	體解大道	發無上心
自歸依法	當願眾生	深入經藏	智慧如海
自歸依僧	當願眾生	統理大眾	一切無礙

〔上述任選組合〕

## 〈5〉迴向

(一)

蓮池海會 彌陀如來 觀音勢至坐蓮臺  
接引上金階 大誓弘開 普願離塵埃。

(二)

願生西方淨土中  
九品蓮華為父母  
華開見佛悟無生  
不退菩薩為伴侶

(三)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

(四)

聞佛功德殊勝行，無邊勝福皆回向。  
普願沉溺諸眾生，速往無量光佛刹。

(五)

四生九有 同歸淨土法門。  
八難三途 共入彌陀願海。

(六)

國基鞏固  
治道遐昌  
佛日增輝  
法輪常轉

〔上述任選組合〕

(迴向後頂禮)

一心頂禮宏揚淨樂土 釋迦佛如來 千百億化身 遍法界諸佛

## 大迴向

(靈巖山法本)

弟子眾等 現是生死凡夫 罪障深重 輪迴六道 苦不可言  
今遇知識 得聞彌陀名號 本願功德 聞佛聖號 求願往生  
願佛慈悲不捨 哀憐攝受  
弟子眾等 不識佛身 相好光明 願佛示現 令我得見

及見觀音勢至 諸菩薩眾 彼世界中 清淨莊嚴 光明妙相等  
令我了了 得見阿彌陀佛  
南無阿彌陀佛  
南無觀世音菩薩  
南無大勢至菩薩  
南無清淨大海眾菩薩

（此文古今大有靈驗，或有於正發願時，見諸瑞相。或於睡夢之中，得見阿彌陀佛，放大光明。感應事繁，不能具述。唯勵意行之者，方信不虛矣。）

願我臨終無障礙 阿彌陀佛遠相迎  
觀音甘露灑吾頂 勢至金臺安我足  
一剎那中離五濁 屈伸臂頃到蓮池  
蓮華開後見慈尊 親聽法音可了了  
聞已即悟無生忍 不違安養入娑婆  
善知方便度眾生 巧把塵勞為佛事  
我願如是佛自知 畢竟當來得成就 （起立）

一心頂禮 宏揚淨樂土 釋迦佛如來  
千百億化身 遍法界諸佛  
一心頂禮 常寂光淨土 阿彌陀如來  
清淨妙法身 遍法界諸佛  
一心頂禮 實報莊嚴土 阿彌陀如來  
微塵相海身 遍法界諸佛  
一心頂禮 方便同居土 阿彌陀如來  
解脫相嚴身 遍法界諸佛  
一心頂禮 西方安樂土 阿彌陀如來  
大乘根界身 遍法界諸佛  
一心頂禮 西方安樂土 阿彌陀如來

	十方應化身	遍法界諸佛
一心頂禮	西方安樂土	教行理三經
	及依正宣揚	遍法界尊法
一心頂禮	西方安樂土	觀世音菩薩
	萬億紫金身	遍法界菩薩摩訶薩
一心頂禮	西方安樂土	大勢至菩薩
	無邊光熾身	遍法界菩薩摩訶薩
一心頂禮	西方安樂土	清淨大海眾
	滿分二嚴身	遍法界聖眾